


Abdulreqîb Yûsuf

Hunerê Tabloyên Şerefnamê



JN Weşanêñ Jîna nû

**Weşanên Jîna Nû: 24
Beşê hunerî: 1
Çapa Yekem: Tebax 1991**

**© Hemû mafêñ tabloyêñ di vê pirtûkê de parastî ne. Bê izna
Jîna Nû li tu derê bi tu awayî nikarin bêñ çap kirin.**

**Navnişan:
Jîna Nû Förlaget
Box: 30
740 22 Bälinge-SWEDEN**

Postgiro: 503799-9

ISBN: 9188054-047

Abdulreqîb Yûsuf

**Hunerê Tabloyêñ
Şerefnamê**

Wergêr: Elîşêr

JN Weşanêñ Jîna nû

NAVEROK

Daxuyanîya Weşanxanê.....	9
Hunerê Tabloyên Şerefnamê.....	11
Tarixa Dawî ya Nivîsandina Şerefnamê.....	18
Destxeta Nusxayê.....	19
Nusxa Şerefnamê ya Yekemîn.....	21
Tabloyên Şerefnamê.....	26
Ev Tabloyên Han Karê Kê ne?.....	40
Tablo û Rîya Hunermendîya Hunermendê wan	45
Tabloya Yekem - Menzereke Nêçîrê li Hekarîyê.....	49
Tabloya Diduyan - Dagirkirina Kela Dêzê.....	52
Tabloya Sisiyan - Amediyê.....	56
Tabloya Çaran - Dibistanekê Nexweşxanê û Bizişkîyê li Amediyê.....	59
Dêmena Duduyan : Lîstika Qaşwanê.....	62
Tabloya Pêncan - Cizîra Botan û "Mem û Zîn".....	64
Tabloya Şeşan - Meclisa Mîrê Botan	70
Tabloya Heftan - Kela Hesenkêfê	72
Tabloya Heştan - Bajarê Hesenkêfê.....	73
Tabloya Nehan - Kela Egilê (Gêl).....	74
Tabloya Dehan - Cardin Egil.....	77
Tabloya Yanzdehan - Bajarê Hîzanê.....	79
Problemeke Avasazîyê.....	80

Tabloya Donzdehan - Hîzan.....	84
Tabloya Sêzdehan - Nexweşîya Demargirîyê (Esabî-Sinîr) Çareserkirina Wê Ya bi Dua.....	88
Tabloya Çardehan - Abloqa Kela Bedlîsê	
ji Aliyê Akko yunluyan ve.....	90
Tabloya Panzdehan - Meclisa Şerefşanê Bedlîsî.....	94
Tabloya Şanzdehan - Şah Tehmasb li Bajarê Xelatê.....	99
Tabloya Hevdehan (Beşa Yekem) - Sultan Osman.....	103
Tabloya Hevdehan - Beşa Diduyan.....	105
Tabloya Hejdehan - Şerê Edîrneyê.....	109
Tabloya Nozdehan - Sultan Mehmed Fatih û Stenbol....	111
Tabloya Bîstan - Şerê Çaldiranê.....	114
Perawêz.....	118

Daxuyaniya Weşanxanê

Ev pirtûk ji lêkolînека du beş a Abdulreqîb Yûsuf pêk tê. Beşê pêşîn ê lêkolînê di kovara Rewşenbîrî newe, hejmarên 116 û 117'an a sala 1988'an de hatiye girtin. Beşê duduyan ê lêkolînê berê nehatiye çapkiran. Wergera wê ya ji zaravê Soranî ji alî Elişêr hatiye kirin.

Nivîskarê lêkolînê bi xwe li hember awayê reş û spî yê tabloyan ev lêkolîn amade kiriye. Tabloyên rengîn ji alî weşanxana me ji Biblioteka Bodleian a Oxfordê hatine stendin.

Loma ji di hin ciyan de li ser binavkirina rengên tabloyan hin şasîti ji bal nivîskar hatine kirin. Me carna vê yekê di nav parantêzan de rast kiriye, lê hin caran ji me qet dest nedaye wan. Loma di tespîtkirina rengan de divê xwendevan tabloyan esas bigrin.

Jîna Nû

HUNERÊ TABLOYÊN ŞEREFNAMÊ

Mebesta me ew nîne, ku di vê nivîsê de behsa kitêba Şerefnamê bikin û bêjin; eva han, di sedsalên borî yên me de, girîngirîn berhem e di warê dîroka Kurdan de û heta niha ew hatiye wergerandin zimanê Tirkî, Erebî, Rûsi, Elmanî û Kurdi Lê, em dixwazin di vê maqalê de behsa wê nusxa Şerefnamê ya ku bi destxeta pîroz a Şerefxanê Bedlisi bi xwe hatiye nivîsandin û her weha wê wêne hunerîya ku di wê nusxê de ye, bikin. Armanca min a serekî bi destxistina vê nusxê, bû ku di Kitêbxana Bodleian a Oxfordê; di bin reqema 312'an de bû, bi taybetî wêne hunerîya ku tê de bû. Min wergirt, da em bikarin aliyê wê yê hunerî bikolin û heta hinek ali û milên taybetî yên hunerê Kurdi tê de bibînin û bikin kevirekî ji bo danîna hîmê nivîsandina dîroka hunerê Kurdi. Bi kemasî ev panzdeh sal in, ku ez li ser vê mijara hêja difikirîm, heta babetên wan wênen li Kurdistanê û di nav wan kitêbên bi destnivîsi de, yên ji aliyê hunermendên xelkê Kurdistanê ve hatine çêkirin, vêca êdî ci yên qîrnê navendî yan yên pişti wan bin. Ji ber vê yekê pêwîst e, heta wênen li ser kevir, dar û madenan jî hatine kolan, em bixine ber pençê lêkolînê. Encama van karan dikarin bibin pêkanîna hîmê hunerê Kurdi.

Me cara yekem li ser dîroka hunerê Kurdi, ev bîr û melhezên xwe berhev kirin û di kitêba xwe ya bi navê "Bangewazek Bo Ronakbiranê Kurd...Le Pênavî Kokirdnewe û Zindokirdneweyî Keleporî Netewayetîman de" çap kirin, bi awakî firehtir û di behseke taybetî de bi navnîşana "Hunerê Wênekêş û Dartaşînê Kurdi", di rûpel 102-122'an de, min behsa van babeten şaristanîyeta keleporê netewa me kiriye. Di kitêba "Hedaret el-Dewle'l-Dostkiye..", di cilda duyem a ku di sala 1975'an de çap bûyi, min behsa van hunermendan kiriye; wênê hunermend Mîhranê kurê Mensurê kurê Mîhran, hunermend û endazfiyarê mekanîkî Bedî'uzzeman kurê İsmailê Cizîri ku bi navê İbnu'l- Rizazî el- Cezerî(1) hatîye naskirin. Van herduyan di sedsala şesê koç (donzdeyê zayînî) de hunerên xwe li navça Dîyarbekrê xistine ber çav (İbnu'l-Rizaz, nêzîkî du salan ji sedsala heftan ji jiyaye), min ew wêne di nav kitêba sitêrnasî "Suretu'l Kewakib el- Semanîye We Erbe'în" a Ebu Hesen Ebdurrehman Bin 'Emeru'l-Sofi el-Rizazî, ku li bajare Mêrdînê hatine durust kirin, di havîna sala 1977'an de li Kitêbxana Silêmanîyê ya Stenbolê dîtin. Wênê Encîl Tifole Yeso'e ku li Floransayê ne, di sedsala sêzdehan de bijîşkekî xelkê Mêrdînê durust kirine. Di vê kitêbê de me bi çewtî Mîrê Bedlîsê Şemseddîn Bin Dîyaeddî-nu'l-Ruşkî, hunermend daye naskirin, ku di rastîya xwe de di wênêni kitêba bidestnivîs "Menafi'i el-Heywan" a Ebdulle İbn Bexîşo'yê bizişkê Dewleta Dostkî ya Kurdi dane, wênekêşê Kitêbxana Murgan li New Yorkê ew nîne, ji ber ku li ser kitêbê "bi resim Şemseddîn Bin Dîya el-Ruşkî" hatîye nivî-sandin û ji derveyê vê ketiye kitêbxanekî ya sedsala panzdehan, ku wî çaxî birek hunermend ji bo Sultan Mehmudê Xazanî yê Hulago wêne çêkirine.

Me di kitêba "Bangewazek..." di rûpela 102-103'an de behsa Mîhran û İbnu'l Rizazî kiriye; armanca me ji Mihemedê kurê Yusufê kurê Osmanê Hesenkêfi ew e, ku wênênu nusxa destnivîsi ya Topkapi yê di bin reqema 3472'an a di kitêba "el-Cami'e Beynî'l-İlm we Wel 'Emel Fî Sena'il Hil", İbnu'l Rizazî el-Cezerî çêkirîye. Eva han ji misalek din e di derheqê vê de, ku di eyñî wextî de dîroknivîsên hunerê İslâmê vêya hunerên İbnu'l Rizazî hesêb dikin. Ji ber ku Mihemedê kurê Yusuf,

wênen wî teqlid kirine û ez wisa dizanım şagirdên wî jî. Di wê wênen de, sê mirovên amîrê "el-Însan u'l 'Elli" û hinek ale-tên mekanîkî dîyar in, ku yek ji wan îcadkerên sen'etên mekanîkî Ibnu'l-Rizaz e(2). Her wiha hinek malumatên din jî li ser Muzafferê kurê Hiseynê Hesenkêfi hene, ku müsîqajen û hunermend bûye û heta niha nehatîye zanîn ka wênen wî yên destçêkirî li ku ne.

Diroknivîsên hunerê İslâmê dibêjin; di qirnê navîn de, li bakurê Mûsilê, yanî li Kurdistanê, dibistaneke hunerî hebûye. Di wênen Mîhran, Ibnu'l-Rizaz û yên hunermendên din ên wê navça Kurdistanê de, aliyê bingehekî taybetî yê hunerê têt dîtin û di eynî wextî de karê hunerî yê Helenîstê Bîzansîyan tê de dîyar e. Doktor Hesen Paşa vêya han wek "Şîweya Diyarbekrê" (Usluba Diyarbekrê-Alışêr) bi nav dike(3). Di kitêba "Bangewazek..." di rûpela 115'an de, me bal kişandiye ser vê noqtê, ku regezên hunerên dibistana wênekêşen Diyarbekrê ji aliyê dibistana wênekêşen Bexdayê ve hatine wergirtin û heta karêن hunerî yên Mîhran û Ibnu'l-Rizaz jî kîrine bingeh ji dibistanê van dawîyan re. Di eynî wextî de wek uslûbek gelemperi ya dibistana hunerîyê ya taybetî û ser-bixwe ya Kurdî heye û rewa nîne êdî di nav dibistana wênekêşen Bexdayê de bê bişâftin(helandin) û ciyê wan bigre. Nabe em vêya han jî ji bîr bikin, ku, Cizîr, Sêrt, Mêrdîn û çend ciyên din jî diketin ber navça Diyarbekrê ya wî çaxî. Vêca ji ber vê, ku dibistana wênekêşen Bexdayê li ser bingeha hunerê Herêma Cizîrê hatîye damezirandin, ku ji Diyarbekrê heta Musilê digirte nav xwe, û di dereca yekemîn de jî hunera Mîhran û Ibnu'l- Rizaz ji xwe re kirine bingeh, hinek kesan ji vê dibistanê re "Dibistana Wênekêşen el-Cezîre" gotine û bi navê "Bexdad", bi nav kirine. Wek Dr. Zeki Muhemmed Hesen di kovara Sumer, cilda 11, rûpel; 1'ê de ev yeka han gotîye. Ji bo vê mebesta han, min namek ji mamosteyên berêz Dr. Xalid el-Cadir û Şakir Hisnî re şand ku di vî warî de nêrînên xwe ji min re ronî bikin, lê, tenê bersîva Dr. Xalid di 25.10.1976-an de, ket destê min û tê de dibêje; ez ê di wextek din de bersîva te bidim. Ev kesên han ên ku navê wan derbaz dîbin, mamostêن hunerê ne.

Her wiha pêwistîya wênê nusxa bi destnivîs a Me'rifet-nama İbrahîm Heqqiyê Erzirumî, bi lêkolinê heye. Yek ji kitêbên destnivîs ên wênekêşê Kurdistanê di nusxa Üniversîta Bekir Efendi ya Musilê de ye, ku birek wênê wek Alema La-hut, 'Arş û Kursî, Alema Ewrah û Cennet, Cehennem, Rojgir-tin, Heyîvgirtin û yên tiştên wek van in (4).

Eger berhemên hunera Mîrê Kurd Evdalxanê kurê Dîyaed-dînê kurê Şerefyanê dîroknivîsê me, biketa destê me, eva han dê quncikekî din ê hunerê wênekêşen me yên Kurd xweştir bî-daya ronîkirin. Evdalxan, wênekêşekî Kurd tê hesibandin, ji ber ku xizmeteke wî ya hêja di wan wênan de hebûye. Ewlîya Çelebî, ku çardeh rojan bi mîvanî li ba Evdalxan maye û ji nê-zik behreke zêde berhemên wî dîtine, wiha dibêje: "Evdal-xan; wênekêş, xweşnivîs (xetat) û nexşkar (neqaş) e". Bêgu-man, Ewlîya Çelebiyê dostê Kurdan, wêne û tabloyênu ku bi de-stênu wî hatine çêkirin, dibîne. Gelek mixabin ew hemû kar û 76 kitêbên ji alîyê Evdalxan de hatî nivîsandin û li gel 105 na-mîn girîng, hemû wenda ne. Dûr nînê hemû hatibin îmha ki-rin. Di sala 1065'ê koçî (1654/1655'ê zayînî) de, ev saman, xezîne û kitêbxana Evdalxan tev ji alîyê Melik Ehmed Paşayê Waliyê Wanê ve têن talan kirin, ku bi hezaran kitê-bênu gelek hêja û giranbiha di nav de bûne. Hêjayî gotinê ye, ku Şerefyanê dîroknivîs ê mezîn bi xwe bingeha vê kitêbxanê daniye. Ewlîya Çelebî bi destê xwe lîsta wan kitêban girtîye. Gelek ji wan li ser warê pêşkeftina şaristanîyeta wî bajarı bûne û ji alîyê Evdalxanê bêhempa ve hatine nivîsandin, ku wî çaxî temenê wî heftê salî bûye. Ewlîya Çelebî di vî warî de wiha didomîne : "Xan, bi hefsed zanist, hunermend û husteyan ve, di warê felsefe, zanîna seyr û entîke de yekemînê zeman e. Di warê kîmya, sîmya û zanistîyên din de şareza ye. Bijîşkekî wisa ye, ku Calînûs û Boqrat(Hipokrat) li ber wî ne tiştîk in. Çavêن tarîbûyî emelîyat dike û bi mil ava reş jê dikêse û ronî dike. Min bi çavên xwe dîtiye çavên dûman emelîyat (neştergerî) kirîye û dûmana li ser hilaniye. Ev-dalxan, endazîyar e; şîmşîr (şûr), tîr û kevan durust dikir. Seetsazekî harîqulade ye; seetên rojane, mehane û salane li ser burcan bi zengil ji bo agahdarkirina wext durist kirîye û

heta di nav hingustila xwe de seeteke biçük çêkirîye. Di warê musîqe û kilaman de mirov nikare pesnê wî bide. Bi awakî wisa di nav herçar tepilan (deburqe) de rûdine û bi hev re li herçaran dixe, êdi mirov nikare pesnê hunermendîya wî bide. Wextê Sultan Murat têt Bedlîsê û bi vî awayî tepiledana Evdalxan dibîne, baca navça Muşê jê re dibexşîne. Colayîyê (berik, xalîce ûhw. çêkirin- Elişer) ji dizane; bermaleka bi destê xwe çêkirî pêşkêsi Melik Ehmet Paşa kir, ku tenê li Misrê û Isfehanê tiştên wiha dikarin bêñ çêkirin. Zînê hespekî ku gelek ecêb hatî neqîskirin durust dike û wek dîyari ji Sultan re dişîne" (5).

Kêm kesêñ harîkulade yên wek Evdalxan di dîrokê de hene. Şika min naçe ser tu cîyê ku berhemên zanistî û hunerên Evdalxan li wir hebin. Ne dûr e ku di şerê navbera wan û Melik Ehmed Paşa de îmha bûbin. Ez, ku di havîna sala 1977'an de, çûm Bedlîsê, min di vî warî de ji Adil Begê Şerefxan pirsî, ku ew miroveki rewşenbir û Kurdperwer bû û wî çaxî kitêbek li ser Bedlîsê dinivîsand, di vî warî de ji min re wiha got: "Qet tu berhemek wî dîyar nîne, min seh kirîye ku dibêjin dîwanek helbestên wî li Dîyarbekrê hebûye". Û bi vî awayî domand: "Nasnavê wî Adil bûye, lê, jê re Kejxan ji hatîye gotin, ji ber ku, li hemberê Dewleta Osmani seri hildaye û derketîye çîyan". Min jê daxwaz kir gora wî nişanî min bide, lê, ci heye wî got: "Gora wî li Bedlîsê nîne, ji ber ku Evdalxan li Stenbolê hatîye idam kirin". Piştî vegerîna min, Adil Beg di vî warî de namek ji min re şand ku tê de dibêje: "Evdalxan, di sala 1068-an de hatîye idam kirin". Vêca ez dibêjim; ne dûr e, ku Evdalxan li ber destê Şerefxan hînî wênekêşanê bûbe, ji ber ku wextê Şerefxan koça dawî kirîye, Evdalxan hevde salî bûye û di wan çaxan de zarokan çar salî hînê xwendinê dikirin. Bi taybetî eva han ji bo zarokekî wekî Evdalxan zîrek, gelek mantiqîtit e. Yanî em dikarin bêjin; di salêñ dawîya jîyana Şerefxan de çardeh sal xwendîye û ne dûr e Şerefxan bi xwe ders dabe wî. Eva han ji hêjayê gotinê ye, ku min namek şandîye ji bo birek kitêbxane û muzexanêne geleki bi nav û deng, ji bo peydakirina tiştekî ji kitêb, name yan wêneyeka bi destê Evdalxan hatî çêkirin, lê, heta niha min tu bersîv ji wan nes-

نهن سنت نهاده نهایی با که خانه پست اسپریز نهاده است
بادم این سپریز بود و همان کوکتکه را پس بخواهی کرد آنها، قلچش
مکن میزد و سایع سرمه را زده اند که ترقی دارد و آن خود را خالی کرده است
و همچنان که شاهزاده فیصل میگذرد و این سرمه فیصل میگذرد و شاهزاده
و همچنان که شاهزاده فیصل میگذرد و این سرمه فیصل میگذرد و شاهزاده
حسب گردانید و همچنان که شاهزاده فیصل میگذرد و این سرمه فیصل میگذرد و شاهزاده
حکم گردانید و همچنان که شاهزاده فیصل میگذرد و این سرمه فیصل میگذرد و شاهزاده

Destpêka Şerefnamê

tandîye.

Ev nusxa Şerefnamê ya bi destxet, ji alîyê Şerefxanê Bedlisî bi xwe ve hatîye nivîsandin. Ji ber ku di dawîya wê de ev go-tinên han hatine: "Weq'e tehrîreh we teshîheh 'ela yed muellifetu'l feqîr we musennîfetu'l heqîr -el muhtac îla reh-metî el-melîkî'l bâri Şeref bin Şemseddîn el-Ekaserî hafize-lullahu'l te'ala 'enzellatu'l qelem we hefattu'l rreqem fi selx Zîhecce sene 1500 min-el hîcretî nebewîyye (S.E.W.)" (Ev di dawîya meha Zilhecca sala 1500'an a piştî hicreta pêxember-rê mezin (S.E.W.) bi destê nivîskarê hejar û musennîfê feqîr ê muhtacê rehmeta Xwedê Şerefê kurê Şemseddînê Ekserî hatîye nivîsandin û teshîh kirin, Xwedê qelema wî ji şimutandin û şasîyan biparêze). Ev nusxa han gelek bi rêkûpêk û paqîj e, ji derveyî destpêka rûpela dûyem, ji serî heta binîya kitêbê qet tiştek jê neketîye; yanî mumkun e, ku rûpela ye-kemîn jî hebûye û navê kitêbê, nivîskarê wê yan hinek nivî-sandinên din ên wek van babetan li ser hatibe nivîsandin, lê, pişt re ketibe. Wekî çawan cilda wê ya ku di destpêkê de jê re hatî çêkirin nemaye û cilda niha jî wek ya Avrupayê ye. Di beşa serî ya rûpela dûyem de, di nav nexsekê de "*Şerefname Tarixê Kurdistan*" hatîye nivîsandin. Li gel ku ev nivîsına han têk çûye, lê, di şîwa destxetê de derdikeve ku nû ye û di çaxê nivîsandina vê nusxa Şerefnamê de nehatîye nivîsandin. Dûr jî nîne, eynî ev nivîsa han, yanî navê kitêbê, li ser rûpela yekemîn hatibe nivîsandin û her di vir de hatibe dubare kîrin.

Ev nusxa han ji 247 rûpelan pêk hatîye û herdu cildên Şeref-namê bi hevre ne. Bi zimanê Farisi hatîye nivîsandin. Beşa yekem 155 rûpel e û li ser dîroka Kurdan e. Mamoste Hejarê Mukriyanî kîriye Kurdi û di sala 1973'an de, ji aliyê Akademîya Zanyarî ya Kurd ve hatîye çapkîrin. Beşa dûyem ji rûpela 155'an destpê dike, ku bi wê rûpelê cilda yekem xelas dibe. Şerefxan, ev cilda han bi xatime nav kîriye. Di warê dîroka sultanên Dewleta Osmanî, paşayêن wî çaxî yêngî Iranê û yêngî Turanan de ye, ku hevçaxê wî bûne. Şerefxan, di navekê re li ba Sultan Mehmed Xanê kurê Sultan Muradê sêyem (1595-1603'yê zayıñî) maye. Vê cilda han li ser daxwaza wî

nivîsandîye ku ev yek di rûpela 155-156'an de jî xuya kirîye. Cilda dûyem, ji bûyerên sala 689'ê koçî (1290'ê zayînî) dest pê dike û heta digihîje bûyerekê ku di çaryeka dawîn a meha Rebi'u'l-ewwelê sala 1005'ê koçî de çêbûye (25-ê Teşrîna Yekem a sala 1596'ê zayînî), ku eva han tarîxa şerekî Mehmed Xan e; li gel Swêşriyan (rûpel; 246). Ev beşa han jî 316 (divê 92 rûpel be. -nota J. N.-) rûpelan pêk hatîye û behsa dîroka Dewleta Osmanî dike. Şerefxan bi xwe jî eva han di rûpela 156 û 246-an de gotîye. Ji ber vê yekê, ew yeka ku di rûpela 110'an a kitêba "Mêjû" ya Dr. Kemal Mezher de hatîye ku dibêje; "beşa diduyan ya şerefnamê ji bûyerên di navbera salên 1287-1587'ê zayînî (686-997'ê koçî) pêkhatîye", ne rast e

TARÎXA DAWÎ YA NIVÎSANDINA ŞEREFNAMÊ

Ew tarîxa ku di dawîya vê cildê de hatîye, 13'ê meha Tebaxê ya sala 1597'an (dawîya meha Zilheccce ya sala 1005'ê koçî) e. Ev tîne bîra mirov, ku ev tarîxa han dawîanîna nivîsandina her du cildên Şerefnamê jî be. Lîbelê, di rastîya xwe de wisa nîne; eva han xelas kirina tarîxa beşa yekem e, ne ya diduyan. Ji ber ku di rûpela 156'an de, ev tarîxa han kirîye tarîxa destpêkirina cilda duduyan. Eva han jî belga wê ye, ku cilda yekem di wê tarîxê de xelas kirîye. Ji ber vê yekê rêtzen dawîyê yêñ beşa yekem û yêñ destpêkê ya beşa duduyan di rûpelekê de, yanî herdu li pê hev nivîsandîne. Heta navnîşana cilda duduyan jî di dawîya beşa yekem di eynî rûpelê û di eynî rojê de -ku çarşemba dawîyê ya meha Zilhecceyê bûye- nivîsandîye.

1) Beşa yekem a Şerefnamê, ku di derheqê Kurdistanê de nivîsandîye, kirîye bingehîn û beşa diduyan jî, ku tenê tê de behsa Dewleta Osmanî kirîye, kirîye başa dawîyê ya kitêbê. Vêca ji ber vê yekê, tarîxa temamkirina beşa bingehîn (a yekem) di dawîya herdu besan de çap kirîye.

2) Ji ber vê, ev tarîxa han li gel eynî tarîxê, yanî tarîxa sala 1005'ê koçî - ku çendin car di beşa yekem de ducar kirîye, kirîye dîroka dawîya ya hinek desthilatên, mîrekîyên (ema-

ret, fermanrewati, mîrnişîn, mîrekftî-Eli-şêr.) Kurdan; wek Fermanrewatîya Finik, Hesenkêf, Egil û Erdelan. Lê, xwezî Şerefjan wiha nekiribûya û ji bo her beşeki tarîxa wan a taybetî nivîsandibûya, da ku me bizanibûya di kîjan tarîxê de dawî bi beşa diduyan anîye, ji ber ku bê tarix hiştîye (6).

Mebest ji tarîxa sala 1005'ê koçî, sala cara dawîyê ya paqîj nivîsandin û temambûna pêkanîna zanyarîyên Şerefnamê ye, ji ber ku, tu guman di wê de nîne, ku Şerefjan ji bo nivîsandina cilda yekem a kitêbê, gelek sal ji bo berhevkirina belgên wê xebitiye. Ez dikarim bêjîm, ku ji sedî hefteyêwan ji devê xelkê û yên mîrîn Kurdan wergirtîye. Eva han jî ci wextê ku li Bedlisê bûye û ci ji wextê ku li Iranê bûye, kirîye -bi taybetî ji wî wextê ku li Iranê di Koşka Şah Ismaîlê Duduyan de berpirsiyârîya kar û barê Fermanrewatîya Kurdan kirîye.- Di pêşgotina Şerefnamê û gelek ciyêñ din de behsa vê yekê dike, ku hinek ji wan zanyarîyên xwe yên di serokanîyên tarîxê de, nedîtiye, ji devê gelek kesan wergirtîye û bi hoyêwan hel û mercan, ku jê re imkan û zemîn çêbûye, bikare wan zanyarîyan kom bike û wan ji wendabûnê rizgar bike. Halê hazir niha em ji dikarin beşeke baş ji dîroka xwe bi wasita wan rîwayet û gotinêñ di nav xelkê de têñ gotin berhev bikin, ku piranîya mezin dîroka cîhanê bi wasita van hatîye nivîsandin, bini-visînin. Lê, bi yek mercê, ew ji hewce ye ku em di warê wergirtinan de durist û destpak bin. Li gor qeneeta min, wextê Şerefjan li Iranê bûye, melzeme û belgên Şerefnamê kom kîrine. Ci zanyarîyeke di derbarê fermanrewatîyên Kurdistanâ Iranê yên di serokanîyên tarîxê de tunebûne, evan ji devê mîrîn Kurdan yan yên xelkê wergirtine. Ji ber ku wextê vegeรiyaye Bedlisê, ji ber dûrbûna Kurdêñ wî milî, karekî wiha, bûye sebebê hêsanbûna amadekirina xebata wî ya di vî warî de.

DESTXETA NUSXAYÊ

Di vê nusxa destxet a Şerefnamê de, ku gelek bi pakî û rêk-pêkî hatîye nivîsandin, du destxet hene, ku herdu ji şîwexetêñ spehî (xweşik) ne. Xwedîyê destxeta yekem ji rûpela yekem heta nîvê rûpela heştan nivîsandîye, ev nusxa han bi vê dest-

Rûpela yekem a Şerefnama destnivîs

xetê destpê dike, lê di nav re jî nivîsandîye û bi ser hev xwedîyê 36 rûpelan e. Eva han wek mîsal di rûpelên; 10, 14, 32, 113, 117, 215 û 219'an de derdikevin. Qasê mayî yê kitêbê bi destxetek din hatîye nivîsandin. Di çend rûpelan de herdu destxet bi hev re têr dîtin, wek di rûpelên; 7, 10 û 32'an de, yanî her rêzek ji wan destxetan hatîye nivîsandin, ku ya yekem ji ya diduyan ciwantir e; her çendin ya diduyan jî ne xirab e. Wisa jê derdikeve ku ji bilî 36 rûpelan, ên din ku temamîya kitêbê pê hatîye nivîsandin, bi destxeta Şerefxan in.

Eger wiha nebûya nedihat nivîsandin "weqe'e tehrîre 'ela yed muellif" yanî; "bi destxeta nivîskar dawî bi nivîsandinê hat anîn". Ji ber ku ji bo nivîsandina wan 36 rûpelan gotinek wiha di dawîyê de nehatîye nivîsandin. Em nizanin xwedîyê destxeta sipehî ya yekem kî ye; navê kesekî din di nusxayê de nehatîye. Li vir eva han jî hewcâyê gotinê ye em bêjin; ku navê kitêbê di nav nexşekî jorê rûpela duduyan de bi vî awayî hatîye nivîsandin: "Şerefname Tarixê Kurdistan". Li ba min eva han ne destxeta Şerefxan û ne jî ya xwedîyê wan 36 rûpelan nivîsandî ye. Ne dûr e di wextê xwe de ev navê han li ser cilda kitêbê, yanî li ser rûpela yekemîn hatibe nivîsandin, vêca piştî Şerefxan, yekî din eynî navî di wî ciyî de nivîsandibe. Mîmkun e Şerefxan wî ciyî sipî hiştibe, eva han jî wekî hinek navnîşanên din in ku em ê pişt re behsa wan bikin.

NUSXA ŞEREFNAMÊ YA YEKEMÎN

Ev destnivîsa Şerefnamê ya ku em ê behsa wê bikin, nusxa nivîsandî ya yekemîn e. Dêsilên me jî ev xalên xwarê ne:

1) Şerefxan, tarîxa destpêkirina nivîsandina beşa diduyan a berhemê, kirîye tarîxa xelas kirina nivîsîna beşa yekem, wekî me di pêş de behs kir, herdu beş bi ser hev de nivîsandîne. Mana wê ew e, ku eva han yekemîn nusxa nivîsandî ye û berî vê qet tu nusxên din nehatine nivîsandin.

2) Dûr nîne ku Şerefxan pişt re hinek zanyarîyê din ên nû bi dest xistibe û li ser kitêbê zêde kiribe û di nusxên din ên vê kitêbê de nivîsandibe, yan jî dabe nivîsandin. Ji ber ku, ger em

vêya han li gel wê nusxa Şerefnamê ya ku li Qahîrê ji alîyê Fereculla Zekî Kurdi ve hatîye çapkîrin, muqayese bikin; em dibînin ku hinek guhertinê rêzan di wê nusxê de hatine, ku di vê nusxê de nînin. Wek mîsal; di rûpela 351'an a çapa Qahîrê de, di derheqê Mîrên Farqînê (Meyafarqîn) de nêzîki çardeh rêz hene ku di rûpela 96'an a destnivîsê de tune ne. Di rûpela 119'an a destnivîsê de, Şerefhan behsa medrese û mamosteyên bajarê Bedlîsê dike, lê, di vir de behsa Mele Ebdulayê Reş ne-kirîye. Ci heye, ku di çapa Qahîrê; di rûpela 456'an de behsa vî melayê ku navê wî derbaz dibe, tê kirin. Her wiha nasnavê "Bebî" yan "Bibî" û navê Mewlana Xidir di destnivîsê de ne-hatîye nivîsandin. Di behsa mamosteyekî bajarê Bedlîsê de, dibêje : "Mewlana Nûreddin Mihemed Siranîş" û gotina "Siranîş" bi "S" dest pê kirîye, lê, di çapa Qahîrê de hatîye nivîsandin; "Şemseddîn Mewlana Mihemed Şiranîş", yanî di şûna "Nûreddîn" de "Şemseddîn" nivîsandîye û ew jî xistîye pêşîya "Mewlana" û di şûna "Siranîş" de jî "Şiranîş" nivîsandîye. Di behsa mamosteyên Medresa Haci Begiye de dibêje: "Mewlana Mihemed Sofî" û navê medresê jî "Haciye" nivîsandîye. Lê, di çapa Qahîrê de bi vî awayî hatîye: "Medreseyê Hacî be Mewlana Mihemed Zerqîye Sofî mufewwez est". Ev cure ferqên han her çiqas hinek caran di warên nivîsandinan de peyda dibin, lêbelê, eva han zêdetir şik dibe ser wê ku nivîskar, yanî Şerefhan bi xwe kiribe. Bi taybeti ew çardeh rêzên ku me dan xuyakirin, her di wî wextî de bûne ku, yan nusxayê din nivîsandibe yan jî dabe nivîsandin.

Gelek nivîskaran itaetê van rê û prensibên han kirine û dikin, lê, aşkera ye ku hinek ji van ferqîtiyêñ han ji alîyê nivîskarî bi xwe ve jî peyda dibin û tê de çewtî jî çêdibe. Ev zêdekirinê çapa Qahîrê di sê nusxên destnivîs de yan hinekî di wan sê nusxên din de peyda kirine û xistine nav kitêbê. Hê-jayê gotinê ye, ku çapa Qahîrê pişta xwe bi wan hersê nusxayê Şerefnamê rast kirîye; yanî nusxa çapkîri ya Petersborgê û du nusxên din ên bi destnivîs(7). Nusxa çapkîri kirine bingeh, ew nivîsandinê bi feyde yên di herdu nusxên bi dest nivîsandî de hene, xistine nav bingeha naverokê û yên din jî di perawêzê

de çap kirine, wek eva han, Xwedê jê razî be, ji aliyê Mêhemed Eli Ewnî, di rûpela 5'an a çapa Qahîrê de hatfiye gotin. Nabe em vêya han jî jîbir bikin, ku çapkirina Şerefnamê li Qahîrê ji aliyê Ferecalla Zekî û Sureyya Bedirxan ve, xizmeteke hêja û mezin e.

Nusxa çapa Qahîrê, weke ku tê de tê xuyakirin, bi şêwa tê-kilkirin û lihevdana rîwayetan hatfiye duristkirin û çapkirin. Ev rîya han li gor prensibên lêkolîn û weşandinê destnivîsan şaş tê hesêbkirin. Ji ber ku, pêwist e ku baştîrin nusxe bikirana nusxa bingehîn û vêca ci ferqîti û zêdeyî yên di nusxên din de hebûna, wan di perawêzan de binivîsandina. Nabe ku mirov wan bixe nav naveroka nusxa bingehîn. Her ji ber vê sebebê ye, ku em nikarin bêjin kîjan ji wan her sê nusxên çapa Qahîrê, ku pişta xwe lê qayîm kirine ji vê nusxa destnivîsa Şerefhan baştîr û rêkûpêktir bûye. Di vê nusxa li ba me, ya destnivîs de, hinek îbare û tiştên zêde hene ku di ya çapa Qahîrê de nînin. Li gora nêrîna min ferqîti her di rêza yekem de heye. Ji ber vê yekê pêwist e carek din Şerefname bê kolan, pişti muqayesekirina nusxên din ên bi destnivîs, li ser bingeha vê nusxa ku nivîskar bi xwe nivîsandî, bê çapkirin û belavkirin. Hewce bû di wextê xwe de Akademîya Zanyarî ya Kurd, qîmeta vê nusxa destnivîs bizanibûya û bi dest bixistibûya û daxwaz ji Mamoste Hejarê Mukriyanî bikira û deqê vê nusxa nû wergerandibûya zimanê Kurdî. Yan jî qet nebûya, li gel çapa Qahîrê muqayese bihaîiya kirin, rêz, perçê û guherînê zêde di perawêzan de bihatibûna nivîsandin, ku karekî hem zanistîstir, hem baştîr û temamtir biketa ber dest. Em evan tevan deynin milekî, heta Akademî, rûpelek ji ji destnivîsına Şerefhan bi dest nexist, ku wek nimunek tê de bide çapkiranê. Hinek kesên endamên Akademîyê di pêşîya van tiştan de li ser hesabê Şerefhan û di rîya nav û dengê xwe belavkirinê de, wênen xwe, destxetên xwe û serpêhatiyê jîyana xwe di Şerefname Şerefhanê Bedlîsî de çap û belav kirin. Bi "is-rar"lêkirin, Mamoste Elaeeddîn Seccadî jî tûşî vê şâşîtyê kirin. Wekî min eva han bi xwe jê re got, hezar rehmet li gora wî be... Dîyar e, ku ev karê han ê Akademîyê ji programa lêkolîna zanistîyê dûr e...

Nimûneyek din ji destnivîsa Şerefnamê

3) Beşek ji navnîşanan, ger çiqas gelek zêde nînin, lê, di vê nusxa bi dest nivîsandî de nehatine nivîsandin û cîyên wan spî mane. Wekî navê hinek wan mîrên Kurdan, ku behsa jîyan û Fermanrewatiya wan hatîye nivîsandin. Lê, di navekê re di behsa wan de navê wan negotiye. Wek mîsal; Şerefyan di rûpela 96-an de, ji heft navnîşanan tenê yê Mîrên Tercilê (Hezro) nenivîsandîye. Wek navê 'Emer Beg Bin Hesen Beg û Budaq Beg Bin 'Emer Beg. Wisa dixuyê ku nivîskar, çaverîya peydakirina mirekeba sor, ku wî çaxî li balê qedîya be, yan mirekeba qelemê guhertibe, ji ber ku navnîşanen kitêbê gişk bi qelemeka mirekeba wê cuda û piranîya wan jî bi mirekeba sor nivîsandîye. Lê, piştre venegeŕiyaye ser; vêca êdî em nizanin, yan ji bîra wî çûye, yan mijûlê nusxayeka din bûye, yan jî mim-kun e vê nusxa han bi lez ji bo kesekî wek Sultan Mehmed Xan şandibe û li balê nemabe. Dûr nîne, ku nivîskar, vê nusxa han a bi qîmet nivîsandibe û pêşkêşî wî Sultanê navê wî derbazbûyî kiribe. Ji ber ku di pêşgotina beşa yekem de, navê wî anîye û beşa kitêbê ya diduyan li ser daxwaza wî nivîsandîye.

4) Ev nusxa han a Şerefnamê, ji alîyê birek tabloyên hunerî yêni sipehî ve hatîye xemlandin. Qîmetpêdana bi vî awayî, hizra mirov dibe ser wê yekê, ku eva han yekemîn nusxa bi destnivîs a Şerefnamê be. Hewcedarîya gotinê bi vê jî heye, wextê talankirina bi hezaran kitêbên Kutubxana Evdalxanê Bedlisi ji alîyê Melik Ehmed Paşayê Tirk ve, gerokê Tirk Ewlîya Çelebî di vê navê re nusxeke Şerefnamê dîtiye. Ewlîya Çelebî bi destê xwe lista wan kitêban girtîye û di vî warî de weha dibêje: "Hejmarekî gelek zêde kitêb anîne ber mezadê, ku ew yanzdeh sandeq bûn û di nav wan de kitêbên gelek hêja hebûn, ên wek Şahname, Gulistan û Şerefname. Lê, wextê çavên Dîyaeddînê kurê Evdalxan bi hêstiran (rondi-kan) tijî bû, Ehmed Paşa jê re got; ji bo ci bîhna te teng e?" Wi got; 'ev ezameta kitêban ên min in û piranîya wan muhra min li ser in". Ewlîya Çelebî dibêje; hinek ji wan bi xetên wî jî bûn. Qismek ji wan kitêban daye Dîyaeddîn(8), vêca em nizanin ev nusxa bi qîmet a Şerefnamê ev nusxa han a di destê me de ye, yan ne? Her wiha Şerefyan yekî herî bi nav û deng ê xweşnivîsê(xetatê) xetên Farisî hatîye hesibandin û navê wî

li gel navên xweşnivîsên mezin derbaz bûye, wekî Mîr Elî Tebrîzî, İmadedînê Hiseynî, Mihemmed Riza Tebrîzî û Hesen Şamilo... Lewra em dikarin bêjin, ku Ewlîya Çelebî tiştên nivîsandî yên bi destxetên Şerefhan dîtîne, vêca ci Şerefname be û ci tiştek din be.

TABLOYÊN ŞEREFNAMÊ

Di nav vê nusxa bi destnivîs a Şerefnamê de, çend tabloyên wêne yên bi dest çêkirî hene. Li gora nama Kutubxana Bodleian, ku ji min re şandine, 25 tablo tê de danîne. Lê, di rastîya xwe de 20 tablo ne. Ji ber ku ew tabloyen di warê Şerê Çaldiranê de û yên li ser Sultan Osman û Sultan Mehmed Fatîh û ya din jî (mebest ya çaran e-Alîşêr.) li ser şerê Osmaniyan ê bi Avrupîyan re, yanî li gel Bizansîyan, her yek ji wan tabloyek e û her çarê wan jî di beşê diduyan ê Şerefnamê de ne. Her yek ji wan du rûpel girtine û wek du tabloyan tê ber çavên mirov. Lê, mijara wan yek in. Tabloyen din cot li beran-barê yek û du ne û her yek ji wan li ser rûpeleke taybetî hatine durustkirin û di hêla babetên xwe de ji tabloyen din cihê ne. Tenê ew tabloya di warê Mîrektîya Tercilê de nebe -yanî eva han li ser keça paşayê Ertuqî ya nexweş e- ya din jî, ku li ser abluqakirina Kela Bedlîsê ye; ji aliyê Akkoyunluyan ve, her du beşen wê tabloyek e, ne dudu ne. Şanzdeh tablo di cilda yekemin a Şerefnamê de ne û çarên wê jî di cilda diduyan de. Piştî ku ev destnivisa han gehîste destê min, min nameyek ji kutubxanê re şand û min tê de di warê destnivîs û tabloyan de çend pirs ji wan kirin, lê, ne esl û bingehan û ne jî pîvanên temamê destnivîs û tabloyan ji bo min ronî nekîrin û min li ber rengê spî û reş ên tabloyan wêne girtin. Ji ber vê yekê min rengê tabloyan dîyar nekîriye.

Her tabloyek li gel mijara ku peywendî pê heye hatîye danîn û bi vî awayî di nav zincîra hejmara rûpelên kitêbê de hatine bicîkirin. Ji ber vê bi hêsanî têr naskirin. Di vê behsê de em ê gelek caran li ser tabloyan bisekinin; ji ber vê yekê ez baştır dizanim, ji bo wan lîstekê durist bikim.

<u>Tablo :</u>	<u>Rûpel :</u>	<u>Mijar:</u>
1-2	33	Fermanrewatiya Hekariyê
3-4	39	Fermanrewatiya Behdînan
5-6	43	Fermanrewatiya Botan
7-8	56	Fermanrewatiya Hesenkêfê
9-10	66	Fermanrewatiya Egilê
11-12	77	Fermanrewatiya Hîzanê
13	89	Fermanrewatiya Tercil (Hezro)
14	132	Abloqekirina Bedlisê ji Alîyê Akkoyun luyan ve.
15	145	Meclisa Mîr Şerefê Mîrê Bedlisê
16	145	Şah Tehmasb li Bajarê Xelatê
17	158	Sultanekî Osmaniyan ê kevin
18	173	Şerê Edirneyê
19	191	Sultan Mehmed Fatih
20	208	Şerê Caldiranê

Tablo, bi tevayı bi awayê hunerekî hêja û bi firçeke huner-mendî ya bikêrhatî, jiyan û adetên xelkê Kurdistanê nîşan di-din. Çi ji alîyê hunermendiyê ve û çi ji çend alîyên din ve em feydeke mezin jê werdigirin. Ji ber ku -wek em ê di vê behsê de bêxin ber çavan- evê han beşek ji jîyana civakî ya çarsed sal berî niha ya Kurdistanê ne û belgên bi qîmet in. Di van tabloyan de, em van cûre aletên musiqayê dibînin; dehol, zurne, bilûr, borezan (boq), tenbûr û def. Alet û edewatên cengê ji evê han in; xencer, sûr, necax (bivir), tîr û kevan, mertal ku du cure ne, tasklaw (xozt), tiving, top û kulekên barutê û kîsên gulan. Ji kel û pelên di nav malê de ji em van dibînin; tiştên raxistinê, kursî, tas, qab-qacax û gulavrêj. Ev tabloyen han, dişibhin bel-gên hunerî yên avayîsazî û terzêن xanî û avayîyên ku di wî çaxî de hebûne. Di vî warî de em van dibînin; xanî, kel, mizgeft, minare, medrese, dikan û bazar, babetên derîyan, kevan, gumbet, silindên serbanên xanîyan, pencere, riknên xanîyan, sekô (dik), derî û hesinê ser derî yên ku di şûna zîlên iro de têñ bikaranîn (teqelbab). Her wiha nexşen avayîsazkirinê yên

wek nexşên endazeyî û giyayê li ser derî, qerax û rûkarê xanîyan.

Tabloyen Şerefnamê, qîmetekî zêde bi cilûbergên Kurdî yên wî çaxî dide û di beşen xwe de jî cil-bergên Tirkên Osmanî, Ewrûpayî û Farisan jî nîşan dide. Wênekêşê tabloyan, cil-bergên Kurdî bi awakî giştî, bi ferqî ji yên Tirkan, Avrupîyan û Farisan wêne kêşandiye. Ji hêla kulav (serpêça serî ya wek kum-Elîşêr) û mîzera ser (şasik yan pêça li dor kilaw-Elîşêr.), di yê Avrupîyan de du cûre şewqe tê de dîyar in. Di yên Tirkên Selçukîyan de jî, terzek kulav qeraxê wê pan û ber bi jor de te-wandî û poxikek jî di nîvqeda serî de ye. (Li wêna behsa Tercilê binêre). Ez bawer dikim, ku niha jî ev kulavê han li ba Tirkên Yekîtiya Sovyet hene. Ji bo yên Osmanîyan jî fes û cure kulavekî wêne kirîye, ku bi derzîyê tê duristkirin û qeraxên wê ber bi jor ve pêçandî ne. Lê, wek yê pêşî pan nîne, ferq di navbera wan de heye û niha jî li Tirkîyê bi taybetî di nav gundiyan de peyda dibe. Herçî mîzera bi ser ve ye jî bi giloverî bi awakî lulekî yan bi nîv-lulekî çekirî ye. (Binêre; her-sê tabloyen pêş yênil cilda didulan ya behsa Sultan Mehmed Fatih, Şerê Edirneyê û tabloya hejmara 17 û 18-an jî). Yên wisa jî çekirine, ku nêzîkî mîzerên Kurdan in.

Ji derveyî ser-kulavan, cilûbergên mîrên Kurdan kewayê (wek palto ye, lê, hinek ji wî direjtir e-Elîşêr) bê mil, ku li ser kirâsen dirêj ên ji qumasen rengin ên guldar û bi awakî qîmet hatî duristkirin, li ber dikin, pişkokên wê dar in û milên wê ber bi jor de teng bûne. Hinek caran ewen bê mil ji bo mirovên din jî hatîne bikaranîn. Lê qîmeta van cilan li gor qumaş û dirûtinâ wan tê pivan. Eşkera ye ji bo mîran qîmettirîn û baştîrin qumaş tê bikaranîn.

Şêst sal piştî temambûna Şerefnamê, Ewlîya Çelebî di vî warî de eva han gotîye: "kewa û selte (di bejna xwe de hindî çakêt e, heta nîvê bedenê digire, bi ser kewa de tê lixwekirin-Elîşêr) cilên mirovên mezin yan ên paşa ne". Her wiha behsa eva han kirîye ku çawan Melik Ehmed Paşayê Tirk serwet û xezînen Evdalxanê Bedlîsî (kurê Diyaeddînê kurê Şerefhanê nivîskarê Şerefnamê, yanî, neviyê Şerefhan) talan kirine. Bi baran kitêb û tiştîn antîke anîne mezatxanê û ew jî li wir ha-

zir bûye. Komeke gelek mezin anîne, ku evê han ji dused sandoq barêñ devan pêkhatîne û beşek ji wan muhra Evdalxan û beşek din ji ya Xanim Sultana jina wî li ser bûye. Wextê ku sandoqa yekem vekirine, tiji kewa û selteyê hevrişim yên zêrdirûyên bi qîmet ên paşan bûne. Ew kesen hazir (yên hazir bûne, Melik Ehmed Paşa û mirovên wî yên mezin bûn) ku ev dîtin, bîn li wan çikiya û zendegirtî man(9). Cilbergêñ Mîrêñ Baban ji her wek van dirêj bûne. Weki yê Osman Paşayê kurê Ebdurrehman Paşayê Baban, ku xort bûye û rindtirîn cil-berg li xwe kirîye. Rich, di sala 1820'an de, li Silêmaniyê eva han dîtiye vê ji di Geştînama xwe, di rûpela 55'an de wiha nivîsandîye: "Kewa wî ji qumaşê Itali, pişkokên wê zér, kira-sê wî ji qumaşê sîmdarî yê Hindê, serpêça serê wî ji şalê berdarê Keşmîrê bûye, ku rişiyêñ pê ve ji sîmêñ zer ên wek zér bûne". Her wiha Rich, li ser Mîrêñ Behdînan ji van gotinan dibêje: "Cilûbergêñ wan sipehî ne û nêzîkî awayê cilêñ Musilê ne. Şalê Keşmîrê li derûdorê kulav û fesên xwe dipêçin, ku wextê diçin nêçîrê cilûbergêñ xelkê navçen çiyayî li xwe di-kin". Di vî warî de gotina xwe wiha didomîne :"Cilêñ efser û yên berdestêñ Mîr, bi fîstanêñ reş ên pişkok zér in, ku ji qumaşen 'ebayî û li Musilê têñ durustkirin. Şalwarêñ wan xet-darêñ bi xetêñ reng ïn in. Ev cilûbergêñ han li Amediyê û Cole-mîrgê bela ne"(10). Yanî cilêñ efser û xulamêñ Mîrêñ Hekariyê ji her bi vî awayî ne û li bajarê Colemîrgê belav in. Dîyar e, cilêñ bajarî li nav Amediyê û Colemîrgê, yanî li bajaran hebû-ye, lê, evêñ han li derveyî bajaran tunebûne. Ji ber ku cilêñ Kurdi yên kurt wek şal û şapik, şalwar û muradxanî di rewacê de bûne, ku ji bo jîyana gundîti û navçen çîyan musait bûne; evêñ han ne cilêñ bajara ne. Eva han ji ji gotinêñ Rich derdi-keve ku di vî warî de wiha dibêje: "Mîrê Behdînan wextê diçûn nêçîrê cilêñ xwe diguherandin û cilêñ xelkê navçen çîyan li xwe dikirin".

Hêjayê gotinê ye, ku wî çaxî, cilêñ Sultanêñ Osmanîyan wek ên mîrêñ Kurdan bûne, wek ên Sultan Selîm (binêre; tabloya hejmara 20'an) û yên Sultan Mehmed Fatih (binêre; tabloya hejmara 19'an). Ji bo wan mirovên ku ne mîr in, şarwal û mi-radxanî (di wênan de têñ xuyakirin), hatine bikaranîn(binêre;

tabloya hejmara 1 û 2'an). Sitarxanî jî li gel şalwar ji bo mirovan wêne kirîye. Ji bo vê, li tabloya hejmara yekem, milê rastê û xwarê wê li wî mirovê siwar û yê kulavqoç binêre. Sitarxanî jî her wek miradxanî ye. Ewênu ku wek bi pêşir, yanî; bi yaxa, wek miradxanî, piştîn li ser têr girêdan. Xelkê Silêmanîyê dibêjin; miradxanî û sitarxanî, ev herdu jî cilûbergên Kurdistanâ Iranê ne û li dor û berê sala 1928-an ji bajarê Seqiz û Bane anîne Kurdistanâ Iraqê. Carnan du rêz pişkokên ji dar çêkirî li ser pêşîra miradxanî hebûne. Di warêni cilûbergan de tiştek wiha belav e: "Dimoqrat", (ev navê han di dema Komara Demokratîk a Mahabadê ji bo rêzgirtina Partiya Demokrat a Kurdistanâ Iranê li vî cilê han hatîye danîn-Elşêr.) pêşîra wî wek ya kirâs e, di dema Komara Demokratîk a Mahabadê ya di bin desthilata Partiya Demokrat a Kurdistanâ Iranê de, ji wî milî hatîye nav navçen Soran, yanî; Kurdistanâ Iraqê.

Di tabloyen Şerefnamê de, kewayê bê mil û kirâsê dirêj jî ji bo mîran hatîye çêkirin. Eva han jî li ser kirâs, yanî; kirâsen kurt ên pişkokên wî zêde, ku li gel şalwar li xwe dikirin hatîye çêkirin. Eva han a dawîyê dişubhe kirâsen millî yên Lubnanîyan, ku em wan di hinek aheng û li ber stranê televîzyonê dibînin. Di tabloya 15'an de, bi vî awayî kirasek li mirovekî ye, ku ew li pişt Mîr Şeref sekinîye. Korteka bi reng a çoxe jî ji bo mîran hatîye wênekişandin.

Di nav Asurîyan de, ku di wêna tabloya diduyan de dîyar e, yek li ber Kela Dêzê ya navça Hekarîyan, serê kerê xwe dikêşe, şalwar û cilekî dirêj lê ye û piştînek li ser girêdaye, ku di awayê dirûna xwe de wek kortekê ye. Kirasekî dirêj ê spî di binî de li xwe kirîye û serê wê yê dawîyê bi ser ve anîye û kirîye ber piştîna xwe.

Kortekêن (kurtik, heşû) dirêj -carnan- ji qumaşan hatine duristikirin, berekê wî jî di ber de hebûye, ku pembo dikirin navê û sitûr dibû. Kitêlên dirûnên wê ji hev dûr û sitûr bûne. Kortek, cilekî zivistanê bûye, heta hinekî xwarê çokan dihat û pêşîyek jî jê re dihat çêkirin û bê pişkok bûye, di ciyê qapût de hatîye bikaranîn. Kepenek (ferencî) nebe, di ser hemû cilênen din de hatîye lixwekirin. Kortek, cilekî kevin ê Kurdewarî ye

û ne tenê di nav Asuriyan de, li hemû ciyêن din ên Kurdistanê hebûye. Şerefname, ku kortek ji bo Asuriyan çêkirîye, nayê wê manê ku bi piranî ewan li xwe kirine û nayê wê manê jî, ku evê han cilekî taybetî yê wan bûye û Kurdên Musilman ji xwe re ne ecibandine. Her çiqas min evê han li ba tek û matêن mirovêن salêن wan gelek pêş dîtîye, lê, niha ev kortekê han ê dirêj hatîye terkkirin û li ber wendabûnê ye. Kortekê Kek Şêx Ehmedê bapîrê (kalê) Şêx Mehmudê nemir, nimunekî yekane ye ji bo naskirina kortekê Kurdi yê di hêla cûre birîn û dirûtinê de. Ji ber ku temenê vî kortekî bi kemasî 102 sal dibe, ku Kek Şêx Ehmed di sala 1305'ê hicrî de koça dawîyê kirîye. Ev kortekê han heta niha jî maye, ku em ê di perawêzê de bi firehî behsa qiyasa wî bikin (11).

Li ser ser-kulav, yanî; kulav-dersokêن mêtren Kurdish, em çend wêneyan di tabloyêن Şerefnamê de dibînin. Wisa diyar e, ku çend cure serkulavêن mêtren hebûne. Dîroknivîsan di vî warî de wiha gotine: Serkulav, baştîrîn nîşana ji bo ji hev ciyêkirin û naskirina netewan û çin-tebeqên wê ne; vêca ci di awayê girêdanê û ci di yê cûre û rengêن qumaşen wan kulavan de be. Wek serkulavêن mirovêن mezin, ên mîran û yêن feqîr û gundiyan yan jî yêن zanayêن dînî. Hunermendan, di tabloyêن kevin de teferuatêن van ferqan dane nîşan, ku iro ji ber vê yekê karê dîroknivîsen hunerî yan ewêن ku lêkolînê li ser van cure tabloyan dikin, hêşantir bûye. Hem dikarin wênan nasbikin û hem jî dikarin wan kesen ku wênen wan hatine çêkirin, ji hev ciyê bikin. Hunermendê wênen Şerefnamê heta derecê itaetê van xalêن han kirîye û serkulavêن mîran (her çiqas hemû bi yek awayî nînin), zanyar û gundiyan weki hev û du nînin, bi ferq in. Lîbelê, yêن hemû taqim û desteyêن din ji hev cihê nekirîne, wek nimûne; serkulavê musîqejenan bi awakî taybetî çênekirîye. Car heye wek ê mîrekî ye û hinek car jî wek ên kesen din çêkirîye. Wisa diyar e, ku cilûbergêن van kesen han ên taybetî tunçbûne. Di gel vê jî, cilûbergêن wan sipehî bûne û eva han jî belga rêzlegirtin û dereca bilind a jîyanê ye.

Di tabloyan de cûre serkulavek heye ku mezin e û alîyek wî jî alîyê din mezintir e. Rîşî û poxikêن wî di herdu alîyên wî de hatine xwar, yan herdu serêن mêtzera wî bilind bûne, yanî bi

ser wî de hatîne tewandin û her yek ji alîyekî de wekî mêt-zera Mîrê Botan hatine xwarê (li tabloya hejmara 6'an binêre). Ev mêt-zera han ji bo musiqejanan jî bikaranîye, ku bi van awayên xwe, mêt-zer, bûye weke a mîr. Cûre mêt-zerek din jî tê xuyakirin, ku herdu serêni wî bi perçekî cuda, carek yan du car ji bo sipehitî yan ji bo qayîmkirinê ku nekeve, bi herdu alîyên perçê bi nîvê qevda mêt-zerê ve hafîye girêdan û dimîne wek gulingan (li tabloyen hejmara 1, 3 û 6'an binêre). Min di der-heqê vê perçê de gelek pirsî, lê, min tiştek bi dest nexist. Dûr nîne, ku eva han adeteki gelek kevin be û pişt re Kurdan dev jê berda be. Ewlîya Çelebî navê hinek rîşiyên mêt-zeran, yanî; serkulavan gotiye, ku hinek ji wan di nav eşyayên talankirî yên Evdalxanê Bedlisî de bûne(12). Tu bêjî gelo her evê han ew rîşî bin?.. Di hinek navan re û car-caran perrekî teyran jî xistîye ber mêt-zerê (li tabloya hejmara 6, 11 û 15'an binêre). Ev wênê han vê yekê eşkera dikan, ku di nav Kurdan de xistina perrên teyran ber serkulavan, ca êdî çiqas kêm jî be, hêjayê wênekêşanê bûye. Ewlîya Çelebî di cilda 4'an; di rûpela 208'an a Seyahetnama xwe de , wiha dibêje: "Kurdên Hekarî-yê du perrên teyran ên rengîn dikan ber serkulavên xwe, gelek ji wan bi kîrê guhêñ xwe kun dikan û perrekî teyrê baz û yan yê dîk tê re dikan".

Ev adetê han hîn di nav Asurîyan de maye, bi taybetî di şahîyan de perrê teyran dixin ber kulavên xwe. Her wiha jî-nêñ eşireta Birukîyan ên der-dorêñ Wanê, perrên mirîşkan ren-ga reng dikan û dikan ber kulavên xwe. Heta ev adeta han di navça Silêmanîyê de jî di nav kit û mat jinan de -ne di nav mêt-zeran de- maye û niha jî perrêndik yên xaleta Qumriya Ezîzê Ja-jaleyî hene û ew di wî warî de wiha dibêje: "Di hinek rojêñ xweşîyê de ez dikim ber laçika xwe", û bi vî awayî gotina xwe didomîne: "Di wextê dayîka min de, ev adeta han bi taybetî di nav jinêñ xanedanan yên wek Adile Xanîma jîna Osman Paşayê Cafan de, bi rewaç bû û jinan perrên mirîşkan, yan ên teyran di milê rastê yên laçikên xwe de wek gulingan ber di-dan, ji bo ku di nav cemaet û daniştiwanan de bêñ naskirin ku xanedan in". Di nav çend netewên din de jî tiştên wiha hebûne û serokên wan itaefî vê adetê kirine.

Carna jî paşayekî bixwesta, yek bi xelat bikira, perrekî teyran dikir ber serkulavê wî. Wekî çawan Melik Ehmed Paşa perrekî kirîye ber serkulavê Remezan Axayê mirovê Mîstefa Paşayê Waliyê Diyarbekrê, ku wî şandibû jî bo pîrozbahîya serkevtina wî ya li hember Evdalxanê Bedlîsî. Ewliya Çelebî, di Seyahetnama xwe ya cilda 4'an; rûpela 273'an de, behsa vê bûyera han kirîye. Berêz kak Ebdurrehmanê Muzûrî di nama xwe de, ew kesên di vî warî de pîrsîyar ji wan kirîye (min navê van kesan di behsa guh de nivîsandîye) wiha dibêjin: Nema zanîne Kurdên Behdînan, yan Kurdên navçen Kurdistana Bakur, wek adetek perrêن teyran dikin ber serkulavêن xwe, lê, gul, beybûn, tevrî û nêrgiz... û gîyayêن bîhnxwêş dikin ber ser-kulav yan ber piştîniyêن (şotik, çar-car) xwe. Wek niha jî li gundê Bamernê adet e, lê, hindekan gotine; şivanêن navçen Hekarîyan ji bo paqîkirina bilûrêن xwe perrêن teyran dikirin ber serkulavêن xwe, û her wiha nêçîrvanan jî. Lê, wextê ji nêçîrê vedigerîyan mala xwe, diavêtin. Wisa dixuyê paşvemaya vê adetê ye, ku di wextê Şerefşan de li Kurdistanê hebûye û ev adeta han di tabloyêن Şerefnamê de ji bo me hatîye parastin.

Di tabloya hejmara 11'an de, baxvanekî xelkê Hîzanê mijû-lî kolana baxekî ye, kulavekî biçûk ji qumaş yan mîzereke gelek tenik û sivik li serê wî ye. Ji vir ji derdikeve ku mimkun e ev ser-kulavêن han an ên karkirinê bin yan jî yên van cure rîncberîyê bin.

Kilawqoç: Di dawîya milê rastê; di tabloya hejmara yekem de, siwarek bi şalwar û muradxanî li xwe kirî, hatîye çêkirin û kulavekî dirêj û qoçî li ser e û mîzerek jî li der-dora wî hatîye pêçandin. Ev manzara han di tabloya hejmara 9'an de jî heye. Li navçen Soran ji van curên kulavan re kilawqoç tê gotin; ji qumaş dihat durustkirin û heta van salêن han jî li navçen Pîşder û Mengûr belav bû.

Mişkî (tiştekî wek destmal yan kefiya tenik e, lê, di hêla qumaşê xwe de biqîmettir e-Elişêr) li ber girêdidan. Di dema Dewleta Ebbasîyan de, ev curê kulavêن han li Îraqê belav bûne û car-caran jî hinek xelîfêن vê dewletê; yên wek Mute-

wekkilê kurê Harun Reşîd (847-861'ê zayînî) û Ebu Qasim Eb-dulla el-Mustekfî (944-946'ê zayînî) bikar anîne û jê re "temîl" (13) gotine, ku nêzîkî du bihostan dirêj bûye. Niha jî Kurdên Ezidi yên Şengalê ji van kulavên dirêj didin serê xwe û di şûna qumaş de ji livayê çêdikin û hinek şîşen têl jî dikin navê ku qît û hişk bisekine. Li Botan jî eynî kulavên wek ên Ezidîyan hebûne, lê wek wan mezin û qayîm nebûne. Dûr nîne ku ser-kulavê Mîrê Botan ê di tabloya hejmara 6'an de, û yê musiqejenekî jî ya di eynî tabloyê de, her kulavqoç bin.

Ji derveyî van, serpêcê jinan jî, ku di tabloyên hejmara 12 û 13'an de hene, serpoşiyekî spî ye, li gel destmalekê ye ku li ser serpoşiyê hatîye girêdan. Eva han sade û ya jinêñ re'yan bûye. Niha jî di gelek navçen Kurdistanâ Tirkîyê de ev babet serpêçen han têñ bikaranîn. Dûr nîne, ku di wî çaxî de eva han ji alîyê jinêñ karker û feqîran ve hatibe bikaranîn, ji ber ku di tabloya hejmara 9'an de, jina Mîrê Egilê û du jinêñ din ser-kulavê mezin li serê wan in. Di tabloya hejmara 12'an de, ku di derbarê Hîzanê de ye, li milê destê rastê û di dawîya tabloyê de, qismek ji ser û rûyê jinekê diyar e, ku ser-kulavekî mezin ê jinan li serê wê ye. Di tabloya hejmara 15'an de jî, Şahbegê Xatun, ser-kulavekî mezin li serê wê ye û her wiha kira-sekî bê mil ê dirêj jî lê ye. Carnan li piraniya navçen Kurdistanê, şûnwarêñ germ ên pişt çiyayê Zagros, Toros û ji Deşta Entabê, Kilîs û Sirucê bigre heta Şengal, Kerkûk, Kifrê, Xaneqîn û heta navça Loristanê jî, jinêñ bimêr ên Kurdan vî ser-kulavê han didan serê xwe. Heta ez eva han jî dizanim, ku jinêñ Eşireta Berazîyan a Mezin, ku beşekî mezin jî wan li Kurdistanâ Surîyê ne, her çiqas navçen ew tê de dijin germin be û nêzîkî rûbara Firatê jî be, heta demek berî niha jî van babet kulavên han hebûn.

Serkulavêñ jinan (jinêñ bimêr, ji ber ku keç-qîz serkulavan nadîn serê xwe), ji tas (tasa kulav-taskilaw) -ku ji zêr, zîv yan xişrekî din tê durust kirin- kulav, yan ji çoxê fesên reş, yan jî ji qumaşekî din e, destmala li ber enî bi gulinge ye, yan wek ên li ser egalê têñ girêdan, yan jî poşî ye yan jî qumaşekî din ê wek cawekî spî ye, li ser kulav tê girêdan. Piştre jî enîpêç bi ser vê re tê girêdan, ku li Germîyan (mebest Kurdistanâ Iraqê

ye-Elişêr) jê re **hewrê** dibêjin û di eslê xwe de mendilek e. Li Silêmanîyê jî jê re **serkeyî** yan **Qenewz** tê gotin, ku ji qumaşê çar reng; sor, zer, şîn û pembe pêk tê û bi hev ve tê dirûtin û li ber eniyê û ji alîyê piştê ve jî wek hewrê têt girêdan. Eva han li navçen Bakura Zê ya Biçûk û Xoşnawetîyê jî heye. Jinên navça Xoşnawetîyê kefî(serkeyî) jî li ser zêde dîkin û hemûyan bi hev re bi ser kulav re girêdidin, yanî di ber enîya xwe re. Her wiha qenewz jî girê didin. Jin, çaroke (kefî ya egala ku jin davêjin ser milên xwe. Elişêr) jî dîkin ser ser-kulavên xwe û bi heleqekê, yan bi senceqekê pê ve qayîm dîkin. Wek çaroke-yêni bi nexşîn jî hene û evêni han jî ji bo jinan ji qumaşen reş, bi hevrîsmen şîn û bi wênên hîv û gulan tên nexişandin. Li çend bajaran wek Koyê (Koysenceq) çarokên bi nexşîn gelek rewaç bûne û dirêjahîya wan sê mêtre bûye, lê, li gündan hîn ji vê jî mezintir bûye. Hinek jî hebûn, xişrên zêr, zîv yan xişrên bi madenên din di ber serkulavên xwe re girê didan, ku eva han ji zincîrekê yan ji du-sê zincîran pêk dihat û çend gulan ji bi wê zincîrê ve dîkin. Vêca di vir de zêr yan pereyekî din, yan zîv û xişrekî din, yan jî pulên wê bi wê zincîrê ve dialiqînin û bi ser serkulavê ve qayîm dîkin. Li navça Silêmanîyê ji zincîra pişta ser re; pişteser û ya tenişte re **lagîre** û ya nav çavan, yanî; ya pêşîya ser re jî **berçawge** dibêjin. **Kirmoke** (kirmok) jî zêr, zîv yan mûri pê ve ne û bi serkulav ve tên qayîmkirin û dikevin bin çenê. **Perwane**(perperok) jî wek kirmoke ye, lê, ji zêr tê durustkirin. **Serperçem** ji hemûyan sipehitir e, ji zêr tê çêkirin, du rêzên wê dikevin ser serkulavê û rêza sisîyan jî ji bo bi bin çenê ve bê girêdan ber bi jér ve têt. Koçerên Ako, Bolî û Mentik jî vê bikartînin. **Koçk**, kulavekî wek kîs e, di nav eşiretên Koyê, Ranye û Pişder de heye. Eva han ji wek yên jinên Bilbas, Ako, koçerên Bolî û Mentikişê ne. **Kodiçk** (kefiya li serê zarokan têt girêdan-Elişêr.) kulavekî wek kîs e, ji qumaşê spî ye, jin jî xwe pê dixemilînin û destmalên spî didin serê xwe (**srike**) li ser dipêçin, ku eva han cûre kefiyek İranî ye. Heleqên wan jî ji zîv, yan ji zêr in û bi cêñikan ve tên qayîmkirin.

Jinên Eşîreta Birukîyan ên navça Wanê, ku ew berî Şerê Cihanê yê Yekem li Qafqasyayê bûn, bi kûffî ne. Qasî ku ez dizanim, kulavên wan ji çoxê ye û çend kefiyên (desre) renga

reng ên biriqandî li der-dora wî girê didin, çend textan jî dikan ber kulavên xwe û di ser wî re jî kefiyan dipêçin, ku rast û qît bisekine. Perrên kurt ên teyran jî renga reng dikin, dixin ber ku-lavên xwe. Şeş-heft fistanêng rengin jî bi ser hev de li xwe dikin. Bi rastî heta niha min qet di tu navçen Kurdistanê de, wek ser-kulav û cilûbergên jinêng Birukîyan nedîtîne. Gerokê Tirk Ewlîya Çelebî, ku piştî şest sal temambûna Şerefnamê hatîye navça Dîyarbekir, Wan û Bedlîsê, di vî warî de wiha dibêje : "Zincîrên tas-kulavên jinêng Dîyarbekrê zér û zîv in. Cizme werdigirin û xişrên wan jî her zér û zîv in"(4).

Divê em vêya han jî bêjin, ku di wênêng Şerefnamê de tas-kulavên jinan sade ne û xişir pê ve nînin. Her wiha xişran ji bo zendên jinan jî çenekirine. Li gel vê jî, ev wênêng han serwetine giring ên keleporê şaristanîyeta Kurdan in û şêweyên çarsed sal berê niha yên taskulavên jinêng Kurdan didin pêşandan û ev wênêng han belgename ne ji bo hinek têbînî û jîyana civakî ya xelkê Kurdistanê.

Nabe em vêya han jî jibîr bikin, ku cilûberg, di dirêjahiya pêvajoya zeman de, di nav hinek guhertinan re derbaz dibin. Wek nimûne, cilûbergên Asûrîyan li gora kêşana qelema Rich, ku di rûpela 196'ê kitêba wî ya Geştinama (Seyahetname) Rîch de hatîye belav kirin -ev gera xwe di sala 1820'ê zayînî de pêkanîye- ji wan cilûbergên ku di tabloya hejmara 2'an a Şerefnamê de hatîye kêşandin, cuda ne. Awayê van herdu şê-we cilên han dirêj in û namînin bi wan cilûbergên ku Wigram di dawîya sedsala 19'an de, bi wênêng fotoxraf kêşandinê pêşan dide û ku evan jî di kitêba xwe ya bi navê Mehdu'l Beşerîyye el-Şerqîyye de çap kirine. Ev cilên harî, şal, şapik û kulavên jî livaya berxan in û dimînin bi cilên Kurdên Behdînan. Dûr nîne, ku di wextê Rich û Wigram de, ev herdu şîwe cilên han wek cil-bergên kesên dewlemend û yên rênberan bin. Carnan li navçen Silêmanîyê û bi taybetî di nav Cafan de, cilûbergên dirêj gelek belav bûne. Eva han ji yên xelkê navça Germîyan bigre heta yên Mendelê jî hîn dirêtir bûne. Çi heye, ku piştî salên 1960-1961'an, xelkêng Germîyan, li gel pêşveçûn û belavbûna hestê Kurdayetî, berê xwe dan poşî ('egal), şarwal û miradxanî li xwe kirin. Niha, di nav wan de, zêdetirîn ev

cilûbergên nû têñ li xwe kirin. Her çiqas cil-bergên dirêj ji bo navçen Germîyan hîn baştir ji bin. Di navçen Ciwanrûyê de ji begzade, cilûbergên dirêj li xwe dikin, ji ber ku evêñ han wek nişanên mirovên maqûl in.

Bêguman, wênên Şerefnamê, cilûbergên wê demê dixin ber çavan.

XELEKÊN GUHAN (GUHAR)

Di tabloyan de, guhar, yanî xelekeke meylê pan di guhêñ piranîya mêtîn Kurdan de heye, lê, di guhêñ mirovêñ Tirk, Faris û Avrupîyan de nehatîye çêkirin. Vê dêmëna (menzera) han gelek bala min kêşand. Ez gelek li ser sekînîm û min ji gelek kesan ji pirsî. Ji ber ku min sehnekirîye û di tu serokanîyekê de ji ez lê rast nehatime, ku mêtîn Kurdan bi awakî adetî guhar kiribin guhêñ xwe. Min dikir, ku ez bêjim; hunermendê tabloyan vî karê han ji ber xwe ve çêkirîye û rasîyek ji vê re tune. Lê, dema min di Seyahetnama Ewliya Çelebî di rûpela 209'an de, dît, ku nivîskar di warê Fermanrewatiya Hekarîyê de dibêje: "Piranîya mêtîn Hekarîyê guhar di guhêñ wan de hene" (15), qeneeta min a di vî warî de guherî. Diyar e, Ewliya Çelebî bi hezaran Kurdê Hekarîyê ditine. Ji derveyê vê êdî di tu cihê dinê berhema xwe de behsa vê meselê nekirîye. Mimkun e, ku guhar li navçen din ji hebûne, lê, ne radeyek wek a Hekarîyê. Yan ne dûr e, ku di wextê xwe de guhar di hemû navçen Kurdistanê yên din de ji bi gelempêri hebe û Hekarî ji yek ji wan be, yan ji hunermend, zaniye di pêş de guhar di nav Kurdan de belav bûye û ji ber vê ji di tabloyen xwe de wênên wan kêşaye. Ji derveyî van tevan, mirov dikare wiha ji bifikire; wî wextî heta dema Ewliya Çelebî şest sal di ser re derbaz bûye û mimkun e, ku di vê navê re, Kurdan dev ji vê adetê berdabin, yan ji di nav wan de gelek kêm mabe. Niha li Hekarîyê ji rêça guharê nemaye. Li gora vê, hunermend bi awakî rasteqînî û waqi'i van wênên han kêşane, evêñ han belgên durust in di warê van cure adetên civakî de. Ne tenê eva han, dibe ev adetên han fro bibin xewn ji, lê, bi cûrek din heta van salêñ dawîyê ji mabûn. Li navçen Silêmanîyê û ya Hew-

lêr, ew kurên di mal de yekane bûn, ji ber zêde ezîziya wî, guhar dikirin guhê wî, heta kal dibû her di guhê wî de dima. Ne dûr e, hinek ji van pîremêran mabin, heta niha jî guhar di guhêwan de hebin. Kak Şirut Enwer, ku hunermendekî wêne-kêş e, xelkê Silêmaniyê ye û temenê wî 33 sal e, guharêñ wî di guhêñ wî de bûn û dibêje; "niha jî guharêñ min ên zêr mane".

Wiha belav e û têt zanîn jî, ku hinek netewên Rojhilata Navîn guhar dixistin guhê ebdêñ xwe. Ev adetê han ji berî heta niha jî, hîn di nav hinekan de maye.

Van dawîyan, min doz ji nivîskarê berêz Seyda Ebdurrehmanê Mizûrî kir, ku di vî warî de pirsîyar ji pîremêren Behdînan bike. Ewî jî xwe aciz kirîye û di vê xususê de ew kesen şarezatîya wan li ser navçen Hekarîyan û Behdînan hene, pirsîyar kirîye. Ew kesen Seyda pirsîyarê ji wan kirîye ev in; Mele Qasimê Simahîlê Cangîrî, temenê wî 86 sal e, 'Emerê Elî Salih 87 salî. Ev herdu kesen han ji qebîla (tîra) Mehmedîyan a eşîreta mezin a Ertûşîyan in. Hacî İbrahîm Ebîzidê Ertuşî 81 salî, stranbêj (dengbêj) Mecîdê Seîdê İsayî 81 salî, ji qebîla Heyderan a Eşîreta Ertûşîyan e û beytên wek Xanê Dimdim, Hespê Reş, Woste û Ferxo jiber e. Şêx Qasim Şêx Ebdurrehmanê Mihemmed Emin Biskê 101 salî û berêz Mele Osmanê Giravî. Li gora axaftina van berêzan, Kurdan guharêñ zîv, carnan jî zêr dixistin guhêñ xwe û hinek ji wan bi morî jî bûne. Şêx Osman, ku ji tevan mezintir e û ji hemûyan zêdetir ji li navçen Kurdistanê gerîyaye, dibêje; "bi bîra min tê, ku pîranîya guharêñ mîran morî pê ve bûn". Her wiha vêya han ji dibêje; "bi taybetî ew malên dewlemend ên maqûl yan ên di mal de keçen wan hebûn û kurên wan yekane bûn, xelek yan guharan dixistin guhêñ kurên xwe û heta jin dianî di guhê wî de dima, lê, piştî jinanînê, ger hezbikira êdî nedikir guhêñ xwe. Niha jî li Behdînan hinek pîremêr hene, guhêñ wan kun in".

Birayê zana Mele Osmanê Giravî, li ser bawerîya guharkirina guh wiha dibêje; "li gora bawerîya Kurdan wiha bû; ger guhar bêxin guhêñ kurê xwe, êdî jinêñ cinan nikarin kurên wan veguherînin, ji ber ku 'cin ji hesin ditirsin'".

TEMERÎ

Di çend wênen Şerefnamê de, qevdek por li pişt guhê mirovan hene, lê, ne wek ên Ezîdîyan dirêj in û nakevin ser milên wan. Ji vê qevda por(pirç, çepk) re temerî tê gotin. Di tabloya hejmara 11'an de, ku li ser Hîzanê ye, dikandarekî xort, temerîya wi heye. Ne dûr e, ew mirovê bi temen li hespê siyar-bûyi, Mîrê Hîzanê be û temerîya wî hebe.

Di tabloya hejmara 7 û 8'an de, du xort li ser Kela Hesenkêfê û li pişt mizgeftekê hene. Temerîya wan heye. Ne dûr e Mîrê Amêdiyê yê di tabloya hejmara 3'an de ji temerîya wî hebe. Li Kurdistana Bakur , ew por bi herdu teniştên serî ve dimînin û nayêñ kurtkirin, jê re temerî tê gotin, ji porê ku bi cênişan ve ji dimîne, zulf dibejin. Eynî wextî herduyañ bi hev re ji bi nav dikin û ji vê re ji zulf-temerî tê gotin û ji bo rindkirin û si-pehikirina mîr, zarok û xortan bi awakî adetê bab-kalan tê bikaranîn. Lê, ew porê di nav çav de tê berdan, jê re gulî yan kakul tê gotin. Heta van dewrêñ dawîyê ji li nav çend navçen Kurdistanê, wek Botan, kurêñ temenêñ wan heta dora 15 salan û tek-tukêñ xortan ji zulf û temerîyêñ wan hebûn. Her wiha serê xwe bi cuzan û makînan kur dikirin, der-dorêñ wî, yanî gulî, zulf û temerîyêñ xwe dihiştin û evêñ han ji di bin kim (kum) an kefiyeke liva de derdiketin, ku zêde dirêj nebûn. Lê, gulî, ji herduyañ din dirêjtir bûn. Zulf û temerî ji bo sipehîtî û xweşikiyê dihiştin. Awakî din ên kurkirinê ji hebû, ku her çarmedorê serê xwe jêdikirin û di nîvê serê xwe de qevdek por dihiştin. Ez wisa dizanim, hîn tek-tûk ji be, di nav Ezîdîyan de eva han maye.

Wênen Şerefnamê, belgên wê ne, ku xort û mirovên salêñ wan pêş de ji di qirna 16'an de, temerî hiştine. Ev gotina han a pêşîyan; "filan xort bi zulf û temerî ye!", dide nîşandan, ku sedsalek piştî vê yan berî vê, ev adeta han di nav xortêñ bîst salî û heta yên ji wan mezintir de ji belav bûye. Ji vir şûn de êdî hêdî ber bi kembûnê de çûye û hatîye heta ser zaro-kêñ 10-12 salî û vêca ji vir şûn de ji ber bi nemanê de çûye.

Ewlîya Çelebî di rûpela 171'ê Seyahetnama xwe de dibêje: "Begêñ Kurdêñ Şêrwan, Sêrt, Hîzan, Karnî, Zirîfî û Kêsan, ji

bo êrîş û jinavbirina Evdalxanê Bedlîsî alîkarî û piştgirîya Walîyê Wanê Melik Ehmed Paşa nekirin. Lê, wextê şer temam bû, hatin bâ Paşa û wî jî ji ber xeyda xwe tevan da girtin. Kesê yekemîn ku anîne ba Paşa, Begê Şêrwanê kurê Tatar (Teter) bû. Paşa jê re got; "ev çelebiyekî bi rî û zulf e, wek jinan e, Xan Evdalxan rî û porê wî jê re hiştîye û ji ber xatirê Xan nehatîye alîkarîye bide me". Ev gotinên Ewlîya Çelebî belgên wê ne, ku ne tenê zulf, temerî jî di nav Kurdan de, yan jî di hînek navçen Kurdistanê de, wek navçen Şêrwan -ku navê xelkê wê bi azayetî belav bûye û ji milekî de dikeve navbera Sêrt û Hîzanê, jî milê din de jî dikeve navbera Botan û Ruşkî (yanî Bedlîs)- belav bûye. Ev Begê Şêrwanê mîrên xas bûn, alîkarîya Paşayê Osmaniyan nekirin. Evê han wek Mîrên Hekarîyê û Mehmudîyan ne qels û necamêr bûn, ku alîkarîya wî Paşayê zordar kirin û şaristanîyeta Bedlîsê ji holê rakirin, ku Ewlîya Çelebî gelek baş menzere û rûyêñ wî derêxistîye holê. Wisa dixuyê Mîrê Hîzanê jî wek yê Şêrwan temerîya wî hebûye.

Hêjayî gotinê ye, berî İslamiyetê, temerî di nav xortêñ gundiyyêñ Kurdistanê de belav bûye. Di nav Kurdêñ navçen Rojhilata Rûbarê Dîclê yên gundan de jî berbelav bûye. Vêca êdî ez nizanim, ev adeta han ji wir ketîye nav Kurdan, an berî wê jî hebûye.

Quçî taş, bi eksê zulf û temerîyê, ku eva han li navçen Soran û heta Sine, bi taybetî di nav derwêş û kesên ehlê tesewwufê de heye, qeraxêñ serê xwe bi cuzan kurdikin baqêñ serê xwe kurnakin û pora xwe hinek dirêj dikin, bi piranî ji vê serkirkirinê re qoçî taş (qoçîtraş) dibêjin.

EV TABLOYÊN HAN KARÊ KÊ NE?

Di vê nusxa Şerefnamê de qet işaretek ji bo wî kesê hunermend ê, ku ev tablo çêkirin, nehatîye kirin. Min di vê xususê de ji Kitêbxana Bodleian pirsî, weha dibêjin: "li ser vê yekê qet tiştek di destê me de nîne û nayê zanîn ev yên kê ne", ji ber vê yekê, em nikarin bêjin ji sedî sed ev wênêñ han karê Şerefhan bi xwe ne. Ji ber ku dûr nîne, yekî din çêkiribe. Di Şerefnamê de du cûre destxet hene û ya yekem şanzdeh rûpel

pêhatîye nivîsandin, ku hem bala û hem sipehîtir e. Ev yeka han hîn zêdetir dudîlî dixe nav meselê. Min gelek hewil da, ku vê meselê ronî bikim, lê, ez negîhiştîm tu neticeyekê. Yek ji wan hewlên min ew bû, ku min çend tablo û nimûnên herdu destxetan bi rîya berêz kak İbrahîm Mîran, ji bo lêkolînê, ji Mudîriyetu'l-Teherrîyatû'l Cenayîye ya Bexdayê re şand, ku bi destê pisporê herî pêşkeftî Mamoste Ezîz Bitris, di rîya aletên ronahîyê re bide berhev û vê meselê ronî bike. Kesê navê wî derbaz dibe, di bersîva xwe de wiha dibêje: "Karêñ wiha li ser van cure wênan qet tu neticeyekê nadîn, ji ber ku hewce ye ev lêkolîna han li ser nusxa esasî bê kirin, ne li ser ên wêne li ber hatîgirtin".

Ez hewcedarê vê gotina han im bêjim, ku tablo yekser di eynî wextî de di ber nivîsandina Şerefnamê re hatine çêkirin. Ji ber ku çend rêtê Şerefnamê, ku peywendiya wan bi rêtê rûpela 89 û 90'an ve heye, ketine tabloya hejmara 13'an, ku eva han li ser behsa Fermanrewatîya Tercilê ye, xetê vê nivîsandinê dimîne bi ya li ser destê çepê ya rûpela 89'an, ku ev destxeta han a Şerefxan bi xwe ye. Yanî pişti-vê, rûpela destê rastê nivîsandîye, tablo, yekser li ser rûpela hemberî wê çêkirîye û koşa destê rastê ya li ser tabloyê jî, ku pîvana wê 9x22 mm-ye, spî maye û pişt re Şerefxan bi nivîsandineka himbiz (tijî, diberhev de, ne firk-Elişêr.) du rêt nivîsandine. Heryek ji van rêtê han hindî ji sisîyan yekê rêtê din e. Lêbelê, eva han nabe belga bawerî pêkirina wê, ku ev tabloya han û yên din jî destçêkirina hunermendekî ne û eva han jî ya Şerefxan bi xwe ye. Ger çiqas dûr nîne evê han destçêkirina wî bi xwe bin, ji ber ku Şerefxan di Koşka Şah Tehmasbê Yekem de (1524-1576'ê zayıfnî) dersên wênekêşanê xwendîne. Şerefxan di rûpela 152'an a Şerefnamê de wiha dibêje; "ji bo perwerdekirin û hînkirina xwendîna kurên serdar û maqûlan, nêrina Tehmasb wiha bû; hewce ye her di zaroktiya wan de mamoste ji wan re bêñ girtin". Vêca di vî warî de wiha didomîne; "ku dema temenê min bû neh sal, ez jî birim wir û min sê salan xwend. Şah ji me re digot; 'car-baran bi nexşkarîyê jî mijûl bibin, ji ber ku hiş û bîra mirov bi nexşkarîyê vedibe".

Diyar e, gotina neqaşî di zimanê Farisi de, di mana hune-

riya wênekêşandin û nexşkirinê de jî tê bikaranîn, Şerefyan, di Şerefnamê, di behsa jîyana xwe de wiha dibêje: "Min zanistîya nehw-serf û ya fiqhê temam kir". Di cîyekî din de jî dibêje: "Min xwendina xwe temam kir". Vêca mimkun e ku Şerefyan hînî nexşkarîyê jî bûye. Bi taybetî di wî wextê germîya berbelavîya huner ya Sefewîyan de li Îranê jîyaye. Hevçerxê hunermendên mezin ên wek; Mehmedî, Mezfer Elî, Sadiq û Zeynel-abidîn bûye. Wextê Şerefyan di Koşka Şah Tehmasb de dixwend, hunermendê mezin Axa Merkîyê şagirdê Behzat wênekêşekî mala Şah bûye. Ji ber vê yekê, dûr nîne, ku dersên wênekêşanê li ba wî bi xwe xwendibe. Her wiha di wextê Şah Îsmailê Didyan de, ku Şerefyan bû Mîrê Mîran ê Kurdistanê, Zeynelabidînê hunermend di kitêbxana Şah de kar dikir(16). Mimkun e Şerefyan ji ber hez ji zanistî û hunerî, berhemên çend hunermendên wî çaxî berhev kiribin û li gel xwe anîbin Bedlîsê. Li gora bawerîya min, zêdetirîn kitêbên kitêbxana mezin a Bedlisê yên wextê Evdalxan, bi taybetî kitêbên wênekêşan, ku hinek ji wan qelemkêşana mezintirîn hunermendê Sefewîyan ê Behzad bûye, Şerefyan bi xwe berhev kirine û ji derveyê vê, kitêbxane bi xwe jî ya wî bûye û kurên wî Şemseddîn, Dîyaeddîn û Evdalxanê kurê Dîyaeddîn jî kitêb li ser zêde kirine.

Min hewil da, ku bi rîya reqemên li ser tabloyan û çarçovên li der-dorêن wan vê gîrûgirifta han çareser bikim. Lê, min netîcek wisa bi dest nexist, ku dilê min li ser razî be. Mimkun e, ku ew reqemên li ser wan tabloyan hatine nivîsandin, ên Şerefyan bi xwe bin. Ji ber ku ev reqemên han dişibin bi wan reqemên ku li ser rûpelên kitêbê hatine nivîsandin. Lê, çarçovên der-dorêن tabloyan, dişibin bi wan çarçovên rûpelên ku bi xetê xwedîyê destxeta yekem, ku rûpela yekem û hinek jî yên din nivîsandîye, pantir û hinek jî rêk û pêktir in. Panîya wan 2 mm-ne û bi çardorêن wê pêkhatîye û rindtir in jî, ku ne dûr e zer bin. Her çend çarçovên nivîsandinê diduyan jî, ku ez wan a Şerefyan dizanim, jê derdikeve ku ji du xetan pêkhatîye; lê, di rastîya xwe de ji çar xetan pêkhatîye û ewî bi tundi destê xwe li ser şidandîye û xwestir derêxistîye pêş. Ji ber vê dişibe du xetan û panîya wê 1,5 mm- e. Çarçovên rûpelên 157 û 197'an, ger çiqas nivîsandinê wan ên nivîsarê duduyan in, lê, diçin ser

rêbaza xwediyê destxeta yekem. Çarçovên tabloyên hejmara 2, 3, 4, 11 û 13'an, wek a tabloya hejmara 20'an, sê xeti diçe û ya tabloya hejmara yekem ji cihê ye, ji tevan pantir e û nexşek ji di nav xetan de hatîye çêkirin.

Ew rûpela dikeve pêş hejmara yekem, bi destxetê nivîskarê yekem e, dişibe rûpela destê cepê ya rûpela 32'an û di eynî wextê de rûpela destê rastê ya pêşîya wê ji bi destxetê Şerefxan e. Eva han ji zêdetir rê ji bo vê xweş dike, ku tablo wek mesela çarçovan, destkirinê nivîskarê yekem bin.

Her weha ew çarçova ku li pêş tabloya hejmara 17 û 18'an, dişibe ya nivîsarê yekem, li gel wê ku nivîsandina wê bi detsxetê nivîsarê duduyan e. Mimkun e, ku Şerefxan çarçovên din bikaranîbe, yan her nivîsarê yekem di wan herdu cîyan de hînek tişt rast kiribin. Wî wextî çarçove bi wasita master (raşe) bi derzîyê li ser kartonan durust dikirin û dixistin jêr kaxizan, destê xwe bi ser de dianîn, kopîya wan bi wasita murekebê li ser kaxiza din derdiket, yanî rastîya wê bi derzîyê durust dikirin û bi qelemê ji di ser re diçûn. Her wiha şêwa rêzên rûpelan ji bi vî awayê rastkêşanê didan diyarkirin.

Piştî meh û nîv li ser sekinîn û lêkolîna van tabloyan, ez gîhiştim vê qeneetê û dikarim van netîcan jê derînim: Ez ê hînek din ji li ser van tabloyan bisekinim, ez li ser vê şopê me, ku ev karêñ han ê hunerî yên Şerefxan bin. Ji ber ku ew kesê ku ev wêne çêkirine şarezatiya wî gelek zêde li ser İran û Kurdistanê hebûye. Tabloya 16'an; li ser Şah Tahmasbê kurê Şah İsmîl e û hatina wî ya bajarê Xelatê ya ser qeraxê Gola Wanê dide teswîirkirin, belga wê yekê ye, ku wênekêş, cilbergên Şah Tehmasb û yên der-dorêñ wî, bi çavêñ xwe dîtine û bi awakî ras-teqînî eva han çêkirîye. Şah, cilêñ guldar ên fireh û nîvmil di ser cilêñ xwe yên din de li xwe kirîye. Serkulavê wî û yên der-dorêñ wî, gilover in û ber bi jor de teng û zirav dibin, perçek dar, qumaş lê pêçayî di nîvê serkulavê wî de qît bûye û mîze-rek li ser pêçaye. Yekî wênekêş ê di dema wî de, di kitêba Menzumat Xemse Nîzamî de vî cil û serkulavê di tabloyek xwe de ji bo Kesra Enuşîrwan wêne kêşaye(resimandîye). (Bî-nêre; wêna 279'ê kitêba Finunu'l-Şerqu'l Ewsed Fî 'Usurîl-İslamîyye). Ni'met İsmâîl; nivîskarê vê kitêbê di rûpela

216'an de, wiha dibêje: "Bi vî awayî serkulav di zemanê Şah Tehmasb de di wênêner hunerên wênekêşen Sefewîyan de derdiketin. Piştî mirina wî, ber bi kembûnê de çû". Gotina xwe wiha didomîne: "Darekî biçük i sor di nîvê rast ê kulavê xwe de dadiçikandin û carina wisa heye rengên wan tê guhertin. Yekem car ev serkulavê han nîşana binemala Sefewî û kesên der-dorêwan bûye".

Hunermendekî din di zemanê Şah de, di tabloyeke xwe de, ji bo Xusrew Perwîz, eynî cilûbergên Şah Tehmasb wêne kêsaye -ev behsa han di Şerefnamê de heye- (binêre; wêna hejmara 274'an ya serokanîya pêşî). Eynî cilûbergên Sefewîyan, di tabloyeke hunermendê mezin ê di dema Sultan Mehmed de hatîye çekirin, ku wek Arnist ji di vî warî de wiha dibêje: "Di wextê Şah Tehmasb de (1524-1576'ê zayînî) rêvebirê Akade-mîya Huner û Pîşangehê (sergî) bûye" (17). Tabloya wî, pêş-wazîkirina İskender ji alîyê Hakanê Çinê ve pêkhatîye. (Binêre: Tabloya hejmara 275'an a cynî serokanîyê).

Diyar e, ev cilûbergên han ên dewra Şah Tehmasb bûne. Hunermendêne wî çaxî ji cilûbergên hêja di tabloyen xwe de, ji bo paşayên xwe wêne kêşane. Ji ber vê yekê dubare kirina van cilbergan di tabloyeke Bedlisê de ji bo şexsê Şah Tehmasb, me digihîne wê bawerîyê, ku hunermend cilûbergên rasteqînî yêna paşayî wênekêşaye û şarezatîya wî di vî warî de hebûye; em dikarin bêjin: Şah, cilûbergên Şah û yên der-dorêne wî ditin hewce ye, eva han ji her dikare Şerefjan bi xwe be, ku di qonaxa Şah Tehmasb de xwendîye.

Her wiha ew ordîya rasteqînî ya di tabloya Şerê Çaldiranê de ye, em ê di dawîyê de bi dirêjayî; li ser warê meşandina şer û terfîba eskerên ordîya Osmanî û Sefewîyan a li scr milê rastê û çepê û pir hejmarîya topê Osmanîyan û çekirina zincirên topê wan, kuştina Mehmed Xan Estaclo yê sereskerê Şah İsmail yê milê çepê, bisekinin. Ev belgên vê yekê ne, ku kesê ev tablo çekirîne, zanyarîyeke wî ya gelek zêde di derbarê vî şerî de hebûye, vê wêna han bi awakî rasteqînî çekirîye, ku li gel zanyarîya di nav hinek serokanîyên dîrokê de, wek di Şerefnamê de behsa hinek ji van nehatîye kirin, hevûdu digi-

rin. Divê ew hunermendê xwedîyê van zanyarîyên dîrokî, dîrok nivîsekî wek Şerefxan be û di wextê xwe de gelek zanyarîyên di derbarê vî şerî de, yên di kitêban de peyda nebûne, ji devê xelkên Iranê, Kurdistanê, yan Osmanîyan wergirtibe. Eger yekî din, ji derveyî Şerefxan ev tablo çêkiribûna, nema dikarî wan zanyarîyan di tabloyê de cih bi cih bike, ji ber ku her li gora zanyarîyên di nav Şerefnamê de hatine çêkirin. Di bin van nêrîn û bawerîyan de, em bi kemasî dikarin bêjin, ku ger ewî bi xwe çênekiribe ji, ev tabloyên han di bin serpiştiya Şerefxan de hatine çêkirin.

Ger ciqas belgeki temam û iknakirî di destê me de nîne, lê, ev sirincê han zêdetir min didin bawerkirin, ku mimkun e Şerefxan bi xwe ev tablo çêkiribin. Jixwe eger rûpela yekemîn a vê nusxa han a bidestnivîs a Şerefnamê bimaya, dûr nebû ku ev mesele ron bûbûya.

TABLO Û RÎYA HUNERÎ YA HUNERMENDÊ WÊ

Her yek ji tabloyan li ser rûpeleke taybetî û di cîyên xwe yên nivîsinê kitêbê de hatiye çêkirin. Yek ji wan nebe, ku hinek nivîsandin pê re ye û di nav çarçovê de ye ji, tablo tev di nav çarçovan de hatine çêkirin. Lê, hinek caran wêne ji çarçovan pekîne derive. Her tabloyek li gor mijara nivîsandinê hatiye danîn, yanî; li gel mijara nivîsandinê di nav Şerefnamê de hatiye. Tabloyen wisa tê de hene, ku bi naverokê babetek in û hinek din ji hene, ku du mijarê manayê cihê tê de hene. Yanî; heta nivê wê babetek e û nîvê din ji babetek din e. Hunermend, tablo û wênêne wê nedaye naskirin. Eva han ji rîya piranîya hunermendê dema Musilmânîye ye. Edî nasîna wênan û lêkdana mana wan dikeve ser milê wan kesen ku lêkolînê li ser çêdikin. Eva han ji dikeve ser milen wan kesen, ku zanîn û şarezatîya wan di derbarê hunerê wênekêşen İslâmî, dîroka wê hunerê û karekterâ hunerî ya dibistanê (ekol) hunerî yên cur bi cur ên dema Selçûkî, Moxolî, Tûnur, Sefewî û dibistanê Bexdayê dimîne û her wiha şarezatîya li ser dîroka wê demê ye.

Kesen di nav tabloyan de ne, hemû ji bi rî, serpêçayî ne û cilû

bergên wan rêk û pêk in, awayê dirûtin û cure rewşen wî wextî didin nasandin. Wek mîsal; cîyek wisa di tabloyê de çêdikin, ku li gora cîyên xwe di tabloyê de tên naskirin. Mîran li ser text didin rûniştandin, cilûbergên wan nawaz û rind in. Tacek li ser serê wan datînîn, fincana wan li ber wan e, rîşî û bawesîn li ser serê wan e. Di çaralî de dora serê wan girtîye û wêna hîvê li pişt wan, yan li ser serê wan e, pasewanên wan li der-dorêن wan in û hinek tiştên din wek van... Wek mîsal; Sultan Selîm, di tabloya Şerê Çaldiranê de wisa dide naskirin, ku hespê wî mezin e û zengilên wî di milê wî de ne. Qet tu hespekî din di wê tabloyê de wisa mezin û zengilên wî di milê wî de çenekirîye. Her wiha du kes jî di pêş de diçin, ku her yek ji wan teberzinê wan di destê wan de ne, ji bo ku teberzin di cîyê wiha de, nişana giranbihatî û hêjatîyê ye.

Tabloyên Şerefnamê, ji bili tabloya Şerê Çaldiranê, ku li gor babeteke asayı datîne, tiji wêne nînin. Her wiha hunermend, hemû wêneyan li der-dorêن hev danîye, yanî dûr û nêzîkiya wan wek hev wênekêşandîye û dûriya sisîyan nedanîye, li ser du durî; yanî dirêji û panîyê wêne çêkirîne. Bi awakî din em dikarin wiha bêjin; wênen nêzik mezin û yên dûr jî biçûk çenekirîne. Eva han jî rîbaza piranîya hunermendên zemanê Musilmaniyê bûye, wek el-Rizazê Cizîrî û Wasit (Yehya Bin Mehmud Bin Yehya Bin Ebî el-Hesen Bin Kurîka el-Wasiki).

Dûriya sisîyan, ku di hunera Avrupayê de hebûye, hêdi hêdi di sedsala 15'an de, li ba Musilmanan peyda bûye(18).

Hunermend, wênen xwe bi awakî rasteqnî çêkirine. Ger çendîn pencera mezin a di nav tabloya hejmara 5'an de, ku li ser Cizîrê ye, nişan û remzê xanîyekî mezin c. Her wiha giya û darûberen di nav tabloyan de jî, guldar bin, yan nebin, rasteqnî nînin û ev çeşne giya û darûber di siruştê (tebîet) de nînin yanî; bi xeyalî ji ber xwe ve çêkirine, ji siruştê dûr ketine. Bi vî awayî giya û darûber danenasin, yanî ji siruştê dûrketicin, di wênen dibistana Moxolan, Timur û ya Sefewîyan de jî hene û hunerê Osmanîyan jî rîbaza xwe ji wan girtîye. Em dikarin bêjin, ku hunermendan wênen van giya û darûberan ji yek-du wergirtine. Lê belê, giya û dar-beren di nav tabloyen Wasit, ku di sala 636'ê koçî (1237'ê zayînî) di destnivîsa Meqamat

el-Herîrî de çêkirîye, bi van awayan gîya û darûber nînin; piranîya wan, ji derveyê dara xurmê, mezin in. Ên din hemû ji derveyî siruştê ji serê xwe çêkirine(19).

Giyayêن di tabloyên Şerefnamê de, ku piranîya wan sosin in, rasteqînî ne. Ev yeka han di tabloya hejmara 15'an de, bi gu-lêñ xwe ve baş têñ naskirin. Piranîya gîyayêñ din ên di zemîna (erda) tabloyan de hatine raxistin, ne rasteqînî ne. Evêñ han ji wek ên di dewra dibistanêñ wextê Musilmanîyê de ji siruştê dûr ketine. Hunermend, di çend wênen Şerefnamê de dev û çavêñ Kurdan gelek xweşik çêkirine, bi taybetî yên Mîrêñ Kurdan û yên ku temenê wan dor-berê cil salan û jortir in. Lê dev û çavêñ xortan; qelew, gilover yan nîv gilover çêkirine, ku eşkalê Kurdan derxistîye pêş. Hinek ji jinan ji, li gor karê dibistana pêş ve, gilover û qelew çêkirine.

Di piranîya wan dibistanan de wênen bi bejin, çavêñ jinan gilover û qelew, çav badem, bejin bilind û navteng zirav in. Ev dev û çavêñ han regeza Turanîyan in û bi hoyê hunerê İranîyan, li İraq, Misir û Şamê belav bûye(20). Eva han di piranîya wênen Wasit de ji têñ dîtin. Her çend wênekêşê Şerefnamê çavêñ bademî, bejna bilind, navtenga zirav, dev û çavêñ gilover ji bo jinêñ Kurdan çênekirine, ji ber ku çavêñ jinêñ Kurdan normal wênekêşa ne, ji ber vê yekê dev û çavêñ jinan bi şêweya Moxoliyan, an em bêjin; ji regeza Tirkî wernegirtîye. Hunermend, wênen jinan bê xişir durist kirine. Eva han ji rîbaza piranîya hunermendêñ qerna navendî ye. Her weki dema Şerefhan, dema Moxoliyan, Sefewîyan û Osmanîyan e. Wênen jinan ên wî çaxî di hêla xişran de kêm in.

Hunermend, piranîya wênen xortan bê rî û simbêl çêkirine û piranîya wan kesên ku salêñ wan li pêş in, di wênan de simbêlêñ wan hene û hinek ji wan bi rî û hinek ji bê rî ne. Piranîya mîrêñ Kurdan rî û simbêlêñ wan hene, rîyê hinekan tenik û yê hinekan ji bitr in; wek rîyê bitr û mezin ê Esededdînê Hekarîyê û yê Mîr İbrahîmê Bedlîsî. Yêñ hinekan ji rîyekî kêm li ser cena wan hiştiye, wek yê wî suwarê di tabloya hejmara 12'an de, ku di derbarê Fermanrewatiya Hekariyê de ye. Cûrek rîyê din ji heye, ku wek ên poşiyê (kermêşê) çend mûyek li ser cena wan in, lê wek xetek ben di ber guhêñ wan re çûyc.

Ewlîya Çelebî di sala 1065'ê koçî (1654-1655'ê zayînî) di rûpela 209'ê cilda çaran a Seyahetnama xwe de wiha dibêje: "Kurdên navça Hekarîyê, simbêlê wan qît in. Ji derveyî wan hinek kesên ku piçek rî li ser çena xwe dihêlin, piraniya wan rîyêن xwe kurdikin. Her wiha gulîyekî (kakulekî) tenik di nav çavêن xwe de berdidin". Di rûpela 317'an de jî wiha dibêje : "Kurdên Eşîreta Mehmudîyan, ên navça Wanê, rîyêن xwe kurtnakin û bi rengê al, hisîn, sor û zer direngînin".

Ger çiqas deskarê Sefewîyan, yan ên dibistanêن hunerîyê yên berî wê di wênên Şerefnamê de bêن dîtin, lê, eva han tiştekî ne ecêb e û jî qîmeta wan tiştekî kêm nake. Ji ber ku hunerên gelên cûr bi cûr tesîr û kar li ser yek û du dikin û kirine. Ji ber dirêj û firehbûna vê xalê em zêde li ser nadomînin. Em dikarin bi kurtî vêya han bêjin; dibistana hunerî ya Bexdayê jî gelek tişt ji hunera Selçukî, Îranî û ya mesîhiyêن Rojhilat wergirfîne. Van deyne ciyekî, heta karê hunerî yê Sasanîyan, Manî û Helenîstîyan jî di wênên wan de diyar in. Ev yeka han jî alîyê Dr. Zekî Mihemmed Hesen û yên din ve jî hatîye gotin(21). Wasit, ku mezintirîn wênekêşê dibistana Bexdayê tê hesêb kirin, ev tesîrêن han di wênên wî de jî derketine.

Wek me di pêş de jî got, pişî vê mijarê, em ê bikevin lêkolîna tabloyan û warê hunera wan. Vêca, ger min di hinek noqtan de şaşî kiribe, ez daxwaz dikim; kesên din bila ji min re rast bikin, ji ber ku ev babeta han aloz û dijwar e û ev mijara han jî ji bo me yekemîn -qasî ku ez pê dizanim- behseke taybetî ye, ku heta niha li ser milê nû yê van keleporêن me yên ku ji alîyê babûbapîrêن me de hatine danîn, beşek e ji hunera wênekêşî û "hîm danîna" hunera Kurd e.

Ez baştır dibînim, niha behsa tablo û wêneyan bikim. Mim-kun e û ne dûr e, ku ez di hinek waran de, ber bi hinek şaşîyan de çûbim. Ji ber ku wêne, bi awakî mezinkirî û bi deq û deq li gor nusxa bingehîn nehatine girtin. Ji ber astenga min a bi çavêن min re, ez rawestandina li ser çend wênan kurt dibirim. Min jî ji ber van sebeban û di ser de jî ji ber acizbûniya çavêن xwe, ihmalkarînê nekir, ger ji ber van hoyan, min şaşiyek kîrîbe, ez daxwaza lêborînê dikim(22).

TABLOYA YEKEM

MENZEREKE (DÊMENEKE) NÊÇÎRÊ LÎ HEKARIYÊ

Tabloya yekem a Şerefnamê, behsa Fermanrewatîya Hekarîyê dike. Ji dêmeneke nêçîrê ya di navçeve çiya de pêk-haflîye, ku bêguman, mebesta hunermend ji vê, ev navça han çiya ye û gelek asê ye. Nêçîr, di rojek bi 'ewir (hewir) de haflîye kirin. Nêçîrvan, bi siwar û peya, bi taşî û bazên xwe ve li çiyê belav bûne. Mirovî rîcipî bi çarmîrkî li bin darekê û li ser kevirekî bilind rûniştiye, ji bo ku li dêmena nêçîra bin xwe binêre. Cilûbergên wî dişibin ên mîrên Kurdan. Serkulavekî mezin, kewaw û kirasekî dirêj ê guldar lê ye û tiştekî wî gulinge di pişt serkulavê wî re bilind bûye. Ger eva han ne gulinge be -ku hunermendê tabloyan bi wî awayî gulingan ji bo çend mîrên Kurdên din jî bikaranîye- ez nizanim ka çiye. Bi şêl û rewşa xwe ve dixûyê ku ev mirovê han mîrekî Hekarîyê be. Zekerîya Begê kurê Zeynel Beg, di wextê temambûna Şerefnamê de, sala 1597ê zayînî- Mîrê Hekarîyê bûye. Mîr, destê xwe ber bi kurekî 10-11 salî de dirêj kirîye, ku jî cilûbergên wî têx xuyakirin, mimkun e ji malbateke mezin be, kulavê serî ji tiştekî ecêb e, naşibe senetê Kurdan. Ji ber ku wek fesan serpan e, çarmedora wî bi panî der-dora serê wî girfîye û

nava wî fire ye. Qeraxê rexê wî nêzîkî nav çavên wî bûne û valatîyeke sê koşe di nav xwe de hiştîye -yanî bi vî awayê wî ve, ez baş tê negihîstîm. Ne dûr e, ku di wî wextî de ev cûre kuvavê han ji bo kurên mîran ji aliyê Rojhîlat ve hatibin anîn. Eva han jî mimkun e ku kurê Mîrê Hekarîyê be. Tê dîtin ku piranîya kesen di wênan de, bi cilûbergên xwe, cîh û rewşa rûniştinên xwe, yan şela sekinandina xwe têr naskirin. Ji ber ku hunermend, di wextê wênekêşanên xwe de riayetî van xâilan kirîye. Di tabloyê de destek musiqajen li ser bilindtirîn ciyê navça nêçirê sekinîne. Aletên wan ên musiqajeniyê, ji dehol, zurne û boqê pêkhatîye. Boqlêder, li milê rastê, zurnejen li nîvê û deholvan jî, ku darê xwe bilind kirîye, li milê çepê ye. Her sê jî li milê rastê yê Mîr sekinîne, berê xwe ber bi jêr ve kirine û li musiqayê dixin, da ku nêçirek di wan navçan de hebe, ber bi nêçirvanan de rakin. Ne dûr e, ku ev musiqâ han, ji bo dilxwesiya nêçirvanan jî tê lêdan, boq, kefîye ber kevirekî, ji ber vê du perçê têt dîtin. Zurne jî bi wî awayê em dizanîn nîne, serê wê hilû ye, qeraxa devê wê sitor e û bazindî ye. Dehul jî hinek dirêj e, di awayê wê dehulê de ye, ku di destivîsa Îbnî el-Rizazê Cizîrî de hatîye, yanî wek yê di destê musiqajenekî di nav wêna li ser seeta Cizîrê ye. (Binêre; wêna rûpela 265'an a kitêba el-Alatu'l-Musiqîyye Fî'l 'Usurî'l - İslamiyye Dr. Subhî Enwer Reşîd). Dehul di Kurdistanê de gelek kevn e û du hezar sal berî zayînî jî li Iraqê hebûye.

Destek(taximek) musiqajen di tabloyê de heye, kulavê li serê wan wek yê Mîr spî ye. Mirovekî din li jêrî ciyê Mîr heye, wisa dixuyê, ku defek di destê wî de ye. Di binya wî de jî bazevan têt, ku siwarê hespekî spî ye û tetikên (lepir-destik) wî jî di destê wî de ne, destê xwe rakirîye hewa ji bo ku baz bê, li ser deyne. Di destê din ê bazevan de rimeka dirêj heye ku serê wê ber bi jor de bilind kirîye û dike ku li singa mirovekî kulav spî bide, ku eva han li ser destê rastê yê kurekî ye û ewî jî destê xwe avêfiye rima xwe. Wisa dixuyê ev mirovê han kesekî nêzîkê Mîrê Hekarîyê be, ku ew jî temâsekerekî nêçirê ye.

Di dawîya tabloyê de, hirçek hatîye çekirin, êriş anîye ser nêçirvanekî û ew avêfiye erdê, mirov jî xencera xwe kêşaye û

hevalên wî û tajî jî ji bo xelasîya wî hatine wir. Ew kesên hatine hewara xelasîya wî mirovî, yek ji wan tîrûkivanêñ wî di destê wî de ne û siwarekî kulavqoç e. Şalwar û sitarxaniyek lê ye û rima xwe ber bi hirçê de dirêj kirîye. Du mirovêñ peya jî li pişt wî siwarî ne, destêñ xwe ber bi kevne rêçek an jî şikeftek be. Hinek nêçîrvan jî torbêñ xwe bi pişta xwe ve girêdane. Li jêrî musiqajenan, siwarek heye şalê wî lê ye, çend xal li ser şalê wî hene. Evêñ han wek wan cure gulan in, ku di navçêñ Behdînan û Kurdistana Bakur de, li ser şal û şapikan nexş di-kin. Bi vî awayî şal û şapik, ên navça Tiyarê ne, ku Asuriyan li Hekarîyê durust dikirin. Di wextê xwe de gelek belav bûye. Şal û şapikêñ guldar ên Zaxo, Şernex, Mûş û Mêrdînê jî bi nav û deng in. Di sala 728'ê koçî (1327-1328'ê zayînî) de İbnî Batute çûye Mêrdînê û di vî warî de wiha gotîye : "Li Mêrdînê şal û şapik ji qumaşêñ kej çêdikirin"(23).

TABLOYA DİDUYAN DAGÎRKIRİNA KELA DÊZÊ

Tabloya diduyan, di rûpela 33'an de ye û li hemberî tabloya yekem e. Ew ji her li ser Fermanrewatiya Hekarîyê ye, ku ev Fermanrewatiya han yek ji wan Mîrektiyê Kurdan ên herî bi hêztir bûye. Tablo, dagîrkirina Kela Dêzê ji alîyê Mîr Ese-deddin û Asuriyan de -di wextê Dewleta Akkoyunluyan de (1403?-1508'ê zayînî) nîşan dide. Şerefxan, di rûpela 34'an de, wiha dibêje: "Esededdîn, yek ji kurên Mîrê Hekarîyê kurê *Gulabê kurê Emadeddin(24) bûye*", diçe Misrê ba Sultanên Çerkezan û di şeran de azayetî û mîranîyan pêşan dide. Di şerekî de destekî wî tê birîn, Sultan ji destekî zêr jê re dide çêkirin. Di wê navê re li Hekarîyê ji, Dewleta Akkoyunlu ya Tirkman a di zemanê Hesenê Dirêj de (1453-1478'ê zayînî) êrîşê dibe ser Mîrê Hekarîyê Izzedînşer û ewî dikûje. Fermanrewatiya Hekarîyê dagîr dike û dide destê Eşîreta Kurd a Dumbulî, ku ew dijî Mîrê Hekarîyê bûne. Di wê navê re, hinek Asurîyen ji navça nahîya Dêzê -li Hekarîyê melbendeke Şemizdînan e- ji bo kesp û kar diçin Şamê û Misrê. Li wir Esededdin dibînin. Daxwazê jê dîkin, ku bi wan re vegere welat û ji bo rizgarkirina navça Hekarîyê alîkarîya wan bike. Ew ji vedi-gere û bi dizî li navça Şemizdînan di nav Asuriyan de dimîne. Rojeke şembîyê, ku qet tu kar û xebat di nav wan de nayê kirin, tenê karê ji bo darên şewatê û pêwistîyê din di nav kelê de têñ kirin, Esededdin, cilûbergên Asuriyan li xwe dike û bi gire

girê Asurîyan re çek û cilûbergên xwe yên şer di nav barêñ xwe de vedişerîn û dikevin nav kelê. Dema dikevin nav kelê, cilûbergên xwe yên şerî li xwe dikin, Dunbuliyêñ di nav kelê de dikujin û kelê ji wan rizgar dikin. Êdî Esededdîn, hêdî hêdî Hekarîyê ji dijminan (ku Dunbulî û Akkoyunlu ne) azad dike û carek din Fermanrewatiya Hekarîyê dide domandin.

Ev tabloya han ji bo wê bûyera dîrokî hatiye çêkirin û ji du dêmenan pêkhatîye.

Dêmena yekem; ji beşa tabloyê ya xwarê pêk têt, ku hewil-dana girtina Kela Dêzê ye. Di wê beşa tabloyê de têt xuyakirin, ku Asurî bi ker û barêñ xwe ve diçin ber derîyê kelê û dergevanê kelê ji di wênê de yekî xeşim û nezan çêkirîye, ji ber ku derî li wan vedike. Edî wekî me behs kir, dikevin hundurê kelê û kelê digirin.

Dêmena diduyan; ji nîvê jorê tabloyê pêkhatîye. Di vê beşa han de, em dibînin, ku Esededdîn kelê wergirtîye, li ser baneki rûniştîye û bi dilxweşî mijûlî şerab vexwarinê ye. Hunermend, wêna Esededdîn bi simbêlekî mezîn û bi rî çêkirîye û serkulavak û cilûbergên mîran jî lê kiriye. Xizmetkareki sîniyek dirêj li hemberî wî girtîye. Şûşek ji di destê Esededdîn de ye û mijûlî cureke şerab vexwarinê ye. Yekê din ji li defê dixe û stranan jê re dibêje. Ne dûr e xulamek e û hinêñ din ji di binîya wan de ne û ber bi wî derîyî ve têñ. Yek ji wan destê xwe li derî dixe, ku ev milê han beşek din a kelê ye. Wek me di pêş de di derbarê Kurdêñ Hekarîyê de ji Ewlîya Çelebi wergirtibû; mirovekî din ji rîyek mezîn a wek def li ser e. Vî mirovê han du cot perrîn teyran kiriye ber serkulavê xwe û li tenburê dixe. Hinek wêdetir, du kesêñ din mertalêñ wan li pişta wan in û bi şêla xwe ve dişibin bi wî mirovê, ku destê xwe li derî dixe. Wisa dixuyê, ev kesêñ han ji bo pîrozbalîya Mîrê Hekarîyê hatine.

Di tabloyê de, çend topêñ lûlêñ wan jê hatin derêxistin di dîwar de bi awakî dirêj wek qelşek çêkirine. Di wî wextî de, yanî zemanê Hesenê Dirêj ê Sultanê Akkoyunluyan de top hebûne û Sultan Mehmed Fatîh ji di sala 864'ê koçî (1453'ê zayînî) de di dagirkirina Stenbolê de top bikaranîye.

Not:

1) Hewce ye em bala vê noqta han a ku tabloyên tê de cilûbergên wek kortek (kurtik) hatine wêne kirin, bikişînin. Ji ber ku ew Asurîyê ku li ber Kela Dêzê serê kerê girtîye, kortek lê ye. Eva han jî ji dirûtina wê tê zanîn. Wî çaxî pembo dikirin nav kortekê û bi sitûrî dihat dirûtin. Ji serî heta binî kitêlên dirûnê lê dihat xistin, ji derveyê kepenekekê (ferencî) di ser hemû cilan de dihat lixwekirin. Kortek ciyê qaputên îro girtîye. Heta ser çokan dihat û ne tenê di nav Asurîyan de, di nav Kurdan de jî belav bûye. Di wênê de, Asurîyek korteka xwe li gel derpê xwe yê spî pêçaye û xistiye bin piştîniya xwe.

Şerefhan wiha dibêje: "Esededdîn cilûbergên Asurîyan li xwe dikir". Eva han vê dide nîşandan, ku yan cilûbergên wan ji yên Kurdên Musilman ciyê bûne yan jî di çend tiştan de fer-qek di navbera wan de hebûye. Lê, di wênê Asurîyan de kortek dîyar e û ser-kulavê kortekê bi berê xwe li yê melayên şî'yan diçe û sikura(yaxa) wî jî bi panî hatîye wergerandin, li wî mirovê pêş ê kortek e, yanî ew kesê tenbûr di dest de diçe. Ev jî heye, eger ku ew ê dawîyê Asurî be her wiha ew ê ku li pêşîya xwedanê kerê, cilekî dirêj ê belavî lê ye, yanî pêşîra cilê wî nehatîye dadan û piştîniyê jî li ser girêdaye. Cilûbergên mirovê sisîyan ê di dawîya tabloyê de, ku nêzîkî deriyê surha kelê ye, wek yê mirovê diduyan e. Bêguman ev sikura pan, ku ji yê sitarxanê pantir e, di cilûbergên Kurdi de nîne. Mimkun e gundiyyê Asurîyan, van ji gundiyyê Ewrupiyan yan jî bi awakî raste-rast li gora sikurpanîya keşeyên xwe çêkirine.

2) Miradxanî jî di wê tabloyê de heye û li mirovê ku li pişt xwedîyê tenburê ye û mortal li pişta wî heye.

3) Li gor tabloyê, Kela Dêzê di nav surhekê de ye, yanî li ser kaşeberekî bilind hatîye avakirin û surha wê jî di binîya wê de ye. Odek li ber deriyê surhê çêkirî ye, ku eva han ciyê nobedaran e û li ser deriyê pêşîyê ye. Ger eva han ode jî nebe ew eywaneke bi derî ye. Bi dîwar bilind kirîye û topek li ser serbanê derî danîye û lûla wê jî derketîye ji der ve, lê, kapang hesin e. Deriyê kelê ne wek yê surhê ye. Ji ber ku awayê deriyê surhê nêzîkî yê "kivanê benderumî" ye. Lê, ev kivanê

han şikestî ye, bi awayê xwe ve sade ye û nexşeke giyayê rind ser derî ye, nivîsînek bi koff jî li ser serderâ wî ye. Ger çiqas ev nivîsîna han di wênê de gelek biçûk bû, xwendina wê jî gelek asê bû, lê, piştî gelek zehmetîyan min karî ez wê bipişkêvîm û bixwînim, ku deqa wê eva han e:

"Bimanet sparde Xweda Qel'e Diz".

Yani; "Kela Dêzê di saya Xwedê de bimîne".

Burcek li ser derî ye, lulên du topan di teniştên rast û çepê yên burcê re hatine derve. Heft rêtz kun di burcê de ne, ku evê han wextê şer ji bo tiving teqandin û tîr avêtinê hatine bikaranîn. Ew kunên ji bo tiving teqandinê hatine çekirin, gilover in û yên topan jî -wek di tabloyê de tên xuyakirin- dirêj in. Ev cûre burcên han ji bo şer tên bikaranîn. Di milê hundur de du qat e, wextê şer, hinek ji şerkeran raketî, hinek ser çokan û hinek jî ser piyan bi wasita wan kunan şer dikin. Li gor topografyâ erda Kurdistanê, yanî li gor bilindayî û nizmîya ew cîyê kel li wir dihat durust kirin, wisa pêwîst dikir; rêzek kun di hemû milên kelê de ji bo guleavêtin û şerkirinê bêñ amadekirin. Di roja 16.08.1977'an de, nimuneke gelek hêja bi vî awayê kunên kelan rastî min hat, ku kun du qat e û biçûk e jî. Eva han di dawîya rêzekevirên dîwarê Bakur ê Çemê Pawan ê Rojhilatê Dîclê de ye. Rîya dîrokî ya kevin a Rojhilatê Dîclê jî her di vir re derbaz bûye û nêzîkî 20 kilometran li bakûrê Findika Botan e. Qasî ku ez dizanim, Kela Wanê, ciwantirîn nimunê van curên kelên Kurdistanê ye.

Bi awayê endazeyî ya di Kela Dêzê de dîyar e, ku du qat bûye. Derîyê kelê girtî ye, du derî ne, mimkun e hesin jî be. Ji ber ku ger dar bûya, derzekên textan dê tê debihata dîyarkirin. Eger di bingeha xwe de jî dar be, lê rûyê wê hesin e. Hesinê ser derîyê wî (mebest ji vî hesinî, ew e ku ya di şûna zîlên îtroyîn de hatîye bikaranîn-Elîşêr.) jî, eynî di derîyên kelên din de jî hatine bikaranîn. Ez dikarim vêya han bêjîm, ku ev awe hesinê han ên ser derîyan, niha jî li ser derîyên xanîyê Kurdistanâ Başûr hene. Çend derîyên din ên di tabloyê de wek vî derîyî ne, jî bo vê ez naxwazim van zanyarîyê han dubare bikim.

TABLOYA SİSİYAN AMEDİYÊ

Tabloya sisîyan, di rûpela 38'an de ye, ev û tabloya çaran jî li ser Fermanrewatiya Behdînan in. Ev tabloya han ji dêmenê beşek bajarê Amedî pêkhatîye û gelek jî li wê mebestê gonca ye. Ji ber ku Amedî, li ser çiyayekî avakirî ye, ku çardorên wê wek bajarên pêşin -ku surhan ji wan re çêkirîye- Çiyayê Berdelanê ye. Ev surha Amediyê ya melbenda Fermanrewatîya Behdînan surheka tabî'î ye. Em dibînin, ew xanîyên nexîdar li ser ciyekî kevirên bilind û bi kevirên neqarî yêñ mezin ava-kirî ne. Di vê de serayên Mîrên Behdînan nîşan dide, ku evêñ han dikevin ser qeraxên Rojhilata bajarê Amediyê. Gelek mixabin, niha tenê deriyê wê yê mezin jê maye, wêna du ejde-rhan û ya teyrê sîmir ji ser hatîye kolan. Ev deriyê han ê entîke, ji du kevirên mezin û çar kevirên din pêk hatîye. Di wextê xwe de qeymegamekî nezan ev seray daye xirakirin, ji ber vê jî gunehekî mezin di derbarê keleporêñ Kurdî de kirîye.

Di tabloyê de, mirovekî xort li serbanê serayê ye, cilûberge-kî bi qîmet ê mîran wergirtîye, mêtzereke ji qumaş durustkirî li dora kulavekî spî serê xwe pêçaye. Kewayekî sirmedar û ki-

rasekî guldar ê ku ji qumaşê biqîmet hatî çêkirin jî lê ye. Di pêşî de me behsa cilûbergên Mîrên Behdînan ên ku min ji kitêba Rîch girtibûn, kir. Mirovek li gel wî xortê sipehî diaxive. Ji şêla wan derdikeve ku ew xortê sipehî ji yê din mezintir e. Lê, li gora bawerîya min, ev xortê han Seyîdxan Begê Mîrê Behdînan e, ku kurê Qubadxanê kurê Sultan Huseyn e. Ew, di wextê temambûna Şerefnamê de, Mîrê Behdînan bûye. Şeref-xan, di rûpela 42'an a Şerefnamê de behsa wî kirîye. Şeref-xan wiha dibêje: "Xortekî bi qîmet, aza û welatparêz, bi piştgirî-ya xalê xwe Silêman Begê Mîrê Soran, di nîverasta meha Zil-hecce ya 993'ê koçî (1585'ê zayıni) de gihişte Amediyê û bû mîr" (25).

Mirovek li ser destê rastê yê serayê dixuyê, kal e û rîyê wî dirêj e. Destekî xwe xistîye binguhê xwe, mirov dibêje qey stranan dibêje. Destê wî yê din jî li ber devê wî ye û li xelkê binîya kelê dinêre, ku ew li müsîqayê dixin û şahîyê dikan. Ji rengê wî kalemêrî derdikeve, wek ku xemgîn be.

Nobedarek rim di dest de li ber kelê ye. Teyrekî nêçîrê li ser destê çepê yê derîyê serayê ye. Bazevan lepik di dest de ye û mirovekî destê xwe danîye ser milê, ku ev meriv di wênê de baş nayê xuyakirin; bi destê din jî erdê nîşan dide. Li ber se-rayê li derveyê bajér, birek xelk bi şahîyê mijûl in û govend dikan. Yek ji wan li ser çokêن xwe rûniştiye li bilûrê dixe. Yekî din li pişt wî û ser milê rastê yê tabloyê li defê dixe. Mirovekî din jî li pêşîya wan e, çokêن xwe gîhandîye erdê û dilizze. Qasî min seh kirîye dibêjin; Kurd bi tena serê xwe nalîzin, bi ref û gurub dilizin û şahîyan dikan. Tenê li Behdînan bi tenîya xwe kes dilizin. Ca êdî ez nizanim, ev bi tenê lîstin her ji berê de li Behdînan belav bûye yan nû peyda bûye û ji biyanîyan git-tine? Ew mirovê ser piyan, cilûbergekî fireh û dirêj lê ye, ku kewayekî dirêj ê bimil e. Piştînîyeka dirêj li ser girêdayî ye, serekî wî yê wek reqasan berdayî û xwar pêkhatîye. Her wiha kirasekî kin û derpêyekî spî (pembeyê xetxeti. n. J. N.) li xwe kirîye. Serkulavê wî jî spî û mezin e, rîşikirî ye û perre teyrekî jî di bera kirîye. Li milê din mirovekî din rûniştiye, ne dûr e, li gor şêla rûniştina wî, li dabûrqê dixe. Lê, wêne di vî milî de têk çûye. Serkulavê wî ji qumaşê xetdar(xet-xetî) e, ku

ihtîmaleke mezin e ji qumasê mişkî be. Eva han jî li ba Kurdên Iranê û li navça Silêmanîyê bi qîmet e û niha jî her heye.

Ez pêwestî dizanim, ku van xalêñ han ên derbarê tabloyê de ronî bikim.

1)Di vê tabloyê de, wêna bilûrê hatîye çêkirin, ku eva han aletekî musiqî yê Kurdistanê ye, gelek kevn e. Em dikarin bê-jin; ew ji çend hezar sal berê niha ve di Kurdistanê de hebûye. Bila eva han neyê wê manê ku em ji ber xwe ve vî tiştê han dibêjin û li ser dirêj dikin, ji ber ku eva han kevintirîn aletê musiqayê ye, ku mirov dikare ji qamîş û dar durust bike. Dr. Subhî Enwer Reşît wiha dibêje: "Bilûr, ne tenê pênc hezar sal berî zayînê li Iraqê hebûye, rêçen vê aleta han di Çerxa Kevir de jî tê dîtin"(26). Hêjayê gotinê ye, wênêñ bilûrê di nav wênêñ lbnu'l-Rizaz ê Cizîri de jî tên dîtin. Wê seeta mezin a li Cizîrê çêkirîye wênêñ siwarek û pênc musiqejenan li ser in. Cizîri, endazîyarek mekanîk û dahîyek ji xelkê Cizîra Botan bûye(27).

2)Ew defa di vê tabloyê û ya di tabloya hejmara nehan de wêna wan hatîye çêkirin, bi Kurdî jê re "dafincan" tê gotin. Yanî; "def sîncan". Ew def e ku senca wê heye. Senc; perçe hesineke xistinê, ku tenik e û cût cût di qeraxê defê de hatîye qayîmkirin. Defêñ wisa hene ku pênc sencen wan hene, yanî; pênc cût senc. Di wextê destlêexistinê de zingînî jê tê. Li Iraqê ji vê defê re el-def el-zincarî dibêjin. Di kitêban de el-def el-Misri jî hatîye. Dûr nîne Ereban ev navê han ji def sîncan wer-girtibin. Defêñ Kurdî yêñ derwêş û ehlêñ tesewwufê bi-kartînin, senc tê de nînin, piçek têlêñ gilover di der-dorê wê de ye û li milê wê yê hindûr hatîye pêçandin. Dafincan, di Kurdevarîyê de nîne û defa Kurdî jî di şahîyan de nayê bikaranîn. Li nav bajaran defêñ biçûk (yanî dafincan) li gel aletêñ din ên musiqayê tên bikaranîn.

TABLOYA ÇARAN
**DİBİSTANEKE NEXWEŞXANÊ
Û BİZİŞKİYÊ LÌ AMEDÎYÊ**

Tabloya çaran, li hemberê tabloya sisîyan e û di rûpela 39'an de ye. Behsa Fermanrewatiya Hekarîyê dike û ji du babetan pêkhatîye. Nîvê serê wê yê jorê dêmena dibistanekê ye li bajarê Amediyê û nîvê xwarê yê tabloyê jî wêna lîstika qaşwanê ye(yarıya qaşwan).

Di beşê jor de, wêna xanîyekî tê xuyakirin, evê han dikeve ser qeraxê surha bajarê Amediyê, ku surheke tabii a bi kevir e, xelkê Amediyê jê re surh dibêjin. Ji ber ku çarmedorê bajêr Çiyayê Berdelanê yê asê ye û wek surh çûye-hatîye. Xanîyên wan li ser qeraxê surhê ne, rûyên wan ên ji der ve û derîyên wan dikevin ser kolanên nav bajêr. Hercî hewş, eywan û derîyên avahîyên heywanan jî wek wênen vî xanîyî ne û rûyên wan ber bi derveyî bajêr û çiya ye. (Ez di sala 1983'an de, çûm Amediyê û min terza bînasazîya vî bajarî kola). Sekoyeke bilind a di hewşa wî xanîyi de, li ser çend qubhêñ gilover û biçûk ên nexîşdar hatîye durust kirin û mehfûreke rind û sipehî li ser

hatîye raxistin. Mirovekî sal mezin li ser rûniştîye, ku besêke wênê di tabloyê de ronî nîne. Ev mirovê han li ser çokeke xwe rûniştîye û destekî xwe danîye ser çoka xwe û çoka xwe ya din jî bilind kirîye. Ev mirovê han dişibe yek ji zanayên dînî. Bu-feyek li teniştâ wî ye, şerbikek wek şûşeke piçûk û xetdar tê de ye, ev şerbikê han jî ji ber biçûkbûna xwe bi kêra avvexwarinê nayê. Ji ber vê mimkun e ji bo derman bikaranînê be. Ji ber ku bizişkên kevin van cûre şerbikan ji bo derman parastinê bikar dianîn, ku milê wî yê der ve bi cure boyaxek siwax kirine, ev boyaxa han nahêle ne av û ne jî tiştek din ên şîlavî jê bipale. Ger eva han şûşe be, mimkun e şûşa murekebê be.

Xortek li hemberî wî mirovî û nezîkê deriyê xanî ye. Cilek ji qumaşekî bi qîmet li xwe kirîye, ku nexşen gîhayan û heywanatan li ser in, wek resmê şer û teyr, ku pê diçe ev teyrê han bilbil be. Kitêbek mezin di destê wî kurî de ye. Lî, kitêb ne ve-kirî ye, girtî ye. Eva han jî bi hoyê hunerîya rûpelgirtina çarçova dora wê em dizanîn. Xort, xwendevanê li ber destê wî melayî ye û di dibistanê de dixwîne. Du kes li xwarê sekoyê rûdinîn, tenê serê wan dîyar e. Yek ji wan gelek xort e, dixuyê ew jî xwendevan be, yê diduyan jî, wêna wî baş nayê kifşkirinê. Mimkun e bi temenê xwe di tanga wî mirovê rîspî re be û mela jî be. Li nêzîkî wî xwendevanî yekî kitêb di dest de, qismek serê wî mirovî di ber diwarê surha dibistanê re derketîye. Ev xor tek bi simbêl e û şêla pêçandina mêtzera wî ya mor jî ecêb e. Mirovek din li ser banê dibistanê ye û ji mêtzera wî tê naskirin, ku mela ye. Ji ber ku lefkên mêtzera wî hene. Mirov dike bêje, ku mela li gel yekî diaxive, lê, wêna wî ne ronî ye û qet şik tê de nîne, ku wênek din li hemberê wî heye û di tabloyê da nayê dîtin (di tabloya rengîn de xweş tê dîtin ku ev jinek e. n. J. N.)

Di xwarê dibistanê de du xort hene. Yek ji wan cilekî wek sitarxanî li xwe kirîye û mêtzera wî spî ye. Wek em di piranîya wênê tabloyê din de dibînin, ji bo rîndî û qayîmkirinê, perçeki reş, li mêtzera xwe girêdaye. Vî Xortê han destê xwe ber bi giyayekî de birîye ji bo ku bicîne, yê din jî, ku cilêن wî şinê tarî ne û li pişt ê din e, destê xwe bi aliyê wî de dirêj kirîye, ku giya jê bigre û bike nav qevda giyayê destê xwe. Ev

herdu xortêñ han xwendevanê dibistanê ne û ew gîya ji sosin e, ku di çend tabloyên din ên Şerefnamê de hene û di tabloya hejmara 15'an de, wan sosinan gul ji vedane. Carnan bizişkan derman ji van cure sosinan durust dikirin. Sed cure sosin hene, wek vêya han di kitêba Edwar Xalib, el-Mewsu'e Fi 'Ulûm el-Tebi'e, di cilda yekem û rûpela 579'an de hatîye behskirin. Bizişkên Yunanîyan, van cure sosinan, wek gîyayê bizişkiyê hesêb kirine. Bi Yunanî ji vî gîyayî re "îrsa" dibêjin. Bizişkên Musilmanan ên wek Huneyn Bin İshaq Bin el-Beytar Bin Hebl û Ebu 'Omran el-Qertibî û Dawud Entakî û hinekêñ din, behskirine, ku sosin bûye dermanê çend nexweşîyan. Bizişkan go-tine; sosin, dermanê nefestengbûnê, bawesîr, eşâ ser û ji bo cîger, birînan, kurma vêtin, zarakanîn, zêdeketina cilan û ji bo nexweşîyen rehîmê yên ji ber zarakanîn jî bi feyde ye. Ev cure sosinêñ han kulîkên lask dirêj vedikin, evêñ han xwe bi xwe li çiyayêñ Kurdistanê hişîn nebûne, ji ber ku xelkê di nav goristanan de çandine. Niha ji li Kurdistanâ Iraqê di nav şeqam, baxêñ giştî û baxçêñ malan de têñ çandin. Dawud el-Entakî wiha dibêje: "Sosin, li bajarê Şamê heye û li Kurdistanê jî gelек e"(28). Li navça Botan hinek jê re şîselaq dibêjin. Li Cizîrê her jê re sosin dibêjin û evêñ li vir ji wan sosinêñ ku li navçen Botan û Behdînan hêşîn dîbin, mezintir e. Edwar Xalib, ji sosina Şengarê re sosin Sincar gotiye û di vî warî de wiha dibêje: "Eslê bingeha wê Cizîra Botan e". Di rastîya xwe de, wek di tabloyên Şerefnamê de ji hatîye nîşandan, bizişkên Kurdistanê dermanan ji gîyayê bizişkiyê durust kirine, ku li Kurdistanê gelek bûne; vêca ci yên di çerxa navendî de bin, ên wek bizişkê dermanger Ibn Dînar, ku bizişkekî Dewleta Dostkî ya Kurd bûye û ci ji di van nêzikan de, yên wek bizişkên me yên millî, Mela Rewşenê Mendelî, Kerîmê Mam Cewahirê Kelhu-ra Somarê, Feqî Huseynê Mentkî, Gulê Re'be, Nene Kotir û Hepse Ezîz bin (29).

Dûr nîne ewêñ me bi dibistan bi nav kirine, nexweşxane û dibistanê bizişkiyê bi hev re bin. Ji bo vê ji du belge di destê min de hene; belga yekem; ew şûse yan şerbikê di nav bufê de ye, ku zêdetir dişibe dermanxana nexweşxanê dewra İslâmîyetê, ku dermanan tê de diparastin. Eva han ji bo nîşana

nexweşxanê ye. Belga diduyan; ew herdu xwendevan in, ku mijûlî berhevkirina gîyayên bizişkîyê ne. Hêjayê gotinê ye, di şaristanîyeta İslamiyetê de, dibistanên bizişkîyê perçek ji nexweşxanê bûne. Yanî dibistanên bizişkîyê di nexweşxanan de hebûne. Wek nexweşxane û dibistana bizişkîyê ya bajarê Farqînê ya paytextê Dewleta Dostkîyan. Vêca pê diçe, nexweşxane û dibistanên bizişkîyê li bajarê Amediyê yê Fermanrewatîya Behdînan hebe. Şerefxan ji, dibe ku yan ji hinek kesan yan jî ji Beyram Begê kurê Sultan Huseynê Behdînanî sehkiribe, ku di wextê Şerefxan de, Mîrêmîran ê Kurdistanê bûye -di wextê Şah Ismaîlê diduyan de- di navekê re jî Beyram Beg, li ba Şah penaber bûye. Ew çax Amêd, melbendeke zanistîyê ya Kurdistanê bûye. Bi dibistanên xwe yên mezin ên bi qubbe ve bi nav û deng bûye, ku di sedsala 16'an de, Sultan Huseyn bingeha wê danîye(30). Heta niha qet nayê bîra min û ez di tu serokanîyan de jî lê rast nehatime, ku li bajarê Amediyê nexweşxane û dibistaneke bizişkîyê hebe. Bi firehî di derbarê çend nexweşxanê din ên Kurdistanê de, ku di qirna navendî de hebûne, behsa wan di serokanîyan de hatine kirin, evê han wek nexweşxanê Niseybînê, Herran, Erbil, Cizîr, Kerzan, Bedlis, Mêrdîn û ya Farqînê ye(31).

DÊMENA DÎDUYAN:

LÎSTİKA QAŞWANÊ

Ew babeta ku di beşa xwarê ya tabloyê de hatiye pêş, lîstika qaşwanê (yarîyê qaşwan) ye. Siwarek li xwarê surha tabîi ya Amediyê de ye, li ser hespekî kehêlê spî yê serkêş e. Hesp, nerehetiyê ji siwarê xwe re derdixe, herdu lingên xwe ji hev dûr kirine û bi erdê ve şidandine.

Hunermend, wêna hespê gelek ciwan û lêhatî çêkiriye. Siwar, xwe li ser piştä hespê bilind kirîye, bi destekî hevsarê hespê girtiye û bi destê xwe yê din jî daxwazê ji wî mirovê pêşîya xwe dike, ku darê qaşwanê (qaşo) bidetê. Ne dûr e, gogek (top) di destê wî de be. Du heb qaşo di destê wî mirovî de ne. Yek ji wan herçar serên piştîna wî pê de aliquîne, dîyar e, ku du piştîn bi hev ve girêdane, milê xwe yê rastê bilind

kirîye û destê xwe ber bi wî mirovê peya yê diduyan ve dirêj kirîye, ku ji nêrîna wî yê ber bi pêş ve dixuyê, tiştek wek gogê di destê wî de ye. Ew peyadeyê duduyan, destê xwe danîye ser tiştekî serpan û tenik, ku eva han bi awayê xweşikî û nazikîya gulê hatîye çekirin, ne dûr e deburqe be ku di wextê listinê de lêdixin. Mirovekî din li pêşîya wan e û yekî din ber bi wan de têt û lepêñ xwe ber bi mirovê hemberê xwe, yan jî ji bo gogê - ji ber ku tiştek spî di navbera wan herdukan de tê xuya kirin- dirêj kirîye. Ev grûba han an dixwazin listika qaşwanê bilizin, yan jî dilizin. Ev leyza han bi gog û qaşo tê listin. Qaşo, darekî dirêj e, darekî kurt û qayîm bi ser ve tê girêdan, ku bi herdu alîyan de koşen wî ji hev vedikin. Lê, dara dirêj di paşîya dara kurt de derdikeve ji derive. Siwar û peyade, du grûbêñ vê listikê ne, her çiqas siwar bi peyadan re nebin jî. Di cîyek din de em ê behsa vê listika han bikin, ku di wextê xwe de li Kurdistanê belav bûye. Ji vê listikê re şeqîn jî tê gotin.

TABLOYA PÊNCAN

CİZÎRA BOTAN Û "MEM Û ZÎN"

Tabloya pêncan, di rûpela 42'an de ye û li ser Fermanre-watiya Botan e. Ji sê dêmenan pêkhatîye û heryek ji wan xwedî manayeke taybetî ye.

DÊMENA YEKEM

Li pêsiya tabloyê pêkhatîye, rûbarê Dîclê yê milê Rojhilat wênekêşaye. Beşek ji ser û laşê xortekî ciwan ê simbêl reş tê xuyakirin, armanca wî ew e ji wî rûbarê mezin û fireh derbas bibe û bê nav bajêr. Xort, destê xwe ber bi rûbar de dirêj kirîye, daxwaza wî ji vê ew e, bizane ka ev rûbarê han ê mezin kûr û şetdar e, dikare lê bixe yan na. Li keçeka milê din ê Dîclê dinêre, ji bo ku rîya jêderbazbûnê nîşanê wî bike. Kulavê vî xortî dişibe bi taceke şaxdar, ji ber ku du tiştên wek şaxan bi ser de ye. Dibe ev xortê han xerîb be, ev kulavê serê wî, tenê bi serê xwe cûre kulavek e di nav wênê tabloyên Şerefnamê de.

Keçeka panzdeh-bîst salî li milê din ê Dîclê ye, gumgumek avê di destê wê de ye, tijî av dike. Li wî xortê milê din dinêre, ku daxwaza rênîşandanê jê dike. Ev mirovê han ji mîran zêdetir dişibe bi keçan, eva han jî çi ji cilêن wê, ku qumaşekî guldar e û çi jî gumgumê di destê wê de ku tijî av dike û çi jî li gor

goştên dev û çavêن wê yên wek jinan, mirov dikare jê derbixe.

Serkulavê keçikê wek yê mîran e, ew piştinîya ku girêdaye, ji hemû piştinîyên din ên vê tabloyê, ya di tabloya hemberê wê û ya piştinîyên di nav tabloya şesan de ji mezintir e. Wek adeta jinan, serê piştinîya xwe di ber teniştâ xwe de ber bi jêr de berdaye; lê, li gor wênan, mîr, raste rast di ber navka xwe re serê piştinîya xwe ber bi jêr de berdidin. Ev jina han ne porê wê dîyar e û ne ji guhar yan heleqên guhêñ wê. Dîwarek ji kevirên birîti li pişt wê jinê, ser qeraxê Dîclê ye. Ev dîwarê han ê hewşa xanîyekî ye, ku di eyñî wextî de "temsil" a surha Cizîrê dike û eva han pêşîya Burca Belek e, hemû wextan pêlén şetê ava Dîclê lê dixe. Nexşekî wek nîv dîlimê baqlawê li ser rûyê derve yê keviran heye. Di vir de, yanî di wênê de çewtiyek hunerî hatîye kirin; xetê ser rûyê dîwar, ser wêna wê keçikê çêkirîye.

Li aliyê din ê keçikê, li rîya tê ser Dîclê, mirovekî serê xwe ber bi wî dîwarî ve qît kirîye. Ev mirovê han xwedî simbel û rîyeke mezin e û herdu ji reş in. Devekî mezin û pan, cotek bîriyên stûr û du çavên bed li ser hene. Wêna giştî ya wî mirovî ber bi ya mirovekî hilekar û fesad diçe.

Ez di van çend mehêñ dawîyê de gelek li ser vê tabloyê sekinîm, di dawîyê de ez gehîştim vê noqta han ku bikarim bêjîm; ev dêmêna han a vê tabloyê, ku di besê xwarê de ye, işaretâ serpêhatîya Mem û Zînê ye. Ji ber ku wêne û serpêhatî gelek li hev têñ. Li gor behsa Destana Memê Alan a Roger Lesscot, destkarî kirina Dr. Nurettîn Zaza û wergerandina Erebî ya Dr. İzzeddîn Mistefa Resûl, rûpela 97 û 128'an; Memê bi cilûbergân paşan e, ku taç dîyartirîn beşek ji wî ye, li pê Zînê tê bajarê Cizîrê. Wek ku Melikê Kurd ji eva han gotîye û her wiha li rûpela 90-93'an ji binêre. Di rûpela 74'an de ji eva han hatîye nivîsandin: "Berî Memê bigihîje Cizîrê, rastî pîremerekî tê, ku ew Xidir Nebî ye. Silavê lê dike û jê re dibêje; dema tu bigihîjî ser rûbara Cizîra Botan dê tu bibînî, ku rûbareki pan û mezin e. Belem ji li wir nîne, ku pê derbaz bibî. Li ber qeraxê Dîclê dûkel bilind dibe. Keça Bekoyê Ewan ji li wir e û dê bixwaze bi navê Zînê te bixapîne. Bawerîyê pê neyne, ji ber ku ew keça Bekoyê Ewan e. Babê wê bi wasita ki-

têbê remil avêtîye û zanîye, ku tu dê biçî bajarê Cizîrê. Ji ber vê yekê keça xwe anîye û di rîya wê de dixwaze te di ava kûr de bide xeniqandin".

Vêca wek di rûpela 75 û 76'an de jî behs dibe; dema Mem tê ser qeraxê rûbarê Dîclê, dibîne ku gotina pîremêr rast e. Qet tu belemek nîne, ku pê derbaz bibe. Bangê keça Beko dike û jê re dibêje;" Xuşkê, ez xerîb im û nikarim rê derêxim.. buhur li kîjan milî ye?" Keçik hewil dide ku Memê ber bi şaşiyê de bibe û jê re dibêje"; ez Zinê me, ez bi şev hatim ba te û me hingustîlên xwe bi hev guherandin. Ez ê bêm ba te û te bînim vî milî ba xwe." Wextê keçikê zanî nikare bi pîyan lê bixe û derbazî milê din bibe, rîyeka kûr nîşan da û jê re got; "tu dikarî bi pîyan li vir bixî û derbaz bibî." Armanca wê ew bû, ku wî di wê avê de bide xeniqandin. Dema Mem digîlüje ser wê buhurê dibîne, ku gelek kûr e. Li ser vê, li keçikê vedigere û jê re dibêje; tu ne Zinê yî, tu keça Beko yî. Vêca vedigere ber qeraxê û rûdine, heta rastî şivanekî tê. Şivan rîyeka tengav nîşan dide, Mem jî jê derbaz dibe û diçe milê din.

Li gor behsa Mem û Zinê ya di nav Tuhfe Muzeferîyye ya cilda yekem û rûpela 275'an a Oscar Mann jî; Mem û Bengîn ser qeraxê rûbarê Dîclê rastî keça Beko Melek Rihan tê. Memê dizane, ku ew Zinê ye... Li gor qisekirina destana wê ya folklorî ya ji alîyê Hacî Pîrotê Ranyeyî, ku temenê wî ji 80 salî zêdetir e û min di tarîxa 18.06.1986'an de, bi destê xwe bi Zaravayê Kurmancî jê wergirt, wiha dibêje: "*Ku Memê cara yekem tê Cizîrê, Bekoyê Ewan ser rîya wî radiweste û ber bi wî de tê".*

Li gor bawerîya min ew xortê cilûbergên paşatîyê wergirtîye û taca şaxdar daniye serê xwe, destê xwe ber bi Dîclê ve dirêj kirîye û li gel wê keça li milê din diaxive, daxwaza rê nîşandanê jê dike; Memê Alan e. Ev herdu mîsalên navêwan derbaz bûn ên ji cûda cûda milan hatine stendin jî, li gel vê wêna han digoncin. Ji ber vê, ew keça li milê din ê Dîclê, yan Zinê ye yan jî keça Beko ye, ku ew xizmetkarê Zinê bûye û Zinê jî keça Mîr Evdal e. Ew mirovê mekirbaz û hilekar jî, ku serê xwe ber bi wî dîwarê rexê Dîclê ve bilind kirîye û li pişt keçikê ye, Bekoyê Ewan ê jê nefretkirî ye. Eva han jî hêjayî

gotinê ye; li gor wênan û qisekirinê folklorî ji, divê Memê ji Rojhilat ve hatibe, ne Rojava ve, ji ber ku Dicle di aliyê Rojhilatê Cizîrê re derbaz dibe.

Ez, ihtimaleke gelek dûr dizanim, ku Şerefxan serpêhatîya Mem û Zinê nezanîbûye yan sehnekirîye. Dema ev bûyera xemgîn li Kurdistanê belav e, 151 sal di navbera çarenivîsa reş a Mem û Zin û dawîpêhatina nivîsandina Şerefnamê de heye. Ji ber ku Mem û Zin di sala 854'ê koçî (1450/1451'ê zayînî) de koça dawîyê kirine. Min ev tarîxa han ji ser kêla tirba wan girtfiye. Eva han li ser jêrzemîna Medresa Mîr Evdal e, ku dikeve ser surha Cizîra Botan. Min di kitêba xwe ya Dîwana Kurmancî, di rûpelên 154-160'an de, behsa vê meselê kirîye û wêna kêla wan a ku ev tarîxa han li ser, weşandîye.

Hewce ye em vê ji bêjin, ku herdu şairên me yên mezin, Eli Herîrî û Melayê Cizîrî, ku ez van herduyan ji hevçaxê Şerefxan dizanim, işaretî Mem û Zin kirine. Ji ber ku serpêhatîya wan wê çaxê gelek bi nav û deng bûye. Melayê Cizîrî wiha dibêje:

*"Mûyekî ez ji te nadim be dused Zin û Şîrînan
Çi debit ger tu hesêbkî (M.B.) Ferhad û Memê".*

Ji bo vê meselê li Dîwana Melayê Cizîrî ya tehlîla Sadiq Bahaeeddîn û di derbarê Melayê Cizîrî ji li Dîwana Kurmancî (Ev kitêb bi navê "Şairên Klasik ên Kurd" ji aliyê Weşanên Jîna Nû li Stockholmê, bi tipen Latinî hatîye çapkirin-Elişer), rûpela 11'an binêre.

Her wiha Feqîyê Teyran ji, kui em dikarin bêjin gehîştîye hînek wextê Şerefxan, navê Zinê di kitêba bi destnivîs ya Bersîsê Abid de anîye, ku ev destnivîsa han gelek rind e. Teyran wiha dibêje:

*Kopek di xew de pê reyî
Nazik ji xeflet hilbeyî
Le'lê di sor kef lê meyî
Rabin bi Zîna xidmetê*

Vêca li gor vê, gelek ihtimaleke nêzîk e ku Şerefxan ji wek van şairan işaretî Mem û Zinê kiribe, lê, ev yeka han ne wek wan bi nivîsandî, ewî ji di tabloyên xwe de ev bûyera han dabe diyarkirin. Ji ber ku ger ev tabloyên han ji aliyê Şerefxan

bi xwe de jî nehatibin çêkirin, ihtîmaleke gelek mezin e, ku di bin serokatî û çavdêriya wî de hatibin durustkirin. Her çiqas Şerefyanê mezin behsa Mîr Evdal di behsa Fermanrewatiya Bedlisê di rûpela 130 ya Şerefnama bi destnivîs û di rûpela 501-504'ê Şerefnamê ya çapa Qahîre de, kirîye û ev Mîrê han jî babê Zînê ye, lê, işareteta Zînê yan Mem û Zînê nekirîye.

Di dawiyê de ez dikarim vêya han jî bêjim, ku ihtîmalek din jî heye ew keç Zînê bi xwe be. Ji ber ku li milê din ê çem destê xwe yê çepê daye ber singa xwe û destê xwe yê rastê dirêj kirîye û tilya xwe ya şehadetê bi alîyê xwe de tewandîye. Wek jî wî mirovî re bêje; "were ba min" û ew mirovê mekirbaz û hîleker jî Bekoyê Ewan e. İhtîmalek din jî heye, ku dêmena diduyan a tabloyê, her ji beşek yan jî temamkerê dêmena yekem be û peywendiya wê bi serpêlatiya Mem û Zînê ve hebe. Ew hersê mirovên çekdar, Tacdin û herdu birayên wî yên din Çeko û Arif bin. Lê, ev xala han zêdetir pêwîstî lêkolînê ye.

Ew wêna li ser vê behsê, yanî beşa Mem û Zîn, jî alîyê berêz Mamoste Kamil Ehmed de hatîye lêkolîn.

DÊMENA DUDUYAN

Dêmena tabloyê ya diduyan, li ser xanîyekî ser qeraxê Diçlê ye ku pencereke gelek mezin di qismê wî yê pêşî de ye. Ev pencera han, li gor besên din ên xanî, bi awakî remz hatîye durustkirin, yan jî remzê dêmeneka bajarekî ye. Mirovekî xebatker ê pêxwas gurzek dar li piştê ye, herdu delingên derpê xwe heta çokan daye jorê, herdu ranên xwe ji hev fireh kirine û mil rût e. Yan jî em dikarin wiha bêjin; ew kirasê dirêj ê reş lê ye, nîv mil e. Dixuyê ku darekî dirêj jî bi destê xwe girtiye. Ew ber bi bajarê Cizîrê ve tê û gihîştiye nav hewşa xanîyekî yê li milê çepê yê pencerê. Di milê din de, sê mirovên çekdar hene, armanca wan ew e ji bajêr derkevin. Yek ji wan kopalek di dest de ye û mertalek li milan e, kapek sitûr (wek werîs) li ser milê xwe girêdaye. Ez nizanim, ci manâ û armancek ji vê kapê heye?.. Dûr nîne, ew pêwîstîyeke nêçîrê be. Yekî din mertal û tîr pê re heye û yê sisîyan jî xwedî tîr e, şalwarekî fireh û guldar lê ye. Hewcedarîya gotinê heye, ku şalwarên xelkê Cizîrê gelek fireh û pan in. Lê, yên xelkê bajarê Sêrtê, bi ser ve hinek

jî yê xelkê Cizirê fiştir e û bi alîyê jêr ve jî teng û zirav e. Mirovekî din ê bêcek li jêr wan e, li nezikî kapanga (derence, merdiwan) xanî sekinîye û li gel yekî din diaxive. Tajîyek spî li pêşîya wî ye û serê xwe bilind kirîye. Dixuyê wek teyrekî li jorê pencerê binêre, dûr nîne, ku hêlinâ xwe jî li wir çêkiribe. Ev grûba han, wek dixuyê dê biçin nêçîrê.

Dêmena Sisîyan

Dêmena tabloyê ya sisîyan, ji navçek çiya pêk tê, ku behsa derveyê bajarê Cizirê dike û pêwendîyeke wê bi bajar ve nîne. Di beşê xwarê vê dêmenê de, bazewanekî birî, ji çermek reş le-pik çêkirîye û di destê wî de ye û teyrek nêçîrê jî xwe li ser destê wî daniye. Mirovek din ê birî, hinek ji wî wê de rûniştîye, destekî xwe bilind kirîye, bangî yekî ji wan herdu tajîyên reş ên pêşîya wan dike. Tajîyê serê xwe ber bi wî mirovî de qît bilind kirîye. Tajîya din jî zincîrek di sitoyê wê de ye. Bêguman ev herdu mirovên han ên bi tajî û teyrên xwe ve, nêçîrvan in û li ser destê rastê yê tabloyê ne. Mirovekî din li ser destê çepê yê tabloyê ye û qaşo di dest de ye. Du mirovên din jî li beşa serê tabloyê ne û ew serê çiyayekî di nav daristanekê de ne. Yek ji wan xortek bêrî û bêsimbel e, yê din yekî salên wî li pêş in û rîyek wî ya reş heye. Mirovekî din jî hinek ji wan wê de ye, di pêşîya wî de du rê têr dîtin. Wênekêş, asîman û pele ewrek jî di wê tabloyê de çêkirîye.

TABLOYA ŞEŞAN MECLİSA MİRÊ BOTAN

Tabloya şesan di rûpela 43'an de ye û behsa **Fermanrewatîya Botan** dike. Di vê tabloyê de mirovekî rîspî li ser cîyekî bilind -li ser textekî- ê nexşdar û guldar, li ser çokên xwe rûniştiye, Mehfûreka biçük a cûrên giyan li ser hatî nexîski-rin, di eywana wê de hatîye raxistin. Mirovekî cilûbergên mîran ê sipehî û xetên guldar li ber mîzereka gulingdar a ji qumaşekî rind hatîye durustkirin û bi awakî xweşik pêçayî danîye serê xwe, ku wisa dixuyê qismê bilind ê mîzerê kilaw-qoç be. Guman tê tune, ku armanca hunermend ji vê, Mîrê Botan e, ne dûr e kurê Xan Evdalê kurê Mîr Nasir be ku di wextê temambûna nivîsandina Şerefnamê de, mîr bûye(32).

Wêneyek tê de heye, mimkun e, ku carîye be. Fincanek daniye ser sînîyekê û ji mîr re dibe. Mêzera serê wê keçikê wek a mîran e. Du mirov rûniştine û yek ji wan, serê wî û nîvê laşê wî tenê ji ber derîyê pêş ê eywanê ve tê xuyakirin. Mêzerek biçük li der-dorê kulavê xwe pêçaye û destê xwe ber bi mîr de dirêj kirîye. Ev kesê han wek yekî feqîr be. Yekî milê keçikê girtîye wek daxwaza tiştekî jê dike û yan dua jê re dike. Yekî din ji li pişt wî ye û hinek ji bedena wî dîyar e, lepik jî di des-

tê wî de heye, yanî; ev destê han ji bo xwe ser danîn û firandina teyrê nêçirê amade kirîye. Teyr ji ber bi firînê de ye. Wisa dixuyê mirovê bazevan, ku tiştekî nîşanê teyr dike û dixwaze ew xwe li ser cîyê xwarinê -ku ev cî tiştekî wek camê ye û bi dîwar de hatîye daliqandin- deyne. Wisa dîyar e, ku ev mirovê han bazewanê mîr e.

Li xwarê textê mîr mirovek heye, kewa yan êlekekî spî lê ye. Du tajî; yek li paş û yek li pêşîya wî ye. Tajîyê pêşî berê wî ber bi mirovekî de ye, ku destê xwe bi alîyê rûyê tajîya spî de dirêj kirîye.

Pasewanek li xwarê eywana koşkê sekinîye, tiştekî dirêj di dest de ye, ku serê wî tiştê dirêj di wênê de nayê xuyakirin. Dûr nîne, ku rim be. Du musîqajen li pêş wî pasewanî ne, her yek ji wan borezaneka dirêj girtine destê xwe û dikin ku lêxin. Mêzera yekî ji wan wek ya mîr e. Aliyekî wê bi meyîl qît bûye. Du gulinge ji ji herdu alîyên çepê û rastê yênen mîzerê hattine xwarê. Ev gulingên han, ne serê mîzerê ne, ji ber ku mimkun e, ku cûrek cawê taybetî be û bi mîzerê ve hatibe qaîmkirin. Min di destpêkê de dizanî, ku evê han serê mîzerê ne. Du perrên teyran bi ber mîzera wan musîqajenan de ye. Se-rê du hespan di rex wan musîqajenan de têx xuyakirin.

Not:

Gotina text, min ji bo wî cîyê taybetî yê ku ji bo rûniştina Mîrê Botan hatî amade kirin, bi kar anî. Ew cîh bilind e û wek textek yan wek sekoyekê (dikekê) ye, ji melzemên ku koşk pê avadibe tê çêkirin û vêca ci ji kerpiç û geçê, yan ji ji kevir û geç be. Ev cîyê han bi awakî xweşik hatîye çêkirin û du taq pê ve ne û bi nexsekî dilgir hatîye neqışandin. Ez wisa dizanim, di bikaranîna gotina text de, ez ber bi çewtîyê ve naçim. Ji ber ku pêwîst nake, ku textê mîr ji texte û dar be. Kurd, cîyê textê mîr, ji bo cîyê bilind yan ji ji bo ew cîyê mîr li ser rûdînê bi kar tînin. Vêca ji ci melzemê dibe bila bibe, wek kevir û geç yan ji raste rast di kevirên şax de hatibe kolan.

TABLOYA HEFTAN

KELA HESENKÊFÊ

Ev tabloya han di rûpela 56'an (li gor tabloya rengin r. 55. n. J. N.) de hatîye çêkirin, lê, bi şâşî hejmara 52'an ser hatîye nivîsandin. Di derbarê Fermanrewatiya Hesenkêfê de ye. Kela wê ya sext û asê di tabloyê de tê xuyakirin û ketîye hindavê rûbarê Diiclê. Tablo, bi tevayî ji dêmenê vê kela asê pêk tê, ku niha li nahîya Hesenkêfê (Eskîf-Hesenkêyf) ye, tev bi şikeft e, ev nahîya Kercewsê(Gercusê) ye û girêdayî bajarê Mêrdînê ye. Ev bajarê han di sedsala 12 û 13'an de pêşkeft. Ji ber ku di wan deman de bûye paytextê Dewleta Artuqîyan û pişt re ji bûye melbendeke Dewleta Eyubîyan. Desthilata Eyubîyan, nêzîkî çarsed salan tê de hukum kiriye(33).

Wêna pasewanekî yê rim di dest de, li ber kelê ye. Du kesên din li ser kelê sekinîne; yek ji wan cilûbergên spî lê ye û li gel yekî din diaxive. Mimkun e, ew mîrê Hesenkêfê be û ya din ji jinek be. Ji derveyê van, mirovîkî din ji li ser kevirekî rexê kelê sekinîye û jinek di navbera wan de heye, guhar di guhê wê de ne. Cilûbergekî dirêj û mil kurt li wî mirovî ye û xetêñ wî dirêj in. Li gor qeneeta min, ew ji qumaşekî şeyax e. Em ê di tabloya hejmara 15'an de, behsa vî mirovî bikin, ew siwarek e û dike ji ava Diiclê derbaz bibe. Ji ber ku pir hilweşîya ye, li wî milî rûbar pan e, wisa dixuyê havînan di demên kêmboûna avê de, siwar bê belem dikarin jê derbaz bibin. Wêneyek nîv kevan li ser Diiclê çêkirî ye, ku qaz di xwarê wî de sêbahî (melevanî, ajne, soberî) dikan. Eva han pira dîrokî ya Hesenkêfê ye, ku min ew di Tîrmeha sala 1977'an de dît. Hinek ji vê pirê niha ji maye. Kevanêñ wê nêzîkî cil mêtroyan bilind in. Bi awakî bilind ê avayîsazkirinê hatîye çêkirin. Ibn Şedad el-Helbi di vî warî de wiha dibêje: "Beşek ji nîverastê vê pirê ji dar hatîye çêkirin, ji ber ku wextê êrîşa dijmin, daran ji ser rakin ku êdî dijmin nekaribe jê derbaz bibe û bigihîje kelê. Ji ber ku bajar li ser qeraxê Rojavayê Diiclê ye"(34)

TABLOYA HEŞTAN BAJARÊ HESENKÊFÊ

Ev tabloya han jî wek ya heftan di derbarê **Ferman-rewatî-ya Hesenkêfê** de ye. Di tabloyê de wêna mizgeft û minara Hesenkêfê hatîye çêkirin. Mirovek li hewş, yan eywana mizgeftele li ser mehfûrekê rûniştîye. Cilûbergên wî li yê mîran diçe û destê xwe danîye ser singa xwe. Ew herdu keçen di tabloyê de têx xuyakirin; carîye ne, xwarinê ji wî mirovî re dibin, yek ji wan firaxek, an tepsiyeke mezin li ser destan e, qeraxêne vê sînîyê vekirî ne, ne girtî ne, herdu serên rexê sînîyê ji nîverasta wê bilintir in û nexsek jî li ser hatîye çêkirin, mirovek bi destekî rexek sînîyê û bi destê din jî rexê din û kevçikî bi hev re girtîye. Yekî din jî sînîyek li ser destan e û mirovek laşê wî nîv xuyakirî jî li pişt wî ye.

Ez di wê bawerîyê de me, ku ew mirovê mezin ku xwarin jê re tê birin, Sultan Huseynê kurê Mîr Mihemmedê kurê Mîr Xelîl e. Di wextê temambûna Şerefnamê de, ew mezinê binemala Mîrên Eyubîyan a Hesenkêfê bûye. Kesê navê wî derbaz dibe, di navekê re mîrektî kirîye; lê, ji ber ku hez ji kar û barêñ din-yayê nedikir, dest jê kêşa. Şerefjan di rûpela 60'an a Şerefnamê de wiha dibêje: "Niha ku Sultan Huseyn li Kurdistanê dijî, beşek ji mîrasa weqfa babûbapîrên xwe werdigire". Yanî bê kar e û rewşa jîyana wî bêser û ber e. Di vê tabloyê de wêna du mirovan li ber mizgeftele û ser qeraxê Dîclê rawestayî, diyar e, wek dixuyê milêñ xwe ber bi milêñ hev re kirine. Ji bili van wênan, wênen du mirovên din jî li ser çiyayê hemberê mizgeftele têñ dîtin. Divê bê gotin, ku awayê wê minara di tabloyê de, li awayê minara îro ya Hesenkêfê naçe.

TABLOYA NEHAN

KELA EGİLÊ (GÊL) (Lİ DİYARBEKIRÊ)

Tabloya nehan a di rûpela 65'an de, behsa Mîrên Egilê dike. Ev tabloya han ji dêmenike Kela Egilê ya asê pêkhatîye. Ev kela han ser kevirên bilind hatîye ava kirin, dikeve bakûrê bajarê Dîyarbekrê û 57 kilometre ji bajarê Dîyarbekirê dûr e û li hemberê rûbarê Dîclê ye. Keleka kevnare ya Kurdistanê ye, nivîsandinê bizmarî û helkolanê dewra Asurîyan li ser tê dîtin. Çend gorêن (tirbên) mezin ên kevin û giring tê de ne û tîrba Harûn, İlyas û Zulkufûl pêxember jî li wir in(35). Evê han tev nîşanêن rojêن borî yêن bi qîmet ên şaristanîyeta kevin a bajarê Egilê ne.

Di tabloyê dc, Kela Egilê li ser kaşebercî li hemberê rûbarê Dîclê hatîye çêkirin û ev terz avasazî tê de tê dîtin; kulek(bace)ên serbanan; lê bi awakî sêgoşe û ciwan hatine duristkirin; awayê çiyan pê dikeve û wek konêñ(reşmalêñ) koçeran li ser sê sitûnan e, girêdana kevanê balgên sitûnen wan wek rengekî spî tê xuyakirin. Hunermend, sifetek nexşkarane bi karê xwe bexşandîye. Pencerên kelê jî bi awakî dirêj di keviran de daye kolan, balgên sitûnan û rêzên xwarê yêن xaniyan bi awakî nîv kivan durust kirîye.

Çend kes li ser kelê û der-dorê wê dîyar in. Ew çar kesêñ ku li ser kelê sekinîne, ji wan du kes ên di dawîya nîverastê de ne, jin û mîrek in. Jînik li ser destê çepê sekinîye, ew ji pêçan û pora xwe ve tê naskirin, ku jin e. Serkulavê wê wek yê mîran mezin e, tenê ferqek di navbera pêçana wê û yê mîran de heye;

ew jî ew e, ku serkulavê xwe yê milê alîyê nav çavê xwe şidanditir pêçaye û jî çavên wê mirov dikare derîne ku jin e. Li gor wêna hejmara 188/2 ya di nav kitêba bi navê "Diyarbakir Tarîhî" (Dîroka Diyarbekirê) ya Basri Konyar de, ev cure serkulavê han heta sedsala me ya bîstan jî li Egilê hebûne. Bi vî awayî serkulav, li navçen Soran ên wek Xoşnawetî jî hene. Vê jina han, destê xwe hinek bilind kirîye û bi mirovê hemberê xwe re -ku evê han kesê diduyan ê ser destê rastê ye- diaxive. Dûr nîne ev mirovê han Cehfer Begê kurê Qasim Begî be, ku di wextê temambûna Şerefnamê de Mîrê Egilê bûye û ihtimal e ew jin jî jina wî bc. Temenê Mîr Cehfer wi wextî li dora 40 salan bûye. Ser destê çepê yê kelê, xortekî cil spî û keçeka kezîdar sekinîne. Dixuyê ku dilwaz û dilevînên hev û du bin. Wênekêş, perrekî teyran ê mezin kirîye ber serkulavê xort, ku destekî xwe bilind kirîye û li gel keçikê diaxive. Xort û keçik ne li ba hev in, mesafek di navbera wan de heye. Ciye kî bilind jî di navbera wan herdulan de hatîye çêkirin. Wisa dixuyê ewan xwe dane ber ciye kî bilind, da ku kesek wan nebîne. Ew ciye bilind ê di navbera van herdu kesan de, wek wan ji der-dorêwan biparêze û ji wan re bibe parêzgerek, hatîye durustkirin... Wisa tê xuyakirin, ev dêmena han serpêhatîya du dilevînên Egilê teswîr dike.

Kur û keçek di nav nîverasta ciyayekî bi kevir ê xwarê kelê de ne û bi hev re diaxivin. Wêna nêçîrvanekî jî li nêzîkî dawîya tabloyê ye, tivingek dirêj di destê wi de ye û ber bi teyrekî serê darekê ve dirêj kirîye û teyr ji wek bilbilan e. Nêçîrvan, kisekî biçük ê wek cuzdan li gel tiştekî wek demlika çayê li pişa xwe girêdaye. Kisik ciye gulên tivingê ye û tişte gilover jî ciye barûda wî ye. Kurdan di wextê xwe de barûdên tivingên kevin (tivingên Kurmancî) dikirin nav kîsêne gilover yên biçük. Ji bo li ber baranê ter nebe û kêç hilnegire, bêparastin. Hinek caran jî di nav perçen çatê (pote, çaput) kevin de bi şidayî dipêçan û bi mileki kêleka xwe ve girê didan. Tivinghilgiran, ev kîsê han bi piştînîya xwe ve qayîm dikirin, lê, ji alîyê kêleka wan de dialiqî. Wênen kîsê barûdan, tiving û hewcedarîyê din ên nêçîrê yên wî wextî li ser kêlekî goristana Cizîra Botan hatîye kolan, ku ihtîmal e eva

han gora Mehmed Begê Mîrê Botan be. Min wêna vê kêla han di kitêba xwe ya "Bangewazek Bo Roşenbîranê Kurd..", di rûpela 108'an de belav kirîye. Her wiha wênê van kîsêñ barûdan ên ji hirî hatine çêkirin, li gel wênêñ dabance, sûr, xencer û çend aletêñ din ên şer, li ser gelek kêlêñ goristana mezin a Hewlêrê ji hatine kolan. Min gelek ji van wênêñ kêlan ên keleporêñ me girtine. Li hinek navçêñ wek Silêmanîyê, gulêñ tivingan jî kirine nav kisan. Bi vî awayî xwedî tivingan, du kîsêñ biçûk bi xwe re digerandin, yekî li vî milê û ya din jî li milê din yê kêleka xwe gireidian.

Di milê xwarê yê tabloyê de tê xuyakirin, ku mirovekî ku-lavqoçek danîye serê xwe û mêtzerek li ser girêdaye. Vî mirovê han bi destê xwe yê rastê defek(36) girtîye û bi destê çepê jî lê dixe. Deflêderê tabloya sisîyan jî her bi vî awayî li defê dixe, ji ber vê yekê, em dikarin bêjin, ku deflêxistina wan bi destê çepê, nayê wê manê ku ew çep in. Bi vî awayî def girtin û bi destê çepê lêxistin li Kurdistanê adet bûye. Her wiha em dibînin, ku di wêna tabloyeka "Dibistana Tebrîzê" de, deflêder bi destê çepê li defê dixe. Misriyan jî di sedsala diduyan a berî zayıñî -di dema Talîmus de- bi destê çepê li defê dixistin. Eva han di wan wênêñ li ser keviran hatî koland de tê xuyakirin(37). Yek ji wan pênc musîqajenêñ li ser seeta hunermend Îbnî Rezazê Cizîrî, bi destê rastê li defê dixe(38). Wek me di pêşî de behs kir, Cizîrî li bajarê Diyarbekrê kitêba xwe nivîsandîye û wênêñ wê bi dest çêkirîye, wek çawa wênêñ di nav Şerefnamê de ku li Kurdistanê hatine çêkirin.

Musîqajenekî din li hemberî deflêder e, ku li aletekî musîqayê ya ji dar hatî çêkirin, dixe. Ferqa wê ji wê tanbûra di tabloya hejmara duduyan de ye, heye, wek wê dirêj nîne û du bazindêñ sandoqa wê hene û di navbera wan de kemerek teng heye û têlêñ wê nayêñ xuyakirin. Dûr nîne ku eva han wek wan cûre tenbûran be, ku Dr. Hiseyn Elî Mehfuz, "tenbur Şêrwanîyyîn" bi nav dike û wiha dibêje: "Sandoqa wê ji dara hirmê ye û li Tebrîzê ev cûre tenbûrêñ han gelek têñ bikaranîn"(39). Di tabloya hejmara 16'an de jî ev aletê han ê musîqayê heye.

TABLOYA DEHAN

CAR DİN EGİL

Ev tabloya han jî her li ser mîrên bajêr û Kela Egilê ye. Beşek ji bajarê Egilê yê li hemberê Dîclê di tabloyê de tê xuyakirin. Mizgefta Egilê bi gumbeta xwe ya biçük ve tê dîtin. Melayek, ku bi şasik û mêzera wî ve tê naskirin, li ser destê çepê yê mizgeftê rûniştîye. Miroveki dînî jî her wisa li milê rastê, li ber derîyê xanîyekî tenîsta mizgeftê ye, ku li gor ser-pêçana wî ya sade tê zanîn, yan muezin yan jî micewrê mizgef-tê be. Yekî din li hemberê wî û li milê din ê derî, destê xwe ber bi wî de bilind kirîye û pê re diaxive. Wisa jê tê zanîn, ku tiştek di nav destê wî de heye û dixwaze nîşanê wî bike yan jî bidê. Ji porê wê mirov derfexe ku jin e, her çiqas awayê girêda-na serê wê li yê mîran biçe jî. Ne dûr e ev xanîyê han beşek ji mizgeftê be.

Li ber mizgeftê, xanîyekî nexşdar heye, ez di wê bawerîyê de me, ku eva han dibistan(medrese) e. Du mirovên dînî bi hev re dilizin, ku ew tiştê lîstikê li ser dilizin ji 72 xanan pêk-hatîye. Ev lîstika han ji bera xwe ve heşt û dirêjahûyê jî neh xane ye. Satranca adetî nîne, ji ber ku satranc berî Islamfyetê ji Hindistanê hatîye Iranê û Kurdistanê û li gelek welatên din ên cihanê jî belav bûye û ji 64 xanan pêktê. Lê, ji aliyê çend

netewan de guherandin tê de hatîye çêkirin. Îbnî Ebî Heclê, di kitêba xwe ya bi navê Enmuzec el-Qital Fi Neql'îl-'Ewal, di rûpelên 147-148'an de, ku li ser satrancê nivîsandîye, wiha dibêje: "Bi çend awan satranc hene, wekî el-şatranc, el-tame, satranca xelkê Seîd ê Misrê, satranca dirêj û satranca Romê, yanî Bîzansîyan"(40). Lê belê, ev cûrêni satrancê ronî nekirine. Mimkun e, ev listîka han a Egilê curek ji van satrancan be, lê nayê zanîn ka ji kîjanê ye. Yan jî gelo di wî wextî de her li Kurdistanê hebûye, yan li ba hinek netewên din jî hatîye bikaranîn, em nizanîn.

Yek ji wan du kesên di tabloyê de dilîzin, mîzer û cil-bergên wî reş in û dûr nînc ew qazîyê Egilê be, yan jî melayekî Kurdên Zaza yên Şîî be.(Di nav Kurdên Zaza de ne Şîî lê Elev î hene, ku li gor hinekan ew jî baskek ji Şîîyan e. Lîbelê Zazayêni Egilê bi xwe Sunî ne -Elîşêr) Yê din ku mîzerek spî li ser kulavê serî ye, mimkun e melayekî Kurdên sunî be. Wî çaxî mirovên dînî jî satranc dilistin, ji ber ku di mezhebê Afê de, ger li ser tiştekî neyê lîstîn, qumar nayê hesibandin û helal e. Lê, lîstîka tawlê, her li ser tiştekî jî nebe, di hemû mezhebên fiqhê de heram e. lê, ez nizanim di mezhebê Ce'ferîyê de nîrîn li ser vê xususa han çî ye.

Li milê rastê û nezikî wan herdu kesên ku dilîzin, xortek rûniştiye. Yekî din ê bi temen, qabek li ser destan e; wisa dixuyê, ku xwarin tê de heye û ji bo wan dibe. Li ber mîzgeft û dibistanê mirovekî dînî û bi temen, bi xortekî ciwan re hêrs dibe, ku dûr nîne mamostek û feqîyê xwe be. Xortekî ciwan ê din jî li milê rastê yê serê tabloyê heye. Li gor qeneeta min ev xorêtî han ên ciwan feqîyên dibistana Egilê ne. Li milê din ê bajêr jî, li ser qeraxê rûbarê Dîclê du kes hene, yek ji wan tiştekî dirêj di destê wî de ye.

TABLOYA YANZDEHAN BAJARÊ HÎZANÊ

Tabloya yanzdehan a di rûpela 76'an de, behsa **Fermanre-watiya Hîzanê** dike. Ev tablo û ya donzdehan jî ji dêmenên bajarê biçûk ê Hîzanê pêkhatine, ku niha gundekî bîst mal e û girêdayê qeza Qeresuh (Hîzan) a bajarê Bedlisê ye. Di navçeve çiyayî ya bakurê rojhilate Gola Wanê de ye, deştek li ber e. Her çar dorêne wê bi çiyan hatine fetilandin û cîyekî gelek xweş e. Ev du tabloyen han manekî aborî ji me re pêşkêş dikan. Bi vî awayî, ku di tabloya yanzdehan de dikan û bazara bâjîr dîyar in û di ya donzdehan de jî, dêmena zevî-zar, coyê avê û kîlana baxekî ji alîyê baxvanekî de wêna wê hatîye kêşandin. Hîzan, wek Şerefjan jî nivîsandîye, cîyekî gelek bi bax û bostan e. Fêkiyên cûr bi cûr tê de ne, ku hinek ji wan li navçen Kurdistanê yên din nînin. Wek bindeq (findeq, findiq) û kişmiş. Her wiha li gor gotina dîroknîvîsên din, fêkiyên wek gêlas (gilyas) û şahbelut jî ciyê gotinê ye.

Jêra vê tabloyê de, dikan û bazara Hîzanê dîyar in, ev dikânên han li pişt girekî, bi kerpîcên sor hatine avakirin, pêşîya wan bi awaki kevanî û tekûz hatine danîn, hinek din ên der-dorêne wan ên milêne ji der ve, bi giştî hatine nexîş-kirin. Dikandar fêki difroşin. Li dikana ser destê rastê, ku taqekî wê kevan heye, komek zebeşen dirêj ên bê xet dîyar in û yet ji wan hatîye jêkirin, ji bo ku dîqeta kiryanan bikişîne. Xortek hatîye zebeşekî ji dikandar dikire. Ez wisa dizanim, ku yet kirîye. Fêkiyên dikânê li ser çend refan hatine raxistin û sepetek (çapîk, selik) jî her wiha li ser refa jorê heye. Li dikana

navîn zebeşen mezin ên belek û şêhînek(terazî) ji têr dîtin. Wî çaxî piranîya zebeşen Kurdistana Tirkîyê bi vî awayî mezin bûne. Berî ez van zebeşen han di van tabloyan de bibînim, min wisa dizanî ku ev cure zebeşen han dirêj ên sade di van nêzîkîyan de hatine Kurdistanê. Lê, ev wêna han belga dîrokî ya çarsed sal berê niha ye, ku ev cûre zebeşen han li Kurdistanê hebûne û vêcar, ger di hemû cîyan de jî nebin, lê, li Hîzan hebûne. Zebeşen bi vî rengî heta van salên borî jî li navçen derdorêñ Hîzanê yên çîya jî tûnebûne. Ji navça Miksê bigire heta Hekarîyan û Botan, her ên mezinêñ dirêj hebûne. Nêzîkî sî sal berî niha ev cûre zebeşen han anîne Silêmanîyê. Yekem car jê re gotine "şuyîti qelaçolan", ji ber ku li wir hatine çandin û berê ji wan hatine girtin. Yanî pêşîya wê her zebeşen mezin ên curek din hebûne. Wisa tê xuyakirin ku di wî wextî de ev herdu curêñ han ên zebeşan an sebzêñ bi bejna xwe ve dirêj, li Kurdistanê kêm û bi qîmet be, yan her li Hîzanê tenê hebe, yan jî li wir zêdetir be. Ji ber vê yekê jî alîyê hunermendê Kurdistanê ve wêna wan hatibe kêşandin.

Ew dikana zebeşen xetdar ên mezin tê de, bi pêlpêlikan (derrence, merdiwan) ve derdikevin wir û ew pêlpêlik jî diçin serbanê wê dikanê. Mirovek di pencera wê de ye, ew dikandarek xort e. Dikandar, liser çokêñ xwe rûniştiye, mirovekî birî jî, mimkun e, ku tiştekî jê kirîbe û di milê din re vedigere. Şêhîna dikandar bi arîkêñ dikanê ve aliqandîye. Niha jî ev cûre şêhînêñ han di dikanêñ quesaban, pembo û hirîfiroşen bajarêñ me de hene. Dikandarê dikana sisîyan komek fêkî di destê wî de ne û nîşanî bikiran dide, wisa dixuyê ew fêkî bindeq, yan hejîr bin. Destê xwe yê din jî dirêjî tiştekî din kirîye û bikir jî destê xwe ber bi eynî tiştî ve anîye, ku ew dişibe bi şûşa guldanê.

Xortek li serbanê dikanê, ser destê rastê sekînîye. Yekî din jî li ser destê çepê yê dikanê ye, wêna wê hinek têkçûye û ji şêla wê derdikeve ku jin e.

PROBLEMEKE AVASAZÎYÊ (MÎMARÎ)

Problemeke avasazîyê, di van herdu tabloyan de ku li ser

Hîzanê ne, derdikevin. Şerefyan, di vê behsa han de wiha nivîsandîye: "Xanîyên ku di nav Kela Hîzanê (Xîzan) de ne li ser terza avasazîya rasatxanan in, yanî li gor rasatxanên sitêrnasi bingeha wan hatîye danîn û avakirin"(41). Di vî warî de wiha didomîne : "Kela Hîzanê, naşibe bi kelên din ên bajareñ Kurdan, li yên Ecemîstanê diçin, ku bingeha wan li ser kerpiç û kilsê hatîye danîn. Ji derveyê van, Hîzan, bajarekî Islamê ye û fêkiyên welatê Eceman tê de hene"(42). Her bi berdewam gotina xwe bi vî awayî didomîne: "Di nav xelkê Hîzanê de eva han belav e, ku xwedîyê bajarê Merax û Tebrîzê ev bajarê han ava kirîye". Lê, min zanyarîyek wiha di tu serokanîyan de nedîtiye. Tevî ku eva han jî tê zanîn, ku Hulago bajarê Merax avakirîye û kirîye paytextê desthilatdarîya xwe, zanayê mezin ê sitêrnasîyê Nesreddîn Tusî jî muşawirê wî bûye. Ji ber vê yekê ihtiîmal e, ku Nesreddîn bi wezîrekî Islamê yê mezin re bingeha bajarê Hîzanê avakiribe û her bi xwe jî fêkiyên Ecemîstanê tê de çandibin. Ji ber vê, hewce ye em Nesreddîn wek danerê bingeha vî bajarî bidin nasandin. Her çend eva han dûr jî nîne.

Di rastîya xwe de, bingehdanîna xanîyên di nav Kela Hîzanê de, yanî a bajarê Hîzanê, ser terzê avasazîya rasatxanê sitêrnasîyê ye, eva han jî meseleke girîng a avasazîyê ye, lê, gelek mixabin Şerefyan bi xwe jî eva han ronî nekirîye, heta ku em bizanin ev cûre avasazîyên han çawan bûne. Ji derveyî vê problema han, em nizanin terzê avasazîya rasatxanê sitêrnasîya dewra İslamîyetê çawan bûne; wek rasatxana Meraxê, ku mezintirîn rasatxana dema İslamîyetê bûye, rasatxana Ulux Beg a li Semerqendê, ku duyemîn rasatxana mezin a eyñî wextê ye, rasatxana Qahîrê ya dema Dewleta Fatimîyan, yan rasatxana Dîmeşq (Şam) a dema Me'mûn, rasatxana Beyrunî û her wiha rasatxana zanayê mezin ê Kurd Ebu Henîfe (Ehmedê kurê Dawudê kurê Wenendê Dînewerî) ya İsfahan û Dînewerê ye. Min ji bo ronîkirina vê meselê çend serokanîyên sitêrnasîyê vekolan, lê, ez di vî warî de rastî tu zanyarîyekê nehatim, ji bilî ku Nesreddîn Tusî di sedsala 16'an de, rasatxana Meraxê damezirandiye. Di rasatxana wî de qubhêne wek gumbetan hebûne, ji bo ku bi wasita van, tîrêjîn

rojê bêñ nav rasatxanê û di rîya van tîrêjan re hinek hesabêñ sitêrnasîyê bêñ ronikirin. Yanî bînayêñ rasatxana Meraxê ya li Azerbeycana Îranê, bi gumbet bûne. Îhtîmalek gelek nêzîk e, ku Şerefxan bînayêñ vê rasatxana mezin a dema Musilmanîyê dîbe, ku niha jî şûnwarêñ wan mane, yan jî wêne û wesfêñ hinek rasatxanêñ din, di hinek kitêbêñ destnivîs de bi destan ketibe û xwendibe.

Ji bo bidestxistina zanyarîyêñ li ser terzêñ avasaziya rasatxanêñ sitêrnasîya dewra İslâmîyetê, min ji hinek kutubxane û muessesêñ zanistîyê re name şandin. Wek; Merkez Buhusu'l-Feza we el-Felek li Bexdad, Daru'l-Kutub Wel Wesai-qu'l-Qewmîyye li Qahîre, Muzexana Birîtanîya ya li Londra, İttihad el-Felekî'l-'Alem, Kutubxana Bodleian a li Oxford, Kutubxana Murgan a li New York û Muzexana Lower a li Parêş. Her wiha ji bo lêkolînê, min çend nusxêñ tabloya hejmara 11'an a Şerefnamê jî ji hinek kesan re şand. Lê çi heye, tenê bersîva Muzexana Birîtanîya û ya Kutubxana Murgan gihîştin destê min. Dibêjin, ku zanyarîyek wiha di destê me de nîne. Her wiha bersîva Daru'l-Kutub a Qahîrê jî min wergirt, ez 'dikarim bêjîm, ku ev kutubxana han, ji hemû kutubxanêñ din ên Rojhilata Navîn mezintir e û zêdetir hîsa berpirsiyâriya ilmî digre ser milê xwe, kêm kesan bêbersîv dihêle û ev karêñ han ên xebatkerêñ wir, hêjayî spas û rêz lêgirtinê ye. Li gor bersîva Kutubxana Daru'l- Kutub, rasatxana Semerqendê, ku di sala 1405'ê zayînî de ji alîyê Ulux Beg (kurê Şehruxê kurê Tîmur-leng e û di navbera salêñ 1447-1449'an de hukum kirîye) de ser çiyayekî hişkeber hatîye avakirin. Avayîya rasatxanê gilover û damezirandinek şes goşe ye û sê qat û di niverasta wê de xendeqek kûr a ku bi pêlpêlekan diçûne nav heye. Bi awakî ser berjêr û hev himbêz kirî (di nav zikê hev de) ye. Daru'l-Kutub, wêna rûpelekê ji kitêba İngilizî ya van zanyarîyan wergirtîye, şandîye û her wiha wêneka xetkarî ya rasatxanê jî tê de hatîye.

Di vê tabloya yanzdehan a Şerefnamê de, wêna xanîyekî hatîye çêkirin. Îhtîmal e ev nimuna xanîyêñ Hîzanê be, ku Şerefxan gotîye eva han li ser usluba mîmarîya rasatxanan e. Li gor vê wêna han, xanî li ser girekî ax hafîye avakirin. Paras-

tineke bazindî li der-dorê wî ye û bi kerpîncê sor hatîye ava-kirin. Her wiha çargoşe ye û bi awayê burcê hatîye çekirin. Odeke biçûk a wek derîyê pêlpêlkên ser serbanê(hewreban) di qata ser de ye û pencereke sêgoşê, tûj jî tê de ye, ku dûr nîne ev cur pencerên han ji bo temâşekirina sitêrkan hatibin bikar-anîn.

Bêguman awayê mîmarîya vî xanîyê han ji ya mîmarîya rasatxana Semerqendê dûr e. Lê, mimkun e, ku hinek rasatxanê din hebin û terzê mîmarîya vî xanîyê han nêzîkî wan be, ku bîna bi awakî burcê hatîye avakirin, odek di qata diduyan de ye, pencerek sêgoşe ya tûj tê de ye û awayê xanî; nêzîkî yên wan xanîyêni ji bo temâşê kirin û malûmat berhevkirina çûn û hatina sitêrkan e. Li gel vê jî, guman tê de nîne, ku Şerefhan yan hunermendekî din ê ku ev tablo çekirîye, ev wêna han li gor hemû teferuatên mîmarîya rasteqîni ya xanîyêni Hîzanê durust kiribe. Qet tu pencere di tebeqa yekem de nîne; jî ber ku hinek mîmarîyen ku nêzîkî mîmarîya wir in, hinek rasatxanan di wênen xwe de cî bi cî kirine. Dûr nîne, avahîyêni hinek rasatxanêni sitêrnasîyê bi awakî burcê bûne û oda temâşekirina ji bo sitêrkan, di qata ser de û birek pencerên sêgoşen tûj li çarmedorê bûne. Wek Kela Şêrwan, ku tenê pencerên wê oda heft goşeyî, ku di qata arîkên duduyan de avakirî ye, sêgoşe nîne. Yanî armanca min ev e ku bêjim; ger wiha be, Kela Şêrwanê jî bi awayê xwe ve li gor terza mîmarîya van rasatxanêni sitêrnasîyê ye.

Li dawîyê ez dikarim vêya han bêjim: Roja 10'ê Tebaxa sala 1977'an, ez ji bo dîtin û wênegirtina hinek şûnewarêni kevin ên Hîzanê; yên wek gora Sînem, Medresa Xawsê Hîzanê -ya ser Girê Xeydayê ya Rojhilatê Hîzanê- çûm Hîzanê. Xanîyêni bajarê kevin xera bûne, hinek ji surh û burcêni kelê mane. Xelkê jî kevirêni Medresa Mîr Dawud a milê bakurê gelî û yên li hemberê kelê, birine. Şerefhan behsa vê yeka han kirîye. Niha tiştek wisa ji terzê avasazîya wî wextî ya Hîzanê sax nemaye. Vêca ez hêvîdar im, rojek ji rojan zanayêni arkeolog vekolin û ser van şûnewaran lêgerînê bikin ku tiştek di vî warî de bi dest keve...

TABLOYA DONZDEHAN HÎZAN

Her wek me di pêşîyê de ji got, ev tabloya han li ser Hîzanê ye. Di vê tabloyê de, rezvanek bi merê, rezê xwe dikole, pêşkên kirasê xwe kirine ber pişfinîya xwe, serkulavekî biçûk li seri ye. Herdu şeqêن xwe ji hev fireh kirîye û bi erdê ve qahîm şidandîye. Ev dêmena han nîşana jêhatîbûn û mehareta rezvanîyê ye. Coyeka avê di rexê rez re derbaz dibe. Di dawîya tabloyê de siwarek diyar e, kulavê wî mezin e, gulinneyek mezin li ser serkulavê wî bilind bûye. Kewayek bê mil û kirasekî kurt lê ye û şalwarekî fiş ê fireh li xwe kirîye. İhtîmal e ev siwarê han Mîr Hesenê kurê Melik Xelîl be, ku di wextê nivîsandina Şerefnamê de mîrê Hîzanê bûye. Siwarekî hêstirê(qatir) li pişt wî ye, hêstira wî spî ye, serkulavekî spî yê mezin li serê wî ye. Perrê teyrekî di ber ra kirîye, porê wî di binê ser-kulavê wî re derketîye û cilûbergên wî li yên wî siwarê pêşî diçe. Hunermend, piranşya rû û çavêن wan kesên di tabloyan de ne, wek yên jinan bi goşt û gilover çêkirîne. Yê vî siwarê han ji gilover û bi goşt e, ku bi vî awayî li jinan diçe. Ne dûr e, ku jina Mîrê Hîzanê be, bi taybetî siwarbûna hêstirê, ji bo sernermî û hêminîyê, ji jinan re ji hesp û mehînan çêtir e.

Tiştikî dirêj di teniştâ wê de tê xuyakirin, ku mimkun e kaşo (dar qaşwan) yan jî rim e, serê wê li ser zîn yan jî li ser cila hêstirê qayîm kirîye. Du mirovên peya li pêşîya hespê wê si-warê ne, yek jî wan bi rî ye û simbêlekî reş ê badayî yê bê ser û ber heye. Yê din xortekî qelew ê bê simbêl e. İhtîmal e, ku ew xulamê mîr be. Ew kesê bi rî qaşoyek di destê wî de ye û jinek jî ber bi wan de tê. Qaşoyek din li pişt jinikê dîyar e, ihtîmal e ku di destê yekî din de be, ku bedena wî di wêne de dernekîye. Ne dûr e ev grûba han ji bo qaşo lîstinê ji koşkê derdi-kevin.

Ev lîstika han, wek di tabloya çaran de jî hatîye nîşandan, bi darekî dirêj, ku jê re qaşo (kaşo, çugan) jî tê gotin û bi gogê (top), ku ew jî gilover e, tê lîstin. Ev goga han, yan ji dar tê durustkirin û bizmarêñ pan û mezin serê vî darê han tê xistin, yan jî ji livayê tê çekirin û ji bo qayîm bûnê bi şûjinê tê dirûtin. Tê bîra min, ku wextê em hîn zarok bûn, me ji kevir jî çedikir. Qaşo, yan yek perçe ye û serê wê hatîye tewandin yan jî ji du perçan tê çekirin; yek dirêj û ya din jî kurt e, ya kurt bi ser ya dirêj ve tê qayîmkirin. Ev qaşoya di Şerefnamê de wêna wê hatîye kêşandin, di awayê ya diduyan de ye. Ev lîstika han gelek kevn e, bi Erebî jê re "el-kirre wel sulcan" tê gotin.

Dîroknivîsê mezin ê dîroka şaristanîyeta Islamê George Zêdan, di vî warî de wiha dibêje: "Ebbasiyan ev lîstika han di wextê Harûn Reşîd de ji Farisan wergirtin" (43). Şerefstan, di rûpela 148'an a Şerefnamê de, behsa şayiyêñ babê xwe dike û wiha dibêje : "Di wan çaxan de xortêñ Kurdistanê bi gelempêrî lîstika qaşwanê dilîstin". Eva han jî hêjayî gotinê ye; Gog-meydan, ku ciyekî sahe ya bajarê Bedlisê ye û Medresa Exlasîye ya Şerefstan û gumbeta çend mîrên Bedlisê li wir in, her bi navê vê lîstikê hatîye binavkirin. Ji ber ku ev lîstika han di wê meydanê de hatîye lîstin.

Binê Birca jî, ku ji vê firehtir e, meydaneka li pişt surhêñ Cizîra Botan e û gora Mem û Zînê li wir e, di wextê Mîrên Botan de ciyê meydana lîstika gog û rim avêtinê bûye. Şairê mezin ê Kurd Ehmedê Xanî, di rêzek şî'irêñ xwe ya Destana Mem û Zîn de, vî ciyê han bi "Meydan" navkirîye. Ji derveyê vê behsa çend ciyêñ din ên Cizîrê û der-dorêñ wê yên wek Çemê

Westanê, Nêrgiz û Seqlanê Memâ(44) jî kirîye. Ewlîya Çelebî, ku bi xwe yekem car çardeh roj li Bedlîsê maye, bi dirêjahî behsa lîstika qaşwanê ya ku li wir tê lîstin, kirîye. Ewlîya Çelebî di vî warî de wiha dibêje: "Rêzek kevir li vî serî û yeka din jî li serê din ê meydanê datînin û bi sedan siwar ên ji herdu milan dilîzin. Gog gilover e û ji dar hatîye çêkirin, mezinîya wê hingî serê mirovêkî ye û qaşowa wan jî ser gilover e û zer kiri ye"(45). Eva han wek qaşoya di tabloyê de nîne. Ehmedê Xanî jî işaretê vê lîstika han kirîye. Di Mem û Zîn de wiha hatîye. Dibêje ku Mîr Tacdîn qasidek dişîne ba Mîr Zeydîn û wiha dibêje :

*Her çar serî deme wekê go
Çewganî îrade tawî qaşo (46).*

Di wextê xwe de wextê ku lîstika qaşwanê li Kurdistanê belav bûye, siwar bi siwaran re û peyan jî bi peyan re lîstine. Du taxim di lîstikê de li hemberê hev disekinîn û her taximek hewlê dida gogê ji bo xwe bibe. Wek mîsal; di salên sîyan de, her carî sî-cil siwar ji bajarê Koyê derdiketin diçûn nêçîre. Yan di çûn, yan jî di vegera xwe de lîstika qaşwanê dilîstin.

Her wiha cirît jî dilîstin û di vê navê re dehol û zurne jî bi xwe re dibirin, Ezeyê Zeynel Çawuş, ku di zurne lêxistinê de bi nav û deng bû, li zurnê û Heme Ebu jî li deholê dixist. Serbarê ser de jî, hespên xwe wisa hîn kiribûn, di wextê cirît û rimbazîyê de li gor hewaya zurne û deholê dimeşîyan(47). Niha jî lîstika qaşwanê di nav zarokên gundîyan de tê lîstin.

Nabe em vêya han jî jibîr bikin, ku lîstika qaşwanê di dewra Dewleta Moxolîyan (İlxanî) de hebûye û wêna wê jî di nav wênêne kitêba bidestnivîs a Menafi'i el-Hîwan a İbnî Bextîş'û de hatîye, ku nusxa esli di Kitêbxana Murgan di bin reqema 500'an de ye. Wêneka ji ber vê hatî girtin di destê min de he/ ye. Di qaşoya Moxolîyan de, serê parça biçûk tewandî ye, lê di wênêne Şerefnamê de ya Kurdish rast e.

Di tabloyê de jineka serkulavê wê spî û tenik heye, li ber pencera xanîyekî ye û li xelkê dinêre, xanî sê qat e, qata xwarê ji kevirê neqîşkirî ye û yên din ji kerpiçê sor hatine çêkirin. Du pencerêne wek şehê di nav hev re derbazbûyi, ku bi Erebî jê re nafîze şemsîyye tê gotin, di qata sisîyan de ye, ji van cûrêne

pencerên li Kurdistanê kêm in. Evê han ji bo jin xwe li ber bi-parêzin, hatine durustkirin. Yanî, ji bo ew di pişt pencera de ji derive bibînin û yên ji derive nekarin wan bibînin. Li Bexdayê ev cûrê pencerên han gelek in. Li xanîyên kevin ên Kerkuk û Koysencaq piranfyâ van pencerên han ên biçûk, ji geçê hatine durust kirin, ne ji dar in û yên Silêmaniyê gelek bi qîmet in. Di tabloyê de, hinek xanîyê din ên di binîya vî xanîyi de tên xuyakirin, ku ji kerpicên sor hatine çêkirin.

Li tenişa vî xanîyê sê qat, xanîyek yan ji dekorek dîyar e. Ger evê han xanî be hewşa (têhelkêş) wî tûne û lazim e xanîyên wê serdemê bihewş bin. Ji ber vê yekê, mirov dibêje; di navbera herdu cargoşan de dekorek ji xalekî reş hatîye çêkirin. Ez nizanim gelo eva han kunek biçûk e yan tiştek din e?

İhtîmal e, ku eva han kanîya jinan be, ji ber ku ser coyek avê ye, derîyê wê ji heye û ji şaxên zirav ên daran in. Ev cûre xanîyê han, an ciyêن parastinan, bê hewş tên avakirin. Min ev wêne han li Silêmaniyê nîşanî birek mihendisên idara mi'elimiyê da, lê, kesekî tiştek jê dernexist. Ji ber vê yekê, bawerîya min a ser van cûre xanîyan, wek min li jorê da xuya-kirin e.

TABLOYA SÊZDEHAN

NEXWEŞİYA DEMARGİRİYÊ (ESABÎ-SİNİR) Û ÇARESER KİRİNA WÊ YA BÎ DUA

Tabloya sêzdehan di rûpela 89'an de ye û li ser Fermanrewa-tiya Tercilê (Hezro) ye. Ji nexweşîya demargirîyê ya keça Mîrê Ertuqîyan û çareserkirina wê ji aliyê Şêx Hesenê Zerqî ve pêkhatîye. Şerefyan, di rûpela 89-90'an a Şerefnamê de wiha nivîsandîye: "Ertuqê kurê Eksebu Ekseb (48), mîrekî Selçukîyan bû û navça Mêrdîn û Diyarbekrê di bin destê wî de bû. Keçeka wî ya sipehî hebû û nexweşîya demargirîyê girtibû. Çendîn doktor anîn ser, lê ewan nekarîbûn çareserîyekê lê bikin, heta daxwaz ji Şêx Hesenê kurê Şêx Ebdurrehman kir, ku ew bi navê Şêx Hesenê Zerqî bi nav û deng bû; mirovelî baş bû gelek mirîdên wî hebûn; bi dua keça wî baş bike. Ew jî hat û bi dua keça wî baş kir. Babê wê jî keça xwe da Seyîd Huseynê kurê Şêx Hesen"(49). Her bi vî awayî desthilata Tercilê jî jê re bexişand, ku ji Hezro -qezayekte Diyarbekrê ye- û Entax (Hetax, Îtax) pêkhatibû, ev cîyê han 75 kilometro ji Diyarbekrê dûr e û dikeve rojhilate wê. Di havîna sala 1977'an de, ji bo resimgirtina Kela Entaxê rîya min pê ket. -Pişî wî kur û nevîyen wî desthilatdarî- kirin. Ji derveyî van, çend kel û cîyên din jî ji navça Diyarbekrê dayê.

Di vê tabloyê de, xanîyek wek mizgeftê di milê serê tabloyê de ye, ku wek gumbetekê pîvazî ye û rûkarêñ wî nexşdar in, ew giya û darûberêñ li ser hatî nexşkirin diyar in. Ev nexş û pence-

rêñ wî jî di nîva rûkarê dîwar de ne. İhtîmal e ev ne mizgeft be, xanîyê Mîr Ertuq be û bi awayê gumbetê hatibe avakirin. Keçika nexweş, li hewşa xanî û di nav nivînekê de raketîye. Raxistineke bi qîmet li ser mehfureke ciwan hatîye raxistin, tiştek avêtine ser keçikê û heta ser milên wê hatîye. Jinek, li gor wênê, li nêzîki lingê wê û li milê rastê rûniştiye. Desrûyeka spî li serî ye û yeka din jî li dora wê pêça ye. Baweşînek di destê jînikê de ye û li ser keça nexweş baweşînê dike, dîyar e ku xidamek wê be. Xidameka reşik jî li milê destê çepê yê keçikê rûniştiye û fincanek di dest de ye, desrûya wê reş e û enîpêça wê jî spî ye. Şêx Hesenê Ezreqî jî bi sermêzer, bi riyekî spî û cilûbergekî reş ve li ber serê keçikê rûniştiye. Wisa dixuyê duayê ji keçikê re dixûne. Mirovek li pişt Şêx Hesen sekinîye, wêna wî heta derecekê têk çûye, lê, dişibe bi mirovekî dînî û ihtîmal e, ku mirîdekkî Şêx Hesen be. Mirovekî din li ser kursiyekê rûniştiye û herdu destêne xwe danîne ser ranê xwe, bi awakî hêvidarî li keçikê dinêre. Vî mirovê han kewayek bêmil û kirasek dirêj li xwe kirîye û kulavê wî li yê Turkmanêن Yekîtiya Sovyet diçe. Niverasta wê wek taskulavê şerî ye, gulingek li ser e, der-dorê wî bi awakî pan bi ser ve pêçandiye. Eynî ji vî kulavî di wênen Moxoliyan de jî têñ dîtin. Wek ê Sultan Mehmûd Xazanî yê neviyê Hulago (1295-1304'ê zayîni), ku di tabloya yekemin a kitêba bidest-nivîs Menafi'i el-Hîwan a Ibnî Bextîşu'i Ebdullayê kurê Cibrâil de tê xuyakirin. Kesê navê wî derbaz dibe, ev kitêba han jî bo Mîrê Kurd Nesr el-Dewle Ehmedê kurê Merwanê kurê Kek nivîsandîye û li ser daxwaza Sultan Mehmud Xazanî kiriye Farîsi û çend wêne jî tê de çêkirine. Li serê jina Mehmud Xazanî jî ji van kulavan yek heye. Wisa dîyar e, wênekêşê Şerefnamê, rîgeza Turanîyan wek ya Selçukîyan zaniye. Edî ewî jî ev yeka han jî bo Mîr Ertuqê Selçukîyan çêkirîye. Li gor geneeta min ew mirovê di tabloyê de ye, Ertuqê kurê Eksebu bi xwe ye û çavrûyê wî di tabloyê de têk çûye. Sê guldan (gulav-rêj) li ser sînîyek belemî li ber e. Eynî sînîya belemî, di wê tabloya Minafi'i el-Hîwan, ya kurê Mehmûd Xazanî jî de hene. Her wiha tiştek dirêj li milê Ertuq e, mimkun e, rimek be, ku serê wê nayê dîtin.

TABLOYA ÇARDEHAN

ABLOQA KELA BEDLISÊ Jİ ALÎYÊ AKKOYUNLUYAN VE

Ev tabloya han li ser Fermanrewatiya Bedlisê ye û abloqe-kirina Kela Bedlisê ji aliyê eskerên Dewleta Akkoyunluyan a di bin serokatiya Silêman Bîjen de pêkhatîye. Şerefxan li ser vê bûyerê wiha gotfiye; Hesenê Dirêj ê damezrênarê Dewleta Turkmen a Akkoyunluyan (871-882'yê koçî, 1453-1478'ê zayı-nî), di dema Mîr İbrahîmê kurê Mîr Haci Mihemedê Bedlisî de, ordîyeke di bin serokatiya Silêmanê kurê Bîjen de ji bo dagirkirina Kela Bedlisê şand. Silêman, zivistanan diçû Bişerî û Mêrdînê û dema zivistan dibû, dihat ser Bedlisê. Bi vî awayî êrîşê sê salan domand. Ev êrişa tund û dirêj, bû sebeb ku ew kesen di nav kelê de ji nexweşîya ta'un(reşannewe) û ji birêan mirin. Lê, tenê heft kes bi Mîr İbrahim ve sax man û ew ji pişt re naçar man û xwe dan dest. Silêman Bîjen, Mîr İbrahim şand Tebrizê ba Hesenê Dirêj û ewî ji qedrê wî girt û li Qomê karek dayê. Wextê Hesenê Dirêj koça dawîyê kir, Yaqubê kurê Mîr İbrahim, ji ber serkêşîya Eşireta Rojkî, li Bedlisê hat kuştin.

Li gor gotina Şerefxan wisa tê xuyakirin, ku abloqekirina Kela Bedlisê, di sala 1453'an de yan ji hinek di dawîya wê de bûye. Dîyar e Mîr İbrahim mirovekî bi hêz û bi qedir bûye. Yek ji wan Mîrên Bedlisê bûye, ku sikke lê daye û niha ji per-ên wî di Muzexana Stenbolê de hatine parastin, wek eva han di wê nama ku Muzexana Birîtanya ji min re şandî de hatîye behiskirin..

Di vê tabloyê de, Silêman Bîjen li ser kursiyekê rûniştîye, rimek kurt di destê wî de ye, tîrên wî di tîrdañê de û şûrê wî ji di kalanê xwe de ye. Bazibenda şer li milan e û mertalê wî çend koşeyî ye û wek çetir tête ber çav. Ev cûre mertalê han di destê çend şerkerên din ên eskerên wî de ji hene û di tabloyên

din de gelek kêm in. Wisa dixuyê ku tiştek bi qîmet e, ji ber ku der-dorêñ piraniya mertalêñ din gilover in û nîverasta wan gurz gurz in, yanî ne rast in, qubbeyî ne, ku bi Erebî jê re "meheddeb" tê gotin, her wiha xetdar in ji û xetêñ wan ji qeraxêñ wan dest pê dikin û di nîverasta wan de kom dibin.

Ev cûrê mertalê han di nav Kurd, Faris û Osmanîyan de têñ dîtin, lê, vêca ez nizanim ev cûrê mertalêñ han ên Kurdan in yan ên dewletêñ din in? Di tabloya Şerê Edirnê de, mertalêñ Bîzansîyan gilover û rast in, yanî di awayê van mertalan de nînin.

Ciyê gotinê ye, ku du cûre mertal di nav sen'etê Kurdistanê de hebûne û evêñ han ji di nav çekêñ Evdalxanê Bedlîsi de hatine dîtin. Ewlîya Çelebî, di Seyahetnama xwe (ya bi Tirkî) di rûpela 249'an de, bi navê Eyntabî û Dîyarbekrî bi nav kirîye. Di rûpela 49'an a wergera Kurdî de wiha dibêje: "Şûr, xencer, rim, demance û sertîrêñ Dîyarbekrê bi nav û deng in". Di rûpela 142'an de ji dibêje: "Şûrên Şêxanî û Meqrawî li Bedlîsê têñ çekirin û nimunêñ wan qet li tu bajarekî din tune. Tîr û kevanêñ Bedlîsê ji bi nav û deng in". Her wiha bi vî awayî di-domîne: "Dest û pêywendîyêñ Evdalxanê Bedlîsi, ku bi dehan hezar xelkê Bedlîsê ne û nûça mehanî ji wan distand, şev û roj mertalê Helebî bi milê wî ve, şûrê Şêxanî û Meqrawî li pişa wî û kopalê wî di destê wî de bû". Lê, em nizanin awayê mertalê Helebî çawan bûye. Yan ji ew cûrêñ ku di wênan de pir têñ xuyakirin ew in, an na?.. Ji derveyî vê em nizanin "mertalê Kurdî" çawan bûye, ku Ewlîya Çelebî di rûpela 209'an a Seyahetnama xwe de wiha dibêje: "Her yek ji Kurdêñ Hekariyê mertalek Kurdî li milê wan e". Tu bêji gelo mebest ji vî mertalî yê Dîyarbekrê ye, yan ê Entabê? Ger wiha ji nebe, gelo li Hekariyê, yan li ciyeckî din ê Kurdistanê mertalêñ Kurdî dihatin durust kirin?!

Eskerêñ Silêman Bijen li milê xwarê Kela Bedlisê û ser qeraxê rûbar hatine damezirandin, çekdar in, bi şûr, rim, tîr û tivingan şer dikin. Lûla du topan di bazindêñ gerîya wan re derketîye û kelê topbaran dikin. Di Şerefnamê de navê topan derbaz nabe, lê gotîye mencenîq bi wan re hebûye. Wek tê xuyakirin di wî wextî de top hebûne. Di nav eskerêñ Akkoyun-

luyan de hinek hene serkulavê Avrupîyan li serê wan e, ku her aliye kwan du serê wan ên dirêj hene. İhtimal e ew ji eh-lênen beşa rojhilatê navcê Anadolê yê wî çaxî bin, yanî der-dorêne Sîwasê yan milêne din, ku wî wextî di bin destê Akkoy-unluyan de bûne. Mîr İbrahîm, li ser kelê dîyar e, ku serkula-vekî mezin li serî ye, rîyê wî reşê birincî û pîr mezin e û mer-talekî şer jî di destê wî de ye. Du mirov li pişt wî ne. Alek li ser ciyekî kelê yê herî bilind e. Li xwarê Mîr İbrahîm di rûyê dîwarê kelê yê ji der ve, lûla topekê ji nav derîyekî hesin ê wek şehê ketî nav hev derketîye ji der ve, ne dûr e ku Mîr İbrahîm xwedan top jî be. Her wek çawan topê Evdalxan li ser kelê hebûne û ewan di şerê li dijî Melik Ehmed Paşa de bi-karaniye(50).

Du jinan di pencera şarşîna(balqona) qata sisîyan a kelê re serê xwe derêxistîne ji der ve û cilûbergên reş li wan e. Ev cilûbergên reş (di tabloya rengin de yek reş û yek jî sor e. n. J. N.), xemgînî û reşgirêdana ji bo sedan şehîdên Kela Bedlisê ye. Ji ber ku piranîya wan di şer de hatin kuştin û yêne din jî ji birçınan yan jî ji ber nexweşîya ta'ûnê mirin û tenê heft kes bi Mîr İbrahîm re sax man. Wek Şerefxan jî nivîsandîye, yek ji wan jinan a bi wan heft kesan re, jina Mîr İbrahîm e. Du miro-vêne din jî di qata diduyan a kelê de dîyar in. Yekî din jî çûye ba yek ji wan eskerên ku ser-kulavê Avrupîyan serî ye. Ev eskerekî Silêman Bijen e û herdu bi hev re diaxivin. Wisa dix-uyê ew ji bo bi dijmin re guftûgoyê hatîye, ku bi şertê bê destlê-dana Mîr İbrahîm, ew xwe bide dest. Ev tabloya han dawîya qonaxa berxwedana Mîr İbrahîm nîşan dide, yanî ew dema ku di kelê de tenê heft kes sax mane. Eva han jî ji alîyê huner-mend ve di tabloyê de hatîye teswîkirin.

PÎVANA KELÊ

Di saya qelema Ewlîya Çelebî yê dostê Kurdan -ku karîye 610 Kurdên esîr yêne di şerê Evdalxan li ê dijî Melik Ehmed Paşa de ji şûrê Melik Ehmed Paşa rizgar bike, ku piranîya wan Ezidî bûne û celadan dixwestin serê 190 kesen din jî jêkin,-li vir ji bo me tê ronîkirin ku pîvane û mîmarîya kelê ya ras-

teqînî di vê tabloyê de heye. Ji derveyî vê, ku ew milê kelê yê seraya Evdalxan li wir bûye, niha xera bûye, ev cîyê han ji dikeve paşîya kelê, yan em bêjin milê rojavayê wê. Di tabloyê de, şarşinekî li ser çar kevanê bazindî yê qata sisîyan dîyar e, ku du jinan serê xwe di pencerê re derêxistine ji der ve. Her wek Ewlîya Çelebî ji gotiye ku şarşîn di Kela Bedlîsê de hebûne. Di rûpela 106'an a wergera Kurdî de, di vî warî de wiha dibêje: "*Hemû pencere û şarşînen wê li ser burc û dîwaran in*". Eva han nîşana wê ye ku birek şarşîn di bilindaya kelê û di qata sisîyan de hebûne. Van şarşînen han dêmenekî sipehî û rind ji bo vê kela han a mezin bexişandine. 300 xanî tê de hebûne û 300 xêzanên (aîlên) wan tê de hewîya ne. Ji derveyî van mexzenen (kîlerên) xwarinê, cîyên cebirxane û tewlên heywanan ji tê de hebûne.

Her wiha di rûpela 266'an de ji eva han gotiye: "*Kel, tebeq tebeq li ser hev wek xanîyan hatîye çekirin û karekî avayîyê di kelê de hatîye kirin*". Lê, Evdalxanê zana, endazîyar, sitîrnas, bizîşk û bêhempa, serayek li gora awayê Seraya "Fîdaqa" di kelê de durust kirîye. Der-dorê kelê çar hezar gav bûye. Di nav baxê xanî de ji 360 xanî hebûne. Avêñ fiskîyan (avpirjîn) ji devê şér, kepîyê (poz) dêw û ji devê ejderha dihatin ji der ve (Binêrc; rûpela 126, 266 û 106'ê Seyahetnamê).

Ser destê çepê yê tabloyê, derîyek hesin ê wek şeh di nav hev re derbaz bûyi tê dîtin, ku lûla topekê jê derketîye ji der ve. Eva han li gor vê mîmarîya kelê ye, ku Ewlîya Çelebî di rûpela 106'an de behs kirîye. Ewlîya Çelebî wiha dibêje: "*Di jêrê wê re riya çûna nav bajêr heye. Sê qat derîyê hesin ê mezin jê re çekirîye, ku di nav derîyan de gelek cûre çek amade kiri ne*". Yanî çekêñ wek topê tê de çêkirî ne. Wek çawan eva han di wênê de tê xuyakirin. Di dema Şerefîyan yan em bêjin ya Mîr İbrahîm de, top di kelê de hebûne. Ev tabloya han belgeyek aşkera ya vê babetê ye. Bi vî terzê mîmarîya kelan di dewra Şerefîyan yan di pêş wî de ji hebûye û ne di dema Evdalxan de hafîye çekirin. Vêca em dikarin bêjin, ku Ewlîya Çelebî ji wesfê vê yeka han kirîye, ev tabloya han vê yekê îspatdiķe, ku ew wênêñ di Şerefnamê de hene, li ser bingehekî rasteqînî hatine çekirin.

TABLOYA PANZDEHAN

MECLİSA ŞEREFXANÊ BEDLÎSÎ

Tabloya panzdehan di rûpela 144'an de ye û li ser Fermanrewatiya Şerefxanê kurê Mîr Şemseddîn e. Yanî bapîrê (kalê) Şerefxanê dîroknivîs, ku ne tenê mirovekî xwende, lê mîrê Bedlîsê yê herî bideshilat ji bûye. Wek ku Şerefxan ji nivîsandîye; li ser zanistîya sitêrnasî û remlê gelek pêş de bûye. Di sala 940'ê koçî (1533-1534'zayînî) de bi eskerên Osmaniyan re şer dike û bi 700 kes eskerên xwe ve tê kûştin.

Ev tabloya han li ser meclisa Şerefxan e. Yê navê wî derbaz bûyî, di nav baxekî de li ser kursiyekê rûniştiye û mirovên wî li der-dora wî sekinîne. Şerefxan di wêne de çarmil û dirêj tê xuyakirin. Ne dûr e Şerefxanê dîroknivîs, vî wesfê laşê bapîrê xwe ji babê xwe sehkiribe. Cilûbergên mîrîtiyê li Şerefxan in, serkulavekî spî yê mezin daniye serê xwe, ku gulingeyeke gelek mezin û serê wî qîtbûyî li ser heye û bi vî awayî gulinge ji bo qet tu Fermanrewayekî din çênekirîye. Vêca ez nizanim ev gulinga han ji birek perrên teyran, yan ji tiştek din hatîye durustkirin?.. Çav û rûyê Şerefxan, di wêne de heta radeyekê têk çûye. Li teniştâ wî ya rastê surahîyek heye, ku ev cûre firaxên han ji bo şerab û gulavê hatine bikaranîn. Jinek û kurek dehdanzde salî li milê din, li ser piyan sekinîne. Kurik (lawik) hinek ber bi jinikê ve çûye. Cilên jinikê renga-reng in û kewayekî bê mil û kirasekî dirêj ê jinan li ber e. Serkulavê wê wek ê mîran mezin e û ji eynî wî qumasê xetdar hatîye çekirin, ku ji

bo piranîya serkulavêni mirovêni di nav tabloyê de eynî qumaşî bikaranîye. Dûr nîne qumaşê serkulav hevrîsim be. Wisa di-xuyê, mertalekî şer jî li milê wê jinikê be, ku wek heleqeke mezin ji gulingê hatî çekirin di navbera wê û Şerefxan de ye. Yanî, peywendiya herdukan bi hev re heye. İhtîmal e mebesta wênekêş peywendiya jin û mîrî be, ku ev tiştê han di navbera herdukan de çêkirîye. Ji ber ku eva han Xatuna Şahbegê; keça Elî Begê Sasonî ye, ku jina Şerefxan û dapîra Şerefxanê dîroknivîs bûye. Vê jina han, di hewşa Mizgefta Şerefxan de, gumbetek ciwan a túj û bilind li ser gora mîrê xwe ava kirîye û gora wê bi xwe jî di nav wê de ye. Dema ez cûm Bedlîsê û min xwest ez wêna nivîsîna li ser gora wan bikişînim da ku bixwînim, lê gelek mixabin, ji ber hazirnebûna micewrê wê û kilitbûna derî, min nekarî ez vê mebesta xwe bi cî bînim.

Qet tu guman di vê de nîne, ku cilûbergên vê jina mîran, bi awakî rasteqnînî hatîye çekirin û yê dewra xelasîya nivîsîna Şerefnamê ye. Ewlîya Çelebî jinêni Bedlîsê nedîtiye, ji ber ku rûpêçayî bûne. Ewlîya Çelebî di vî warî de wiha dibêje: "Wek dostêni min ji min re gotin; cilêni wan spî ne û pêçe bikartînin. Taskulavêni wan ên datînin serê xwe ji zêr yan zîv in û cilêni wan siyer û hevrîsm in"(51). Hêjayî gotinê ye, ku cilûbergên jinêni Ezidîyan jî kirâs in û serkulavêni wan jî spî ne, lê, ez nizanîm ger niha hatibe guherandin. Di hinek navan re jinêni beşekî Botan jî kirâsên spî li xwe dikirin. Kirasên wan an wek ên jinêni Ezidîyan jî pertalêni spî yên ji maimulat bûn yan jî ji cewêni sîm yên sitûr bûn, ku ji pemboyê bûn û li gundêni Botan dihatin çekirin. Ji derveyî van li navça Torê û cîyêni wek bajarê Mîdyat, Kercews û Hesenkêfê jî dihatin durustkirin. Evêni han li van navçan dihatin çekirin, qayîmtir jî bûn û li navçen Botan dihatin firotin. Heta sî sal berî niha, ne tenê li Torê, yanî navça rojhilat û bakûrê rojhilata bajarê Mêrdînê, li piranîya hinek navçen Kurdistana Tirkîyê jinan her kirâsên spî li xwe dikirin, lê qutek û derpiyêni wan spî nebûn. Ji bili van kitano-kêni (şâşkêni) serê wan jî spî bûn. Kirasên mîran jî heta çokan yan hinek zêdetir dirêj bûn, lê herdu koşen wan hîn dirêjtir bûn. Ev kirâsên han ji pemboyê spî yan jî ji bêzekî spî yê bi qîmet dihat durustkirin. Gelek li kirâs û derpiyêni Hindîyan

diçûn, lê kirasên wan rêkûpêktir bûn. Gelek kesan li derve bê şalwar li xwe dikirin, ji ber ku rewşa xelkê ya aborî nebaş bû.

PÊLAVÊN BÎ MORÎ

Awayê pêlavê (solêñ) di tabloyê nav Şerefnamê de ewqas ronî nînin, ku heta em bikarin li ser bisekinin û bizanin di wî wextî de li Kurdistanê pêlav çawan bûne û çend cure hebûne. Lê, di vê tabloyê de ferek ji pêlava Şahbegê Xatun ronî ye û baş tê ditin. Rengê pêlava wê spî, yan rengekî vekirî yê wek pembê vekirî ye, serê wê pan e, ne zirav e. Her wiha devê wê bi ser ve nehatîye tewandin. Wek di navekê re li Silêmanîyê yên wiha habûne û jê re panîbilind hatîye gotin. Çend mûrî bi pêlavê ve ne. Morîyêñ li ser wê pêlavê res, yan şîn têñ xuyakirin. Hêjayî gotinê ye, ku Ewlîya Çelebî di Seyahetnama xwe, rûpela di 128'an de, behsa nalînêñ sedefkarî yên Bedlîsê kirîye. Ewlîya Çelebî wiha dibêje: "Xulamên Evdalxan, ku di Hemama Bax de kar dikirin, nalînêñ sedefkarî di piyê wan de hebûn û ji bo wan kesên xwe dişûştin jî nalînêñ sedefkarî dianîn". Di vir de em dibînin ku li Bedlîsê, nalînêñ sedefkarî û pêlavê bi mûrî hatine çêkirin.

Ew kurê li ber sênîya Şahbegê Xatun sekinîye, Şemseddînê babê Şerefhanê dîroknîvis e, ku kurê wî yê yekane bûye. Di vê tabloyê de kirasekî zerê bê pişkok lê ye. Ji ber ku pêşîra wî vekirî nîne, yanî bê pişkok e. Kefiyek avêtîye ser milê xwe û herdu serên wê di pêşî de ber bi jêr ve berda ye. Heta van demen han ên nêzîk jî, bi vî awayî kefi avêtina ser mil adet bû û niha jî li Kurdistanâ Tirkîyê li gelek navçan wiha ye. Kurekî, bi destekî xwe mertal û bi destê xwe yê din jî tiştekî dirêj û serê wê yê dirêj girtîye û wisa dixuyê ku eva han aletekî ser e. Di tabloya hejmara 13'an de jî tiştek wiha tê dîtin.

Li pişt Şerefhan, birek mirov sekinîne, sisê ji wan pasewan in û rim di destê wan de hene. Cilûbergêñ wan têkel in, lê, qumasê serkulavêñ wan wek hev in. Eva han vê tîne bîra mirov, ku ev qumasê han hevrîşmê Îranê be, ku heta niha jî Kurden li wir bikartînin. Ewlîya Çelebî li ser mijara cilûbergêñ mîrêñ Bedlîsê wiha gotîye: "Serkulavêñ wan zer, şîn, res, sor û

gewrên vekirî ne. Piraniya mirovên Evdalxan û kesên maqul ên din, kurkên samuran li xwe dikan". Di gelek ciyan de, wek mîsal; li ser behsa Melatyê û Dîyarbekrê ji behsa kurkên ji postên samuran kirîye. Çîna dewlemend ev kurkê han bikaranîye. Eva han ji wê îspat dike, ku di wî çaxî de ev yek li Kurdistanê hem zêde û hem ji bi qîmet bûye. Ewlîya Çelebî di vî warî de gotina xwe bi vî awayî didomîne: "Ewê di hêla rewşa aborî de nîvçehal in, şeyax li xwe dikan, ku eva han li Maden û li navça Şêrwan tên durustkirin"(52). Yanî, Şêrwanâ bakûrê Sêrtê û Maden ji her iro ji bi eynî navî ye. Mebest ji şeyax, ku gotinek Tirkî ye; qumaşek û yan perçekî wek berrê sitûr e, ku bi taûderzî û ji hirîya renga-reng tê çekirin û ji bo ser zîn û pişt zînê heywanan ji tê bikaranîn. Şeyax ji dirêj e û hinnek caran heta ser çokan, yan jêrê çokan dirêj dibe. Xetên wê pan in û zivistanan ser cilûbergan tê li xwe kirin. Tê bîra min, li dor-berê 35 sal berî niha, ku me li hinek kesên xerîb didît, em bi wan dikenîyan. Di tabloya heftan a ser Hesenkêfê de, ew siwarê cilên dirêj li ber e û ji Diçlê derbaz dibe, cilên wî şeyax in. Ewlîya Çelebî, di vî warî de wiha dibêje: "Xelkên feqîr ên Bedlîsê boxas li xwe dikan". Boxas ji gotinek Tirkî ye û tê mana kitânê tenik(53).

Di tabloyê de piştîniyâ pasewanê nîvekê baş tê xuyakirin. Vê bala min kişand; piştînî xetdar e û her ji wênê derdikeve, ku ji qumaşekî nerm ê bi qîmet e. Eva han her ew piştîniyâ hevrîşm e, ku Ewlîya Çelebî çend car behs kirîye. Ewlîya Çelebî wiha dibêje: "Li Kurdistanê piştîniyêñ hevrîşm li pişta xelkê bûn". Wextê li Bedlîsê çûye Hemama Baxê, bi dirêjahî behsa wê kirîye, ku bi ci awayî bi nexşê şûseyî, eynik, kevirên mermer, seramîk û kevirên sel ên fireh hatine raxis-tin. Heta wê derecê ku wextê Sultan Murad xwe tê de şûştiye, gotîye: "Erê ci dibû li Stenbola min ji hemamek wiha hebûya". Ewlîya Çelebî bi vî awayî didomîne : "Xulamên Evdalxan, ku Gûrcî û Çerkez bûn, di hemamê de kar dikirin, kér û xencerên cewherdarî kiribûn ber piştîniyêñ xwe yên hevrîşim. Ev piştîniyêñ han di hêla awayê girêdanê de wiha bûn; li milê rastê li ser navêkê girêyek lê dihat dan û serê wê raste rast ber bi jêr de dihat berdan". Ez di wê bawerîyê de me, ku

niha bi vî awayî bi gelempêrî girêdan nemaye. Lê, jinê çend navçen Kurdistanê, serên pişfiniyêñ xwe di milê teniştä xwe re berdidin.

Di tabloyê de, komek musiqajen li pêş Şerefstan hene (Musiqajen di tabloya rûpela din -a 145'an- de ye, lê ji bo ku bi hev ve ne bi şâşî li ser vê tabloyê hatiye hesibandin. n. J. N.). Ser destê çepê yê tabloyê, aletekî bê têl di destê mirovekî de heye, bejna wî aletî dirêj e û sandoqa wê qubbeyî ye, dişibe bi aletê musiqê yê çelo yê ku li Rojava tê bikaranîn. Mirovek din jî li teniştä wî ye, dûr nîne ew jî musiqajen be. Bazewanek ser destê rastê yê tabloyê ye, lepik jî di destê wî de ye, teyrê nêçîrê li ser danîye û du mirovên din jî li balê ne. Li jorê tabloyê ser destê rastê, mirovek din jî teyrek nêçîrê ser destan heye. Teyrên nêçîrê, di çend tabloyên din de jî hene. Bêguman di wextê xwe de li Kurdistanê, bi teyr nêçîr kirin gelek belav bûye; bi taybetî jî di nav mirovên girecir de.

Di rûpela 122'an a Seyahetnamê de, Ewlîya Çelebî, behsa navê panzdeh cûrê teyrê nêçîrê yê Evdalxanê Mîrê Bedlisê kirîye. Wek; baz, şahîn, quş û her wiha baleban jî, ku eva han ji sinifa şahû (melik el-hezin) ye(54). Heta van nêzîkahîyên han jî bi teyr nêçîrkirin di nav Kurdish de hebû. Berî Şêx Mehmûdê nemir esîr bikeve teyrê wî yên baz hebûn û pê nêçîr dikir. Xwedê jê razî be, Ebenewte, bazewanê wî bûye û Kerîmê Ardebare û Heme Ferecê birayê Ebenewte jî li Silêmanîyê bazewanîya Şêx kirine(55). Berêz Hamid Begê Mecîd Begê Caf, ku temenê wî 95 sal heta hîn zêdetir bû, wiha dibêje: "Heta salên pêncîyan jî teyrê min ên nêçîrê hebûn." Li ba me nêçîr bi van teyran dihatin kirin; helo, baz, şahîn, tirunte û waşec(başîq-başûk). Bi baz, şahîn û helo; nêçîra sak, kîrvoşk (kevroşk), qaz, purr, bet (çêrg, hebara) û teyrê din dihat kirin. Xortan bi waşe û tirunte (tirumte), ku ev ji kotirê(cinsek kevokê) mezintir e û ji waşê jî biçûktir û azatir e, nêçîra çolê pê dihat kirin. Wî çaxî baz û helo li Kurdistanê dihatin girtin û Şêxên Ereb ên navçen Xelîcê ew dikirîn. Heta par ne pêrar jî li navça Qeredaxê, teyrê nêçîrê bi 500 dînarân dihatin firotin.

TABLOYA ŞANZDEHAN

ŞAH TEHMASB Lİ BAJARÊ XELATÊ

Tabloya şanzdehan di rûpela 145'an de ye û behsa gihîştina Şah Tehmasbê kurê Şah İsmâîlê Sefewî bo bajarê Xelatê dike. Şerefxan, di vî warî de wiha nivîsandîye: Di sala 938'ê koçî (1531/1532'ê zayıñî) de Dewleta Osmanî di bin serokaşya Fil Yaqub û Ulema (Ulma) de hêzek şand ser bapîrê wî, ku mîrê Bedlisê bû, ji bo dagîrkirina Fermanrewatiya Bedlis û ya Ruşkî (Rujkî). Şerefxan, Kela Bedlisê û kelên din ên ku di bin desthilata wî de bûn, bi hêz û melzemên şer durust kir û Şemseddînê kurê xwe û jina xwe ji şand Kela Extemarê (ku niha ev kela han bi navê Dêra Extemarê bi nav û deng e. Di nav giraveka Gola Wanê de û nêzikî bajarê Westanê ye. Eve dawiyê -mebest bajarê Westanê ye- keleka dewra Dewleta Urartuyan bûye). Şerefxan diçe bajarê Tebrîzê, ba Şah Tehmasb û daxwaza yarmetîyê jê dike. Şah bi xwe ber bi Bedlisê de hat. Wextê Fil Yaqûb û Ulema bi vî qasî hesîyan, hêzên xwe paş de kişandin û hinek topêن xwe ji di cîh de hiştin. Şerefxan li bajarê Xelatê (dikeve ser qeraxê bakurê Gola Wanê û niha qezake wilayeta Bedlisê ye) ji bo Şah şahînîyeka gelek mezin çêkir. Ji derveyî vê, ji pêncan yekê malhebûnên Fermanrewatiya Bedlisê û li gel gelek diyarıyêن

bi qîmet pêşkêşî Şah kir. Şerefxanê dîroknivîs, bi dirêjahî behsa vê şahîniyê û diyarîyan kirîye. Şah, roja 20'ê Seferê ya sala 939'ê koçî, 21'ê llona sala 1532'ê zayînî, li bajarê Xelatê bûye. Ji ber ku di wê rojê de fermanek nivîsandîye û Şerefxan kirîye Mîrêmîran ê Kurdistanê û li gor fermanê, Fermanrewatîya Bedlîse jî bi Dewleta Sefewî ve girêdaye (rûpela 143-148'ê Şerefnamê ya bi destnivîs).

Di tabloyê de, Şah Tehmasb li ser textekî di bin çadireka ji nexşen giranbiha yên ji giya hatî çêkirin, rûniştiye. Çadirek din li pişt çadira wî ye û nexşen giya li ser tune. Şerefxan nivîsandîye, ku bapîrê wî çadirêne mezin ên bi sed situn, yan sed gurîs û çadirêne sor, şîn û yên gurîsen ku bi hevrişm hatî durust kirin, ji bo Şah û eskerên wî vegirtine. Textên zêr-zîv ên cew herdarî ji bo wî amade kirine. Şah di tabloyê de xurt tê xuyakirin, rî û simbêlên wî nînin û bi çavrûyê xwe ve bi goşt e. Şah, dîwankî rûniştiye, xeftanekî guldar li ser kirasekî dirêj li xwe kirîye. Pêşîya xeftan vekirîye û milên wî yên fireh û kurt heta nêzîkî enîşkên wî tê... Ev cilêن han ji kevin de inode bûne û xelîfîn Ebbasîyan jî xeftan li xwe kirine. Edîbên bajarê Şamê jî gelek bikaranîne. Xeftan, bi piranî ji hevrişmê, yan jî ji teblesan dihat durust kirin(56). Di Kurmancî de ji kewayê jinan re xeftan tê gotin. Serkulavê Şah mezin û gilover e û ber bi jor de zirav bûye û kulavêne kesen der-dorêne wî jî wek yê wî ne. Di pêşî de me behsa serkulavê Sefewîyan kir, ku darek tê de dadiçikandin. Bi vî awayî serkulav di wênen dema Şah Tehmasb de tên xuyakirin. Edî em nizanîn navê Qizilbaşî -yanî sessor, ku ji bo sefewîyan hatîye bikaranîn, di wî çaxî de peyda bûye û heta îro jî ji bo Şîîyan tê gotin- ji ber vî darê sor bûye yan wek hinek dîroknivîsan gotîye; serkulavê wan her bi tevayî sor bûye? Mamostê dîroknivîs Mele Cemîlê Rojbeyanî ji bo min nivîsandîye, ku ji bo teqlîdkirina Şerê Sefîn, yanî cemaeta İmamê Elî, perçekî ji qumaş li ser dipêçan. Di vê tabloyê de du carfiye, yan du xulam, xwarinê yan fêkîyan ji bo Şah dîbin. Du kes li tenişa wî sekînîne, yek ji wan, ku rim û şûr li ser heye, dişibe bi jinan. Du kesen din li pişt çadira dudu yan sekînîne, serkulavê yekî ji wan, li yê kesen der-dorêne Şah naçe, ji ber ku wek yê Kurdish e. Yekî din jî li pişt çadira Şah

sekînîye, tê xuyakirin ku ev kesên dawîyê pasewan in. Çend gumgum, yan em bêjin surahî, li jêr textê Şah hatine danîn, ku evêñ han ji bo şerab û gulavê tên bikaranîn. Gurûbek musiqajen û dengbêj, di dawîya tabloyê û li pêşmiqabilê Şah rûniştine; yek ji wan li tenburê yê din jî li defê dixe. Didu, yan sisiyê wan jî distrêñ.. Piştîna sitranbêjê qelew baş tê dîtin, xencerek bi ber de kirîye, cilek nîv mil ê bi pişkok li xwe kirîye, ku ci-lêñ wiha di tabloyên Şerefnamê yên din de nayêñ dîtin. Yeka jin li pişt sitranbêjan rûniştîye, ne dûr e, ku carîyek be û besdarîya sitranbêjan dike.

Hêjayî gotinê ye, ku ev tabloya han li hemberê tabloya kurê Şerefxan daniye, lêbelê, wênekêş herdu terefan, yanî, Kurd û Farisan, ger çiqas di hemû milan de jî nebe, di awayê cilûberg û serkulavêñ de ji hev cuda kirine. Her wiha piştîniya Kurdan wek yên niha ji qumaş in, lê, yên İranîyan kemer (kemerb-est)in, wek çend wênen di vê tabloyê de, kemerên wan baş tên naskirin

TABLOYA HEVDEHAN SULTAN OSMAN

BEŞÊ YEKEM

Ji tabloya han heta tabloya hejmara bistan, di beşê diduyan ê Şerefnamê de hatine çekirin û li ser sultanên Osmanî, paşayên İranî û yên Turanîyên hevçaxê wan in. Ev tabloya han li gel behsa destpêka damezrandina Dewleta Osmanî hafîye. Li gor wê, eva han ji kurekî Sultan Osmanê kurê Ertuxrul ê damezrênerê Dewleta Osmanî, ku piranîya dîroknivîsan ev tarîxa han ji sala 699'ê koçî (1299-1300'ê zayînî) didin destpêkirin, yan jî wek Şerefxan jî gotîye; sala 689'ê koçî (1290'ê zayînî) yan salek pêşîya wê bûye, hafîye dameziran-din(57). Ev tabloya han du beş e û her beşek li ser rûpelekê ye û çarçovek taybetî jî ji wan re hafîye çekirin. Lê, jê tê derêxistin, ku tabloya diduyan temamkerê ya yekem e. Di beşê yekem ê tabloyê de xanîyek ji kerpîncan hatîye avakirin, tê dîtin, ku qasî ji çaran yekê pêşiyê, seramîk yan mermerên çargoşe li ser raxistî ye, di awayek: sê goşeyî de hinek şerefe (qutke) li ser xanî bilind bûne. Osmanîyan, ev terzê rûkarêñ xanîçêkirinê ji Bizansîyan girtine, lku uslubeke avasazîya Romanîyan e û berî hatina İslâmîyetê li Suriyê belav bûye û av-

asazîya îbadetxanê bajarê Hezerê jî li ser vê regeza han hâtine avakirin. Sultan Osman, li ber wî xanîyi, bi rî û simbê-lekî reş ve li ser textekî rûniştîye. Serkulavekî mezin ê spî li serê wî ye, ku ji perçek rengek din bi tund û xweşik girêdaye. Kurkek bê mil, li ser kirasekî dirêj li xwe kirîye; ji siturîya wî tê naskirin, ku kurk e. Destê xwe yê rastê ber bi sînîyekê de birîye û destê xwe yê din jî ber bi erdê ve dirêj kirîye. Wek mebesta wî ji vê ew be, ku bêje; "ez xwedîyê vê axê me " yan "ev erda han a min e". (Di tabloya rengîn de destê rastê li se çonga wî û destê çepê jî bi riyê wî ve ye. n. J. N.)

Li gor wênê, li ser destê rastê sê xidam sekinîne (xwiya ye rîsmê di destê mamoste A. R. Yusuf de vaca hatîye kêşan çimkî ev xidam di tabloya rengîn de dikevin sermilê çepê. n. J. N.), ku ew carîye ne, yek ji wan sînîyek li ser destan e û xwari-nê ji bo Sultan dibe, vî milê tabloyê hinek qetîya ye. Mirovek hinek ji wê wêde sekinîye, ji serkulavê wî tê zanîn, ku wezîrê wî ye. Ji ber ku ser-kulavê wezîrên Osmanîyan mezin in û di awayê çadiran de ne, yan em dikarin bêjin nêzîkê awayê kîyark (kivark)an in. Mehfûrek li ber Sultan hatîye raxistin û wêna jin û mîrekî bejin kurt li ser hatîye nexşkirin. Çend mirovên Osmanî li wê nîverastê ne, hinek ji wan cilûbergên sîvîl (medenî) li wan in û yên din jî, ku fcs û şewqên eskerîyê li serê wan in, ew serbaz in. Yek ji wan serokê eskerî ye, ji ber ku ew şewqê eskerîyê, yan ew serkulavê ku ji kurk e, heta dawîya Şerê Cihanê yê Yekem jî rîberên Osmanîyan didan serê xwe. Du kesên Osmanî rim di destê wan de ne, serê rimên wan li ser erdê ne û baş nayêñ dîtin. Du mirovên gundi yên mesîhî ji xelkê Anadolê, yan jî em dikarin bêjin; Bîzansî, di tabloyê de têñ xuyakirin. Şewqên Ew- rûpî danîne serê xwe, her milekî şewqên wan du liqêñ dirêj ên wek du şaxan in. Pasewanek jî li ser destê çepê sekinîye. Ne dûr e, ku ew carîyek be. Ji ber ku nexşê qumasê serkulavê wê li yê wan hersê carîyên din diçe û ev nexşen han jî ji çend belgên giyayê wek sosin, ku dirêj û ji hev dûr in, pêkhatîye. Eynî ji van nexşan di tabloya li ser Sultan Mehmed Fatih û ya li ser Stenbol de jî, ser serkulavê xidaman, yan jî em bêjin yên carîyan hene. İhtîmal e, ev nîşane-ke taybetî ya xidaman, an ên carîyên Osmanîyan bin. Ger

çiqas eynî ji van nexşan, yan ev nîşanêñ han li ser serkulavê wî mirovê birî yê li pişt wezîrê Mehmed Fatih ji heye. Ji ber vê yekê, tu bêjî gelo ev mirovê han berpirsiyare xidam yan carîyan e?..

Eva han beşê yekem ê tabloya hevdehan e, ku li ser rûpeleke taybetî li hember beşê diduyan hatîye durustkirin; herdu yek mijar in û yek tablo têñ hesêbkirin.

BEŞÊ DİDUYAN

Beşê diduyan ê tabloya hevdehan du qism e, ku di rûpela 158'an û li hemberê beşê yekem hatîye çêkirin. Birek xelk li hewşa xanîyekî ku pencerên wî mezin in sekinîne. Ji cilûbergêñ wan tê zanîn, ji Faris, Tirkêñ Osmanî, Selçukî û regezen Ewrupî têkelî nav hev in. Li gor serkulavê wan herdu mirovên, ku li ser destê rastê ê tabloyê ne, ew naşibin bi wan Tirkêñ di tabloya hejmara hevdehan a beşê yekem û yên di tabloya hejmara bîstan de. Evan darekî di serkulavê xwe de daçikandine, ku eva han nîşaneke taybetî ya İranîyêñ di wextê Dewleta Sefewîyan a dema Şah Tehmasb de ye, ku me di tabloya hejmara şanzdehan de behs kir. Her wiha piştinîyêñ wan li yên Tirkan naçin; wek yên İranîyêñ di tabloya hejmara şanzdehan de ne û kemer in. Sernavik, yanî heleqa hesin a girêdana kemerê, serê wê pan e, ji derveyî vê, piştinîyêñ Tirkan ji qumaş in, sivik in û gelek mezin nînin. Kirasê yekî ji wan baş dîyar e û heta çoka wî tê. Yen din ji ji pêşîra wan tê zanîn, ku eynî ne. Yekî din li pêşîya wan herdu kesan e. Cilûbergêñ wî wek yê Osmanîyan e û kirasekî dirêj wek ê di tabloya hejmara hevdehan de li ber e, heta li ser navikê gelek pişkok hene. Du kesen din di jêrê wan de ne, wêna yekî ji wan têkçûye, ya diduyan a li rexê wî teyrek nêçîrê ser destan e û ji serkulavê wî tê naskirin ku Selçukî ye. Serkulavê wî eynî wek yê Mîr Ertuqê Selçukî yê di tabloya hejmara sêzdehan de ye. Du kesen din ên nêzîkî van herdulan, awayê serkulavê wan baş derneketiye. Yek ji wan tiştek wek sînîyê li ser destan e û şûr ji li ser heye. Du kesen din li ser milê çepê yê tabloyê (ku eva han li ser rûpelekî taybetî ye) sekinîne. Serkulavêñ wan xetdar in, di awayê hêkê de ne, qeraxêñ wan bi awakî sê-çar car qatkırı bi

ser ve hatîye tewandin, ev cure serkulav ji çûxê ne, jê derdi-keve yên Tirkmanên kevin bin. Ji ber ku li yên Tirkmanên Yekîtiya Sovyet diçin, heta bi awayê xwe ve jî li yên Tirkmanan diçin. İhtîmal e ku evê han gundiyê Osmanîyan bin. Du kes di navbera wan herdu kesen berê û hespan de ne. Serkulavê li serên wan, li yên Osmanîyan diçin. Yek ji wan -ku di navbera wan herdu teyrêne nêçirê de ye- tiştek li ser destan e; di wêne de baş derneketiye. Li gor wan nişanên berê ku me behskirin, li cariyêne Sultan diçin. Teyrek nêçirê li ser destê yekî ji wan herdu kesan e. Li milê vi alîyê dawîyê du kesen din hene, şewqêne Ewrûpiyan li serê wan in. Mimkun e evê han, ew Bîzansiyêne piştî dagirkirina axa wan, ku bûn berdesten Osmanîyan, bin. Yek ji wan ê dawîyê jî namek di dest de ye û li gel yê din diaxive.

Du hesp di tabloyê de diyar in. Kesek li ser wan nîne û xulamekî Sultan li ba wan sekinîye. İhtîmal e, ev herdu hespêne han yên wan herdu İranîyen mîvan bin û heta awayê cilêne hespêne wan jî ji yê hespêne Kurdan cînê ne.

Ez di wê baweriyê de me, ku armanca bingehîn a cûr bi cûr tê-kiliya van kesan wek di tabloyê de daye diyarkirin; pêşwa-zilêkirina nûnerêne İranê, yan em bêjin ê İlhanîyan e, yan çend nûneren din bin; hatine biçin ba Sultan Osman û hatina wî ya ser textê desthilatdarîyê pîroz bikin, yanî serîlêdana yekemîn Sultanê Osmanîyan e. Di tabloyê de diyar e, ku dergevanekî Sultan bi pêş du İranîyan ketîye û ber bi Sultan de diçin û Sultan jî ji dûr ve çaverîya wan dike û dike ber bi wan de biçe. Kesê diduyan ê ji wan nûneran tiştek pan wek seetek danîye ser lepê destê xwe û ku wek jê tê zanîn, eva han diyarî-ye k e û dixwaze pêşkêşê Sultan bike. Yekî din jî destê xwe daye hev û wek jê tê derêexistin, ku diyarîyek di nav de be. Ciye gotinê ye, ku wê çaxê Dewleta İlhanî ya Moxoliyan li İranê li ser text bû. Eger Osman sala 689'ê koçî bûbe Sultan, ev ew dem e, ku Erxunê kurê Abaqî kurê Hulago (683-690'ê koçî) hukmê İran kiriye. Lî, ger sala 699'ê koçî be, eva han dema hukumkirina Sultan Mehmûdê Xazanî yê kurê Erxun (703-994'ê koçî) e. Yanî dibe ev nûneren han ji alîyê yekî ji van herduyan ve hatibin şandin. Lî, yê wênekêş, ji ber ku ew nûner ji

Îranê hatine û ew melbend ji di bin desthilata Dewleta İlhanîyan de bûye, her li gor cilûbergên Farisî yên dema xwe wênê wan kêşaye, yanî ne li gor serdema Moxolîyan û bi cilûbergên wan ve. Dûr nîne ew du Bîzansiyêن, ku yek ji wan namek di dest de ye û li gel yê din diaxive, nûnerên Bîzansiyâن bin û berî nûnerên Îranîyan hatibin û ew name ji teehudek be û ji Sultan wergirtibin. Ji ber ku wek me got; du Bîzansiyêن din ji di meclisa Sultan de ne û ihtimal e, her çar ji nûnerên Bîzansiyâن bin. Her wiha dûr nîne ew herdu kesên, ku me got ser-kulavê wan li yên Turkmenan diçin, ew ji nûnerên taybeti bin.

CILÜBERGÊN OSMANIYAN

Li gor wênên Şerefnamê û rastîya dîrokî ya di tabloyan de, ji derveyî fes û kulavên rêberên wan, serkulavên Osmaniyyan spî û mezin in. Piranîya wan bi awakî dirêj, gilover û hilû ber bi jor ve diçin û nîvçe lûleyekê pêk tînin. Lê, yê wezîran ji yên hemûyan mezintir e, qismê xwarê di awayê çadir, yan em bê-jin; di awayê kumêن feqîran de ye, ji yê Sultan sitûrtir e, lê kurtir e û naşibe bi pembo, kulavê wî ji hinek tûj e û hinek ji mîzerê ve derdikeve ji der ve. Dîroknîsê Tirk Ahmet Rasîm, di kitêba xwe ya "Osmanli Tarîhî" (Dîroka Osmaniyan) de (cilda yekem, perawêza hejmarêن 556-565) behsâ cilûbergên Osmaniyyan kiriye. Ew di vî warî de wiha dibêje: "*Di dewra Sultan Osmanê kurê Ertuxrul de, kulavêن wan wek yên derwêşen Mewlewîyan bûne, surmedar bûne û navê şasika ku li der-dora wê dipêçan, sike bûye*". Car û baran ji serkulavêن mirovêن Sultan re "destar yusfi" dihat gotin, niha ji ev kula-vêن han ên serê wan dirêj li serê hinek dewrêşen Kurd ên Silê-manîyê hene. Ferîdunoğlu Arif Efendî yê neviyê (torinê) Mewlana Celaleddînê Rumî, qatek cilûbergên derwêşê Mewlewîyan pêşkêşî Silêman Paşa yê rizgarkerê Rumelîyê kir(58), ku ji sike, ferace (curek cubbêن tenik û fireh e-Elîşêر.), tennure (fistanêن derwêşen Mewlewîyan-Elîşêر) û kemerê pêk hatibû. Sultanêن Osmaniyyan, heta dema Mehmed Fatîh, cil-bergên Mewlewîyan li xwe dikirin. Pişt re mîzerên xwe bi surme nexş

kirin û jê re taqqetekye û navê tennure ji guherandin kirin "qanûn quşağı", yanî piştinîya "qanûnî". Mêzera wezîrê mezin (wezîru'l 'azem) di awayê çadirê de bûye û ber bi pêş de meyîldar bûye. Mêzera Şeyxu'l İslâm bicûk bûye. Hewce ye em vêya han ji bizanîn, ku ferace wek kewa ye, bi milê alîyê piştê ve vekirîye ji alîyê pêşiyê ve ji girtîye û di wextê Dewleta Osmanî de cilûbergê zanyaran bûye. Niha di nav mirovên dînî yên gundan de ferace hene. Kemer ji curek piştinîyek sêçar tilî pan e û bi derziyê ji hevrîsmê renga-reng û hinek caran ji yên sîmdar ji tê durustkirin. İhtîmal e, ku di tabloya Mehmed Fatîh û ya Stenbolê de, Sultan ji kemer li pişta xwe girêdabe. Kemer, bi piranî li ser kewa yan bi awakî din em bêjin; ser cilûbergên dirêj tê girêdan. Kemer, ne tenê di nav Osmanî û İranîyan de hebûye, ji ber ku Kurdan ji bi kar anîye. Wek misal; di wêneke tabloya yekem a Şerefnamê de, kemer heye. Ne dûr e, ew Asûriyê ku di tabloya hejmara diduyan de li ber derîyê Kela Dêzê ya li Hekarîyê, sekîniye, ewî ji kemer li pişta xwe girêdabe. Eva han ji heye, ku ew dikandarê di tabloya yanzdehan de yê nîverastê de ye, kemer li piştê hebe. Heta van salêن dawiyê, li Kurdistanê kemerên Hemyane hâtine bikaranîn. Bi taybîfî kesên dewlemend yên bajaran li ser cilûbergên xwe yên dirêj girê didan. Ji ber ku ji piştinîyên qumaş qîmettir û bihatir bûne. Niha ji kemera Hewêz Hebîb Axayê Koysencaxî li ba min e. 150 cm. dirêj e û ji du perçan pêk hatîye; perça yekem di dema girêdanê de dikeve ser ya diduyan. Ji kitêlên(kêlên) dirûtina derziyê yê renga reng ê ji hevrîsmê hatîye çekirin û gulingeyek bi rîşî li ser e û bi sê qayîş û avzêman tê qayîmkirin.

TABLOYA HEJDEHAN ŞERÊ EDİRNEYÊ

Ev tabloya han a di rûpela 173'an de (li gor tabloyêng rengin din. 172 û 173 yan de. n.J. N.), behsa Sultan Muradê kurê Orhanê kurê Osman û şerekî wî dike. Yanî; Sultan Muradê Yekem ê di navbera salên 1359-1389'an de hukum kirîye. Vêca, ji ber ku Şerê Edirnê û dagirkirina vî bajarı ji hemû bû-yerêng dewra wî girîngtir bûye, ihtîmal e, ev tabloya han ji behsa wî şerî bike. Şerefşan, di rûpela 172'an a Şerefnamê de wiha dibêje: "Di sala 763'ê koçî (1361/1362'ê zayînî) de Sultan Murad eskerek di bin serokatîya Lillahê Şahîn de şand ser Edirnê, ku niha merkeza bajarekî Tirkîyê ye. Şerek gelek mezin li gel Bîzansîyan qewimî û pişt re Sultan bi xwe jî bes-darî şer bû, Kela Edirnê abluqe kir û ji rûbarê Merîç derbaz bû. Tekurê rîberê Bîzansîyan bi belemê baz da û Sultan jî bajar dagîr kir." Ev gotinêng Şerefşan, bi tevayî li gel tabloyê li hev têng. Wek di tabloyê de jî Sultan ji ava Merîçê derbaz bûye û gehîştîye ber kelê. Ji ber vê yekê ev dibe belge, ku ev tabloya han li ser Şerê Edirnê ye, ne li ser Şerê Kela Bîrrox ya Kela Xurlî yan jî li ser şerek di dema Sultan Murad de ye.

Li gor tabloyê, êrişa Osmanîyan di milê rastê de hatîye ser Bîzansîyan û ew ber bi şikestinê de ne, tirs û rev dikeve nav eskerên Bîzansîyan, ku ew bi şewqên serên xwe yên Ewrûpî têng naskirin. Sereskerê hêza Osmanîyan li ser girekî bilind ê li hemberê Kela Edirnê sekinîye û li şer dinêre. Lillahê Şahîn,

di nav wan de bi cilûbergek spî, yan nêzê wî, di wênê de tê xuyakirin, ku bi temen e, çend mirovên bi rim li rexê wî dîyar in. Ji ber ku di wê navê re Sultan Murad tê, wek Şerefxan jî dibêje; piştî şikestin û paş ve kêtandina Bîzansîyan Sultan tê nav kelê.

CURE TİVİNCEK

Ev yeka han di tabloyê de derdikeve, ku Bîzansî çekdarên agirbar in û Osmanî jî bê tiving in, eva han nebe, ku çekek agirbar li pişt Lillahê Şahîn de tê xuyakirin û du xwehrîti di vê çekê de heye û devê wê, wek a aletê buqa eskerî (borezana eskerî) mezin e. İhtîmal e, eva han tivingek be, ku çend gulan têxin devê wê yan jî aletek e pê neft û agir tê avêtin. Yek ji Bîzansîyan li ser kelê tivinga xwe ber bi wî aletê şerê yê Osmanîyan ve dirêj kirîye, ku eva han di awayê tivingên qinnase (tivingên bi dûrbîn) de ye û mimkun e wî çaxî qet nebe, lê di dema Şerefxan de qinnaseya bi dûrbîn hebe. Ji vê wêdetir, tivingdarek di pencerekê de tivinga xwe girtîye û ber bi Osmanîyan de diteqîne. Ev tivinga han gelek dirêj e û devê wê gilover tê xuyakirin, yanî bazindekî hesin li dora devê wê ye. Di xwarê kelê de, tivingeka kurt di destê Bîzansîyekî de ye. Di wê tabloyê de, sê, yan çar cur tiving têx xuyakirin, wisa tê kivşê, ku di wî wextî de Bîzansî zêdetir xwedî tiving bûne. Bêguman, di wî wextî de tiving hebûne, ji ber ku dîroknivîsê mezin ê şaristanîyeta İslamiyetê George Zêdan, di kitêba xwe ya bi navê "Tarîx Temeddun el-İslamî" cilda yekem di rûpelên 201-202'an de, wiha nivîsandîye: "Xelkên Marokoyê ji di sala 1118'ê zayînî de şer bi çekên agirbar kirine". Ji İbnê Xaldun jî eva han wergirtîye; "ehlîn welatê Mexribê di sala 762'ê koçî (1273'ê zayînî) de şer bi tivingan kirine". Di ecêb-mayîna malumatên İbnê Xaldun de derdikeve, ku wê çaxê çekekî degmen bûye. Edî ez nizanim di vî şerî de tiving tune be, û wî hunermendê Kurd li gor hoyê karê wênê çêkirîye, ku belki li ser hebûn û şiklê çend cûre tivingên di sedsala şanzdehan de ye. Eva han jî nimuneke din a giranbiha ji giringîya wênên Şerefnamê ye.

TABLOYA NOZDEHAN

SULTAN MEHMED FATİH Ü STENBOL

Ev tabloya han di rûpela 190'an de (190-191), li ser dagîrkîrina Stenbola paytexta Dewleta Osmanî ya di sala 857'ê koçî (1453'ê za-yînî) de ji aliyê Sultan Mehmed Fatih de hatî kîrin e. Wêna Behra Marmarê di tabloyê de hafîye çêkirin. Sultan Mehmed Fatih, bi rîyek reş û serkulavekî spî, yê mezin û lûlekî, li hewşa xanîyekî li ser kursîyekê rûniştiye. Yek, ji serkulavê wî tê zanîn, ku wezîrê wî ye, nivîsek di dest de ye û li milê wî yê çepê sekinîye. Ji wî hinekî wêdetir, mirovek rûniştiye, ihtîmal e dergevanê Sultan be, yan bi gotinek din; serokê carî-yan be. Ji ber ku ew nexşê wek sosinê bi serkulavê wî ve ye; nişana xulam û carîyên Sultanên Osmanîyan in, wek me di tabloya hevdehan de behsa vê yeka han kiribû. Çar xizmetkar, ku ne dûr e carîye bin, bi wan nişanan ve di tabloyê de dîyar in. Sisê ji wan li ser destê rastê yê Sultan Mehmed in û yê çaran jî serê xwe ji derî ve anîye der. Çend kes li milê pêşî li hemberê Sultan in, wisa dixuyê yek ji wan xezêmek di kepîyê wî de ye. Fes li serê wan hene û qumaşek tenik ê xetdar li dora fesên xwe pêçane. Gulingek dirêj bi fesên wan, ve, yan

perçek taybetî wek gulinge, li milê alîyê piştê li ser milê wan ber bi jêr de hatîye xwarê. Ev fesên han ên eskerî ne. Ji ber ku ev cûre fesên han li serê mirovên eskerî yên Osmanîyan hene. Ev cûre fesên han di tabloya Şerê Çaldiranê de jî têx xuyakirin.

Xanîyek di nav behrê de ye û çend kesên din jî di tabloyê de dîyar in. Yek ji wan sîdarek (şewqên eskeran ên ku li pêşîya wan sîper heye-Elişêr) di awayê sîdara eskerên niha li serî ye, ku evê han dişibe bi şewqên eskerên İraqê yê sinifa eskerên tanq(debabê)an, yek ji wan jî ku dişibe bi mirovekî feqîr, serkulavek biçûk li serî ye. Bi vî awayî du cure serkulav, cara yekemîn di tabloyêن Şerefnamê de têx dîtin.

Ev pêşçavxistina jorê, tenê beşê yekem ê tabloyê bû, ku li ser rûpelek taybetî hatîye çekirin. Beşê duduyan ê tabloyê, li ser rûpelekî li hemberê wê ye û cardin wêna behrekê ye. Di tabloyê de, mizgeftek li ser qeraxê behrê ye û du minare jî di koşen rojhilat û rojavayê minarê de ne. Du mirovên dînî di wêne de ne; yek ji wan xwedî serkulav û cilûbergek spî (zer. n. J. N.) ye û li ber pencerekê rûniştiye. Yê din xwedî serkulav û cilûbergek reş (şînê tarî, n. J. N.) e û li ber pencereke din e. Mirovek din ê dînî, ku xwedî rîyek spî û gelek dirêj e, li pişt ve beşa mizgeftê, di alîyê minara rojhilat de ye. Kur û keçek jî li milê minara koşa rojava ne. Destrûkeka rengîn li serê keçikê ye û destrûkeka din jî li der-dorê wê pêça ye. Kurik li der ve ye û keçik jî li ber pencera xanîyekî nexşdar e û li hev û du dînîerin. Jinek li pişt pencera xanîyekî ye, ku li pişt vî xanîyî ye. Serkulavê wê wek yê keçikê ye, lê, destrûka serê wê spî ye û destrûkeka din a biçûk jî li der-dorê qayîm pêçaye. Ev cure destrûk girêdan ên jinê navsere ye.

XANIYÊN WAN

Di warê terzê mîmarîya xanîyan de em dikarin vê bi bêjin: Dîwarê wî xanîyê ku Sultan Mehmed Fatih li hewşa wî rûniştiye, ji kevirên spî yên cargoşe yên wek seramîk, yan her seramîk bi xwe ye li ser hatîye raxistin. Lîbelê, xanî ji kevirên adetî hatîye avakirin. Wek wî raste dîwarê li pişt Sul-

tan, ku di wêne de bi rengekî reş (morê tarî. n. J. N.) derketîye. Rûkarên xanî ji bo rindî û spehîtiyê kirîye çar beş. Awayek sê goşe, bi awakî dirêjî di nîverasta dîwar de ye, tu dibêjî belkî ji bo nexsekê, yan nivî-sinekê terxan kirîye. Ger çiqas ev awayê han baş ne diyar e, lê, wisa tê dîtin, ku birek şiklên gilover di nav vê sêgoşê de rêz kirine. Qubhê li ser bi bilindiya xanîyan dirêj û çargoşe ne. Osmanîyan gelek ji van cûre qubhan di bînasaziyê serayan de durust kirine û niha jî li Îraqê li ser vê rîyê dicin. Ewa me got mizgeft e ihtîmal e beşa wê ya piştê medrese be. Di wî wextî de serbanêwan wek sacêr rojavayê bûne, yanî wek serbanê xanîyê Ewrûpayê. Niha jî serbanê piranîya xanîyê bajarên Tirkîyê bi vî awayî ne, yanî bi kîremît hatine girtin û siwax kirin. Beşa piştê, ku gumbetekê çav çav e û di şiklê hêkê de ye, mizgeft û minarêne wê dikevin herdu koşen wê yên hewşê. Her minarek du kemerpêçen wê hene, kemera jorê bilindtir e. Ev minarêne han û terzê bînasazîya minarêne Osmanîyan yek û du nagrin û ne wek hev in.

TABLOYA BÎSTAN

ŞERÊ ÇALDIRANÊ

Ev tabloya han li ser wî şerê dîrokî yê di navbera Dewleta Osmanî û ya Sefewîyan de ye, ku li Çaldiranê, yanî; li Kurdistanê çêbû(59). Ev cîyê han li ser qeza Muradîyê(Bêgirî) ya ser bajarê Wanê, li Kurdistana Tirkîyê ye. Şer, roja siyê meha Recebê ya sala 920'ê koçî (24'ê Tebâxa 1514'ê zayînî) destpêkir, ku nêzîkê dused hezar, yan hîn zêdetir çekdarên ji xelkên Rojhilata Navîn bi herdu milan re beşdarî vî şerî bûn û xwîna hev rijandin. Nezmîzade di "Gulşenê Xulefa"; rûpela 185'an de wiha dibêje: "*Li der-dorê deh hezar kesan hatin kuştin. Pi-ranîya mîrên Kurdan piştgirîya Dewleta Osmanî kirin û hê-zên Kurdan rolek mezin di serkeftina Osmanîyan de lîstin û heta çend mîrên Kurdan di vî şerî de hatin kuştin*". Hinek dîroknivîs, Şerê Çaldiranê dikin destpêka diroka siyasi ya nû ya Kurdan. Ji ber ku Kurdistan, ji Kurdistana Bakur bigire heta Kerkûk, ku di bin destê Dewleta Sefewîyan de bû, ket bin destê Dewleta Osmanîyan. Eya han jî li gor xwestin û daxwaza mîrên Kurdan bû. Ji ber ku nerehetîya wan li ser problema sunîtiyê hebû, ev jî ew bû ku siyaseta Şah İsmailê Sefewî a di vî warî de di cî de nedidîtin. Sultan Selîm jî ji bo vê piştgirîya han, biryar da ku siyaseteke nerm li hemberê Kurdan bî-domîne. Ji ber vê, mîrên Kurdan ji bo rêvebirina senceqên xwe, bajarê Diyarbekrê wek paytext bijartin. Ji ber vê jî heryek ji wan kar û barêñ navçen fermanrewatîya xwe, ku pişt re bûn senceq, bi rê ve birin. Qet fermanberek Tirk di wan senceqan de nehatin danîn, ji derveyî walîyê wilayetan ku ew Tirk bûn. Yanî em dikarin bêjin; hukumranîyeke wek serbixweyî ji wan mîrekîtyêñ Kurdan re hat dan û di vî warî de Sultan Selîm

fermanek derêxist(60).

Tê dîtin ku Şerê Çaldiranê, şûnewarek kargerînî li pişt xwe hiştiye. Heta hunermendên Iranî, Tirk û Kurd ji, sêsed salan piştî şer, wênên vî şerî di tabloyên xwe de nexşandine. Wek misal; Rich, di roja 26'ê Tebaxâ sala 1820'an de, tabloyeke vî şerî li bajarê Sine, li ser dîwarê koşka Emanalla Xan ê Mîrê Erdelan dîtiye(61). Ahmet Rasim ê dîroknivîsê Tirk ji, di rûpela 259'ê kitêba xwe ya "Osmanli Tarîhi", di cilda duduyan de, tabloyek Şerê Çaldiranê çap kirîye. Lê, eva han wek tabloya Şerefnamê sipehî nîne û hemû zanyarîyên li ser şerî tê de tunene.

Di vê tabloya Şerefnamê de, şerek gelek germ û tund têt ber çavan. Bi awakî wisa ku gulên top, tiving û seretîran di Deşta Çaldiranê de têkelî nav hev û du bûne. Eskerên Iranê li milê rastê ne û Şah İsmail ji li ber devê çadira xwe di navbera du kesan de sekinîye. Ya milê rastê jina wî ye û yê milê çepê ji kurek e, ku ihtîmal e, kurê wî be. Şah, bi çavekî rikoyî li Sultan Selîm dinêre. Eskerên Osmaniyan di milê çepê yê tabloyê de hatine wênekirin. Di nav hêzên Osmaniyan de; Tirk bi fes, Ewrûpî bi şewqe û Kurd ji bi serkulavên xwe ve di meydana şer de têr naskirin û ev hêzên han li ser birek hatine birêzkirin. Heta li gor ciyê Kurdan, wêne, bi awakî temamî li gel wan zanyarîyên Nezmîza de yê dîroknivîs digoncin, ku di rûpela 185'ê "Gulşenê Xulefa" de wiha dibêje: "Eskerên Rumelîyê, yanî beşê Ewrûpayê Tirkîyê û eskerên Dîyarbekirê, yanî eskerên Kurdan, di vî şerî de, herdu, di aliyê milê çepê yê eskerên Osmaniyan de ciyên xwe girtibûn".

Wêna Sultan Selîm di cergê eskerê Osmaniyan de têt dîtin, ku siwarê hespekî mezîn ê zengil di milê wî de ye û du kesên bivir di destê wan de, li pêşîya hespê wî dimeşin. Sultan bi awakî rikoyî li Şah dinêre, lêva xwe digeze û rimek mewcdar ji di destê wî de ye. Hêzên pîyade yên tivingdar ji li nêzikê wê nîvcergê ne û top li pêşîya wan in. Eva han ji li gel wan zanyarîyên Ahmet Rasim digunce, ku di "Osmanli Tarîhi" cilda yekem di rûpela 265'an de, eva han gotîye: "Sultan, bi hêzên xwe yên Yenî Çerî di nav cengê de bû û rêzek deveyênu ku topêni li ser ereban dikişandin, li pêşîya wî bûn.

Osmanîyan, li gor tabloyê, topên xwe li milê rastê yên hêzên xwe kom kirine. Di dawîya tabloyê ya milê çepê de, topên xwe bi ereban ve girêdane û berên eskerên wan ber bi eskerên Iranê ve ne. Her wiha çend topên din jî di nav cengê de tê dîtin. Bêguman ev topên han bi zincir bi hev ve hatine girêdan. Lêbelê, hêzên siwarî yên Iranîyan, topên Osmanîyan ji hev veqetandine, yanî zincîrên wan qetandine, wek di nav cengê de tê xuyakirin, hespek bi lingên xwe ve zincîrê topan ji-hev kirîye. Di wêne de eva han jî daye nîşandan, ku topên Osmanîyan zerarekî mezin dane hêzên Iranîyan ên ser destê çepê û ew ber bi şikandinê de birine. Eva han jî li gel zanyariyên Ahmet Rasim hevmebest e, ku di vî warî de wiha dibêje: "Eskerên Mehmed Xan Estaclo, di milê çepê yê eskerên Iranîyan re êrîş bir ser milê rastê yê eskerên Osmanîyan, lê, Sînan Paşa, karî bi topan wê êrîşê pûc bike û bi xurtî biçe ser wan. Mehmed Xan û kurê xwe di vê êrîşê de hatin kuştin".

Di rastîya xwe de kuştina Mehmed Xan, ku li Dîyarbekrê sereskerek Şah bû -yanî ew perça ku iro jê re Kurdistanâ Tirkîyê tê gotin- bû sebebê şikestinê, ji ber ku hêza milê çepê ya eskerên Iranê tûşî zerarek gelek giran bû. Ew zerarênu ku Osmanîyan bi hoyê topên xwe ve di vî mili de li Iranê xistin, di tabloyê de xuya ne. Dûr nîne pişti kuştina Mehmed Xan, Şah bi xwe bû serokê milê çepê yê eskerên Kurdî, mimkun e pişti vê bûyerê ye, ku Şah birîndar bû û ji hespê xwe ket. Vêca pişti vê ye, hêza eskerên Yenî Çerî yên di nîverasta eskerên Osmanîyan de bûn, êrîşî milê çepê yê Iranîyan kirin. Edî pişti vê, eskerên Iranîyan şikestin û jina Şah jî bi dîl hat girtin. Li milê çepê yê Osmanîyan top hebûn, lê, roleke çalakane li ser milê rastê listiye û bûye hoyê kuştina Mehmed Xan Estaclo, ku Şerefhan gelek caran navê wî bi bîr anîye û gelek zêde li ser wî sekinîye; ji ber ku peywendîya wî bi dîroka Kurdistanâ ve hebûye. Pişti vê bûyerê gelek demek dirêj jî, her hêzên wî li Kela Dîyarbekrê, Mêrdînê, Cizirê û li kelên din ên Kurdistanê mabûn û xwe nedabûn dest. Nêzîkahîya du salan pişti vî şerî, vêca Osmanî û Kurdan bi awakî gelek zehmet, navçê rêk û pêk kirin. Her ji ber vê yeka han e, ku wênekêşê Şerefnamê, pi-ranîya wênen hêzên topan ên wî mîlî çêkirine. Di serbarê van

hemûyan de jî, ku hêza milê rastê ya eskerên Îranê, zerarek gelek zêde li topên milê çepê yên hêza Osmanîyan daye.

Cilûbergên hêzên siwarîyên Osmanîyan ji yên peyan cuda ne, ji ber ku cilên wan kurt in û serkulavêwan spî ne û çekên wan ji rim, tîr û şûr in. Yeka din ji, wêna çekên agirbar, ên wek top û tivingan, di nav Îraniyân de nekêşaye, tenê wêna rim, tîr û şûran kêşaye. Wisa dixuyê mebesta wî ji vê ew bûye, ku bide nîşandan; çekên agirbar ên Îraniyân gelek kêm û sist bûne, yan her qet topên wan tunebûne. Lê belê, li gor tabloyê çekên agirbar yên Osmanîyan gelek bi hêz bûne û bi taybetî ji top, ku bûye sebebê serekî yê şikestina Îraniyân û serkevtina Osmanîyan. Ahmet Rasim di vî warî de wiha dibêje: "Hêzên siwarî yên Îraniyân gelek bi hêz bûne, fedayîyên wan gelek bûne, lê belê, hêzên wan yên zirxî lawaz bûn û topên wan ji tunebûne. Her wiha hêzên wan yên peya ne bi rîk û pêk bûne. Eşkera ye, hêzên siwarî yên Osmanîyan, ku li dora heştê hezar û yên peya jî cil hezar kes bûye, di alîfyê rêexistinîyê de bi ser û ber bûye".

Şerefxan di Şerefnamê de, bi berfirehî behsa van zanyarîyan kirîye. Ji ber ku evê han ku di tabloyê de wêna wan hâtine kêşandin, deqa zanyarîyên dîrokî ne û behsa bûyerên vî şerî dîkin. Wek ku min di pêş de ji got; ew hunermendê ku wê-nîn van tabloyan kêşaye, mimkun e, dîroknivîs be û zanyarîyeke wî ya gelek rasteqînî û berfireh di warê vî şerî de hebe, vêca êdî wek tê xuyakirin; ci ser cûre hêzan û parvevekirina wan di meydana şer de û ci ji bizavî û bêhêziya çekên herdu milan. Ji ber vê yekê ez her bi vî awayî lê dinêrim; ku wênekêşê vê tabloyê û yên din ji her Şerefxan bi xwe ye.

Di dawîyê de ez dixwazim spasî Kitêbxana Bodleian bikim, ku razîbûn nusxeyek ji ber vê nusxa bidestnivîs ya Şerefnamê, ji min re ji ber bê girtin. Lê, her ci hal be, neket destê min, ku heta kak Elî Kemal vî karê han ji min re hêsan kir û şand. Ez gelek spasî wî dikim û jîyana wî dirêj be. Her wiha ez gelek spas ji bo birayê rewşenbîr kak Sidîq Salih Ehmed dikim, ku bi Kurdiya xwe ya paqij ve di vî warî de alîkarîya min kir.

PERAWÊZ

(1) Di nusxa destnivîs a Mihemedê kurê Osmanê Hesenkêfi de, 602-yê koçî û 1205/1206'ê zayînî, yanî sala koçkirina İbnu'l-Rizaz nivîsandî ye. Di vir de navê wî wiha hatîye: Bedî'uzzeman Ebu'l-Ez Bin İsmâîl Bin el-Rizazu'l-Cezerî.

Lê, di nusxa Ayasofyayê ya di bin reqema 3602'an de, ku di sala 755'ê koçî de hatîye nivîsandin, navê wî wiha ye: Bedî'uzzeman Ebu'l-Ezîz İsmâîl Bîn el-Rizazu'l-Cezerî. Nusxek wênekirî ya Ayasofyayê li ba min e. Zêdetir pişt bi ya Hesenkêfê têt qayîmkirin.

(2) Ev wêna han di kitêba Miqeddime'l 'Ilm el-Mekanîk Fil Hedarete el-Erebîyye, ya Macîd Ebdullah Şemsî de hatîye belav kirin. Kitêb, ji beşek kitêba bidestnivîs a İbnu'l-Rizaz û lêkolînê pêk hatîye. Di sala 1977'an de, li Bexdayê hatîye çapkirin. Ciye gotinê ye, ku di wextê xwe de çend wênên kitêba İbnu'l-Rizaz a nusxa Kutubxana Ayasofyayê, ku di bin reqema 3606'an de ye, bi rîya Me'had el-Mextutat a Qahîrê ket destê min. Ev li gel çend nivîsinên xwe ve, min da kak Aras Eb-dulqadir ê xwendevanê Enstituya Hunerên Ciwanan a Bexdayê ji bo ku bide Şakir Hesenê mamostê huner. Lê mixabin, vi xwendevanê han, ew di hejmara el-Teaxî ya roja 13.11.1974'an de, bi navê xwe belav kirin.

(3) Li van serokanîyan binêre: Kovara Sumer, cilda 11'an, beşê yekem û rûpela 28'an. Gotara Zekî Mihemed Hesen û Dîmanu'l-Fununu'l-İslamî, rûpel: 44. Hesen Paşa, el-Teswîru'l-İslamî Fî'l-'Usûru'l-Wusta, rûpel: 129, 141 û 145.

(4) Behsa vê destnivîsa Me'rîfetnamê, di kitêba Mextutatu'l-Musil, rûpela 74'an ya Dawid el-Çelebî de hatîye kirin.

Ez wisa dizanim, ku ev destnivîsa han, niha li Kutubxana Muzexana Îraqê ya li Bexdayê heye. Ji ber ku, min carek ji berêz Esamet Neqşibendî yê berpirsiyârê besa destnivîsa kutubxanê re got, ku Me'rifetname bi wênekirî li balê ye. Min daxwaza hinek zanyariyê li ser İbrahîm Heqqî û gundê wî Tillo jê kir. Her çendin hinek zanyarî dan min, lê, di hinek waran de ber bi çewtiyê de çûbû. Wek, ku Tillo li ser Kurdistanâ Îraqê hesibandibû. Di rastiya xwe de, İbrahîm Heqqî kurê Osman e û ji gundê Tilloyê yê nezikî bajarê Sêrtê ye.

Tillo, li ser bilindayek rasta ava Botan e. İbrahîm Heqqî, di sala 1195'ê koçî (1780-yê zayıñî) koça dawîyê kirîye. Sala 1170-yê koçî nivîsandina sala Me'rifetnamê ye, ku bi Tirkî li ser çend zanistî nivîsandîne. Di kitêba bidestnivîs a me de, E'lam el-Kurd we Kurdistan, cilda yekem, wergera hejmara 45'an de, me navê 35 kitêbên İbrahîm Heqqî nivîsandine.

Ser vê mijarê binêre; İsmail Paşa Baban, Hediye'l-Arifin, rûpel: 4 û her wiha cardin İsmail Paşa Baban, Eda'e'l-Meknûn Fî'l-Zeyl'la Keşfu'l-Zunûn, rûpel: 152-511 (Ez bawer im, ku di van reqeman de şasîtiyek çapê heye-Elîşêr).

Di roja 14'ê Tebaxâ sala 1977'an de, ez çûm bajarê Sêrtê, ku bajarekî Kurdistanâ Tirkîye ye. Min dît, ku ji bo sersala koçkirina İbrahîm Heqqî agahdarî bi dîwaran ve zeliqandine. Dema ez çûm mizgefta Sêrtê ji bo dîtina Mele Bedriyê Tilloyî, feqîyêñ wî ji min re gotin; çûye Tilloyê ji bo sazkirina şahîyê. Eva han hemû salan li wir tê kirin. Her wiha eva han ji gotin; nusxeke Me'rifetnamê ya bidestxetê İbrahîm Heqqî li Tillo heye. Mele Bedri ji yek ji wan şêxên Tilloyê ye û ji binemala Feqîullah e, ku bi navê Sultan ji bi nav û deng e, ew melayek baş û naskirî ye. Wî çaxê tarîxa koça dawîyê ya İbrahîm Heqqî di agahnameyêñ xwe de berhev kiribû; lê, mixabin di bîra min de nemaye ka çend bû. Min di kitêba xwe ya bidestnivîs ya "Geştek Arkeolojî li Kurdistanâ Bakûr", rûpela 583'an de, behsa vê şahîniyâ han kirîye.

(5) Ewlîya Çelebî, Seyahetname, cilda çaran, rûpel: 121, 124 û 284, wergerandina Kurdi, Seîd Nakem.

(6) Berêz Dr. Kemal Mezher, di kitêba xwe ya bi navê "Mêjû" di rûpela 11'an de, nivîsiye, ku Şerefşan, di dorûberê

dawîya meha Tebaxê yan destpêka meha İlona sala 1598'an, cilda diduyan a kitêba xwe temam kirîye. Ev zanyarîya jî ji pêşgotina cilda diduyan a çapa yekemîn a Şerefnamê wer-girîye. Vêca ne dûr e di nusxeke din a Şerefnamê de sirinceke wiha hebe; lê, di vê nusxa bidestnivîs a di destê min de, tiştek wiha nîne.

(7) V.Vilyaminov Zirnov, di pêşgotina xwe ya ji bo Şerefnamê ya çapa Rusî ya sala 1860'an de, wiha gotiye; nusxa Xanikov, Mehmud Rizayê kurê Sabir Eliyê Kerbelayî di sala 1252-yê koçî (1838'ê zayînî)de, li ber nusxeke ya bidestxetê Şerefxan bi xwe nivîsandiye, ku di dawîya Muherrema 1007'ê koçî dawiyê bi nivîsandinê anîye. Her di vî warî de wiha gotiye: "Nusxa bidestnivîs ya Kutubxana Qeyser a li Petersborgê, ku di vir de sala 1007'ê koçî nivîsandiye, Şerefxan ev nusxe redakte kirîye". Lê, ev nusxa han ji serî heta binî kêm û şâştî tê de hene. Binêre; pêşgotina Zirnov, rûpela 14-16'an a çapa Qahîrê, ku hemû seretayî pê re çapkirîne. Hêjâyê gotinê ye, Bursali Mihemmed Tahir, di kitêba xwe ya "Osmanli Muellifleri", cilda sisîyan, rûpela 72'an de, wiha dibêje: "Nusxa eslî ya Şerefnamê li gundê Tilloyê ye". Wek me got; ev gundê han li nêzîkê bajarê Sêrtê li Kurdistana Tirkîyê ye. Min ji ba xwe hewlê bi destxistina wê kirîye.

(8) Ewîlya Çelebî, Seyahetname, cilda çaran, rûpel: 278, wergerandina Seîd Nakem. Her wiha rûpela 242-ya nusxa bi Tirkî ya çapa sala 1314'ê koçî, Stenbol. Di wergera Kurdî de, werger, her ji ber xwe de gotin û "çend beyt şiir" li ser zêde kirîye, ku di nusxa Tirkî de tûne. Ji derveyî vê, li gor bawerîya min hinek tiştên din jî li ser zêde kirine.

Hewce bû, wergerandin mezintir bûya. Li gel tev van tiştan jî, Seîd Nakem, ji bo wergerandina vê kitêba biçûk xizmetek mezin kirîye.

(9) Ewîlya Çelebî, Seyahetname, cilda çaran, rûpela 251'ê, nusxa Tirkî û rûpela 251'ê wergerandina Kurdî.

(10) K.C.Rich, Seyahetname Rich, rûpel: 107-108..

(11) Di derbarê zanyarîya cilûbergên Kurdî de, min îstîfade ji van berêzan wergirîye:

Şêx Mihemmedê Şêx Kerîmê Berzencî yê terzî, hoste Resûl

Mihemmedê terzî, hoste Mihemmed Elî Dewle yê terzî, hoste Ebdullah Mihemmedê Baneyî yê terzî, Hamî Begê Caf, Mele Ebdulkerîmê Şêx Hisinê Qeredaxî, Mamoste Ehmed Xoce, Mihemmed Seîd Mihemmed Ciwamêr, Xwedê jê razî be, Elî Dede, Mele Ezizê Mele Eliyê sehhaf, Elî Derwêş Mihemmed, Mihemmedê Hacî Maruf, Şukrixana keça Lale Kerîm û jina Mele Musa Hamid, evê han xelkê Silêmanîyê ne. Ji xelkên Koyê ji; Naciye Mihemmed, Mistefa Hacî Elî û kak Tewfiq Mele Sidîq Hacî Elî.

Ev korteka han, ku ji ber pîrozîya wê wek teberik maye, ji qumaşekî bi qîmet ku jê re şalê tûrmeyî tê gotin, hatîye durustkirin. Rengê wê di navbera zer û spî de ye. Xetdar e (kitêdayî ye) û kitêlên wê bi derziyê ji tayêن sor, zer û hinek ji ji şîn pêkhatîye. Dirêjahiya piştê 120 santim e, navmilê wê 36 santim pan e û milê wê ji 19 santim hatîye birîn, situriya pembo yê ku kirîye navê 8 milimêtre ye. Qismê xwarê tengtir tê xuyakirin.

Ya di vê kortekê de tê xuyakirin eva han e, ku hinek ji pêsi-ra wê ya rûyê milê çepê, dorê du santîman, yan hîn zêdetir pantir dibe, ji bo ku milê çepê bikeve ser milê rastê. Di korte-kên din de ev yeka han nayê dîtin. Em dikarin bêjin; ev korteka Kak Ehmedê Şêx, nimûneke herî giring ên kortekan e. Tê dîtin, ku di warê dirûtinê de hîn ji vê ji baştir hene. Wek mîsal; korteka Hacî Seyîd Hesenê mamê Şêx Mehmûd, yanî nevîyê (torunê) kak Ehmedê Şêx, ku di Şerê Derbendê Bazîyan ê di sala 1919'an de, bi gulê topê Ingilîzan şehîd bû. Eva han ne tenê di hêla dirûtinê de, di birîna xwe de ji ji hemûyan baştır û qîmettir e û bi dirûnên (kitêlên) biçûk û çendîn nexş li ser hatine durustkirin. Lê, min korteka Kak Ehmedê Şêx kir nimûne, ji ber ku eva han hem sadetir e, hem ji ji korteka çîna navendî û ya destxetê xelkê Kurdistanê re nêziktir e.

Em dikarin bejna Kak Ehmedê Şêx, bi wasita vê kortekê bidin dîyar kirin, ku dibe li dora 170-175 santîmetran. Ev korteka han, niha li mala Kak Babe Resûlê Şêx Nûri ye. Babe Resûl, ji Silêmanîyê ye. Milekî vê kortekê nemaye. Ji ber ku di wextê xwe de, jina Xeîl Kenne, ku ji binemaleka mezin a ji xelkê Bexdayê ye, ev korteka han ji ber teberik û pîrozîye ji bo demek ji Hefsexanê Neqîb girtîye û nîvê milê çepê jê kirîye, ji

bo teberikîya wê li ba xwe hildaye. Her di van salên dawîyê de jî, yek ji xelkê Silêmanîyê ji bo derd-nexweşîya xwe pê bide şifa kirin, birîye û keça wî jî milekî wê jê kirîye û li ba xwe girîye. Korteka Hacî Seyîd Hesenê mamê Şêx Mehmûd jî, ku min behs kir, ji qumaşekî zer ê bi qîmet e û niha li mala Faruqê Seyîd Mihemmedê nevîyê wî ye. Min du-sê wêne ji ber wê girtîye.

(12) Ewlîya Çelebî, Seyahetname, cilda çaran, rûpela 251'ê Tirkî û 290'ê Kurdi.

(13) Selah Hiseyn el-'Ubeydî, el-Melabîsu'l'Erebîyye el-İslamîyye Fi'l-Esrî'l-Ebbasî Min el-Mesadîrî'l-Tarîxiyye we'l-Esrîyye, rûpel: 108.

(14) Ewlîya Çelebî, Seyahetname, cilda çaran, rûpel: 50, Kurdi.

(15) Ewlîya Çelebî, Seyahetname..

(16) Di vî warî de li wênekêşen Sefewîyan binêre. Ni'met İsmâîl; Fununu'l-Şerqu'l-Ewset Fi 'Usurî'l-İslamîyye, rûpel: 215 û 220

(17) Arnist; el-Fen el-İslamî, rûpel: 146.

(18) Dr.Zekî Mihemmed Hesen, Medrese Bexdad Fi'l-Teswîrî'l-İslamîyye, rûpel: 27

(19) Binêre; tabloya Wasit, di kitêba Meqamatu'l-Heriri el-Musewwere, ya Nahîde Ebdulfettah el-Ne'imi

(20) Ni'met İsmail; Fununi'l-Şerqu'l-Ewset Fi'l-'Usurî'l-İslamîyye, rûpel: 200.

(21) Dr.Zeki Mihemmed Hesen, Medreset Bexdad Fi'l-'Usurî'l-İslamîyye, rûpel: 32-37.

Nahîde Ebdulfettah Ne'îmî; Meqamatu'l-Herîrî el-Musewwere, rûpel: 60. Eva han a dawîyê di bin tesîra hunerê Dibbanî ya Rojhîlat û Farisî de maye û wênen xwe li gor vê regezê çêkirîye.

(22) Ji bo naskirin û teswîrkirina çend wênan, min ji wênen van hunermendan istîfade kir; kak İsmâîl Xeyat, ku ev nebû-ya ez ê ber bi şâşîiyek mezin de biçûma, kak Qadir Mîrxan, kak Azad Hemdî, kak Muhsin Hisen Pîro. Ji bo aletê müsiqayê yê tenburê jî min ji mamostê müsiqayê Wilyam Yuhenna istîfade kir. Ji bo aletê müsiqayê yê tabloya 16'an, min pirs ji

kak Ferensi Dawud kir û ewî ji min re got; ku ev aletê han dişibe bi aletê çelo ya Avrupiyan. Ev kesê han li ser musiqayê pispor e.

(23) İbnî Batuta, Seyahetnameya Îbnî Batuta, rûpel: 238.

(24) Şerefxan, di rûpela 107-109'an de, behsa Fermanrewatîya Dunbulî dike û wiha dibêje: "Ewa rast her ew e, ku ev eşîreta han di eslê xwe de Êzidî bûne, ji Azerbeycana Rojava hattine Botan, navça Hekarîyê û Xoyê. Akkoyunluyan qismek ji navça Hekarîyê da Şêx Ehmed Begê Isa. Di dewra Dewleta Sefewîyan de, Şah Tehmasb navça Xoyê da Dunbulîyan û ewan jî Fermanrewatîya xwe tê de damezirandin". Ji vê gotina Şerefxan derdikeve, ku ev bûyera han a dîrokî di dema Şêx Ehmed Beg de bûye. Fermanrewatîya Dunbulîyan jî bi sedan sal di navça Xoyê de maye û dîroka wan jî gelek ronî ye.

(25) Mehfuz Omer, di rûpela 62-63'an a kitêba İmaret Behdînan el-Ebasiyye de wiha dibêje: "Seyîd Xan Beg di sala 970-yê hicrî (1562/1563-yê zayînî) koça dawîyê kirîye". Lê, di perawêza rûpela 63'an de, wiha dibêje: "Di kitêba el-Ekrad Fî Behdînan a Enwer Mayî de, sala 1029'ê koçî ji bo koça dawîyê hatîye nivîsandin"; lê, di perawêza rûpela 42'an a vê nusxa Şerefnamê ya bidestnîvîs de, nivîskarekî nenas, di vî warî de wiha nivîsandîye: "Hafîz Ehmed Paşa, di sala 1035'ê koçî (1625/1626 zayînî)de di êrişa ser Bexdayê de, bi gunehkarîya serîhildanê gunehkar kir û kuşt". Ez jî wiha dibêjim; di wê salê de Sultan Murad, ji bo dagirkirina Bexdayê hêzeke mezin şand, ku wî çaxî di bin rikêfa hêzên Ebbas de bû. Hêzên Hafîz şikestin, wek ku cara berê jî şikestibûn, li ser vê, Şah karî heta Musilê dagîr bike û bêxe bin destê Xan Ehmedê Xanê Erdelan. Li gor Şerefnamê û perawêza wê, Seyîd Xan piştî vê, mîrîti ji mamê xwe stend û cil û du salan hikum kir.

(26) Dr.Subhî Enwer Reşîd, el-Aletu'l-Musiqiyye Fi'l-'Usur fi'-İslamîyye, rûpel: 289.

(27) Di rûpela 385'an a serokanîya pêşî li wênên Cizîrî binêre.

(28) Dawud el-Entakî, Tezkire Üla el-Bab Wel Cami'i Lî'l 'Eceb el-'Ecaib. Behsa "İrsa" yê, 198.

(29) Di hejmarê 88-92'an ên Kovara Rewşenbîrî Nwê de, li

ser vî warê behsa nû, me pênc qisim li ser "Bizişkî Le Kurde-warî de", belav kir, ku me tê de dermanên van çend bizişkan û yan hinin din jî li gel dermanên bizişkên wek Huneyn Bin Eshaq, Razî, Ibnu'l-Bitar, el-Entakî, Mele Mehmudê Kurdî û yên hinekî din muqayese kir. Ev karê han, heta niha cara yekem e bi vî awayî bi kurî di xebata bizişkî ya millî ya Kurd de tê kirin.

(30) Di Rewşenbîrê Nwê hejmara 112'an de, me ferمانەکە Ebdulmecîd a di derbarê medresên bi qubuh de li gel wesf û pîvanêن wê, wênek û çend belgên din jî belav kir.

(31) Di kitêba Hedaret el-Dewle'l-Dostkîyye Fî Kurdistanî'l-Wuste, cilda diduyan û rûpelên 380-402'an de, min bi dirêjahî behsa nexweşxana Farqînê (Meya-farqîn) û dibistana bizişkîyê ya wê kirîye. Dewleta Dostkîyan di sedsala 11'ê zayıñî de hatîye danîn.

*Bersîsê Evdal, bi xetê Mihemed Elî Hacî Reşîd, 1969, ev nusxe li ba min heye.

(32) Şerefxan, bi dirêjî behsa wê kirîye, ku çawan Mîr Şeref bi gelek zehmet kariye Fermanrewatîya Botan bi dest bixe û Mîr Ezîz û Mîr Hawend ji holê rake.

Melayê Cizîrî jî di Dîwana xwe de behsa vî Mîr Şerefi kirîye. Mela wiha dibêje:

"Sef sef me dîn Hindî û Zeng
Cengîzê hat Teymurê Leng
Xefwan reşand li dil xedeng
Teşbîhê tîrê Xan Şeref".

Hinek di wê bawerîyê de ne, ku Melayê Cizîrî şîira "Ey Şahînşahê Mi'ezzem" û ya "Xanê Xanan", ji ber rewan-gotinê, ji bo sitayîşa Mîr Şeref gotîye. Binêre; rûpela 266'an a Dîwana Cizîrî, lêkolîna Sadiq Bahaeeddîn, 1977.

Ev mîrê han ku Şerefxan behsa azayetî û zîrektîya wî kirîye, heta meha Şe'bana sala 1015'ê koçî (1606/1607'ê zayıñî) sax bûye. Li gel Nesuh Paşayê Walîyê Dîyarbekrê hatîye ji bo vemirandina tevgera Mihemed Bin Ehmed el-Tewîl ê dağîrkerê Bexdayê, lê, şikestine û paş de vegeşîyane. Mîr Şeref, mîrîn Kurdan qayîl dike, ku alîkarîya Nesuh Paşa bikin. Yek ji wan Seyîdxanê kurê Qubatxanê Behdinanî bûye. Lê, Seyîd-

xan di bin re li gel İbnî Tewîl li hev kiribû. Roja sisîyê Şe'vana wê salê, herdu hêz; ên Nesuh Paşa û yên Mîr Şeref, gehîştin ber surhêن Bexdayê. Binêre; Ce'fer el-Xeyat, Suwer Min Tarixî'l-İraq Fî'l-'Usurî'l-Mezleme, rûpel: 47, 1971. Lê, Nezmîzade di Gulşenê Xulefa û rûpela 211'an de wiha dibêjê: Serê Bexdayê di sala 1117'ê koçî de bûye.

Hêjayê gotinê ye, Mîr İmadeddinê şair, ku guftûgoyeke wî ya helbestê ya giring li gel Melayê Cizîrî heye, li gor nivîsandina ser kêla gora wî, kurê vî Mîr Şerefî bûye. Gora wî li gel ya Melayê Cizîrî di nav gumbeteke Medresa Sor a Cizîra Botan de ye. Ji zanyarên wekî -Xwedê jê razî be- Muftî Mela Mehmudê Huserê û Muftî Seyîd Ebdurrehmanê kurê Seyîd Elîyê Findikî hatîye sehkîrin û zanîn, ku tu nivîsandin li ser gora Melayê Cizîrî tune û kêla wî biçûk e, di milê bakurê gumbetê de ye. Roja 10'ê Tîrmeha sala 1977'an, ez, Mele Xelefî Bateyi, Seyîd Ebdullahê kurê Şêx Mihemedî Findikî û Mele Ehmedê Cizîrî di kevnebanê qata yekem re çûn nav gumbetê. Ji ber ku derîyê wê di ser de girtîye.

(33) Hesenkêf, ku niha Kurd jê re Eskîf dibêjin, dîroka wê diçe digihîje dewra Asurîyan û navê wê di nivîsandinê bizmarî yên wî çaxî de Hisnadekîf hatîye. Wek eva han di madda Hesenkêyîf a di Ansiklopediya İslâmî de ji derbaz dibe. İbn Şedad, di kitêba xwe ya destnîvis; el-Ehlaqu'l-Xetîre Fî Zîkr Umera-î el-Şam we'l-Cezîre, di rûpela 130-131'an de, wiha dibêjê: "Sê medrese(dibistan, qutabxane), çar hemam tê de ne, keleka gelek asê ye û heft derîyên Hesenkêfê hene. Her wiha serav (sirabut, serab), ku di bin de tunel heye, di nav kelê de ye û di kevir de hatîye kolan, bi pêlekanan bi awakî fetil fetil wek helezonî heta ser Diçlê tê. Di van kunêñ mezin re bê ku haya dijmin pê hebe, bi devan ji Diçlê av ji kesên di nav kelê re tanîn". Kitubxana Bodleian ji di vî warî de zanyarîyek baş xistiye ber dest. Evêñ han ku behsa wan têkirin ên sedsala 13'an in.

(34) İbn Şedad; el-Ehlaq el-Xetîre Fî Zîkr Umera-î'l-Şam we 'l-Cezîre, rûpel 130. Hinek serokanîyêñ dîrokî yên İslâmî di vî warî de wiha dibêjin: "Bingeха vê pirê di sedsala 12'an de ji alîyê Fexreddîn Qereaslanê Ertuqî ve hatîye danîn". Ma-

jor Soane, bi kelekê ji Dîyarbekrê di Dîclê de hatîye û ev pira mezin dîtiye û wiha gotiye: "Kevanên pîyên wê yên mezin entike ne". Ser vê pirê gotina xwe bi vî awayî didomîne: "Sen'etên van kevanan ji me re vê didin zanîn, ku mirov bi çandan cild, bi awakî sebir û berfirehî, ancax dikare pesnê dîroka vê netewa han a kevnare û jêhatî bide". Hinek ji xelkê ji dibêjin: "Romayîyan ev pira han çêkirîye". Binêre: Major Soane, Rehle Mutenekkîr el-Bilad Mabeyn el-Nehreyn we Kurdistan, cild;1, rûpel: 106, wergerandina Erebi, Fuad Cemîl.

Metranê berê niha ê Mêrdînê -Xwedê jê razî be- Henna Dulpenû wiha dibêje: "Di çend serokanîyan de hafîye nîvîsandin, ku Qerearslan di sala 510'ê koçî (1116/1117'ê zayînî) de pira Hesenkêfê çêkirîye. Ew çax, yê navê wî derbaz bûyî li ser text nebûye, Dawudê babê wî fermanrewa bûye". Binêre: rûpela 184'an a kitêba "Mardin Tarihi" (Dîroka Mêrdînê), bi Tirkî ye û di sala 1972'an de hatîye çapkirin. Nushek ji wê di rîya berêz Cibrail Xelef ê Metranê Mêrdînê re bi destê min ket.

(35) Binêre: Basri Konyar; Dîyarbakir Tarîhî, cilda sisîyan, rûpel: 266-279. Her wiha; Şevket Beysanoğlu, Bütün Cephele-riyle Dîyarbakir, rûpel: 73. Ev herdu kitâbê han bi Tirkî ne.

Di sedsala 11'ê zayînî de di dema Dewleta Dostkî ya Kurdi de, gundê Benî Nuh ê ser pasewana Egil, Catre û Yemanî hat weqif kirin. Ji ber ku ev hersê kelên Dewleta Dostkîyan nêzîkî sînorê Dewleta Bîzansiyâ bûn û bi çavekî girîng li wan di-hat nêrîn. Ibn Bihat, ku bazirganekî mezin ê bajarê Farqînê bû, ev gundê han bi 500 dînarê Bîzansiyâ kirî, eva han qazanca yek rojê tiştên xam ên firotinên wî gundî bû û kir weqfa van hersê kelên han. Binêre: Ehmed Bîn Yusuf Bîn Elî Bîn el-Ezraq el-Fariqî; Tarîx el-Fariqî, Beyrut 1974, rûpel: 167. Her wiha Hedaret el-Dewle'l-Dostkîyye Fî Kurdistan'l-Wuste, cilda diduyan, rûpel: 324.

(36) Gotina senc (sinc), wek sulcan û sehrîc Erebi nîne, evan kirine Erebi. Ji derveyî vê, di zimanê Erebi de tîpa "sad" û "cîm" di gotinek de nayêñ ba hev. Eva han ji gotina sencê hatîye, ku gotinekê Farisî ye. İhtîmal e, di eyñî wextê de Kurdi ji be, her di kevin de, sinc di Kurdi de hebe.

(37) Binêre: Dr.Subhî Enwer Reşîd; el-Aletu'l-Musîqîyye

Fî'l-Usurî'l-Îslamîyye, wêna 154'an a di rûpela 260'an, ya 80'an a di rûpela 379'an û ya di rûpela 259'an ji.

(38) Binêre: Wêna 88'an a di rûpela 385'an a eynî serokanîyê.

(39) Dr.Hiseyn Elî Mehfuz; Qamus el-Musîqa el-Erebîyye, 1975, rûpel: 101.

(40) Binêre: Îbn Ebî Heclê, Enmuzec el-Qîtal Fî Neqlî'l-Ewal, rûpel: 32-43.

(41) Di rûpela 76'an a Şerefnama bidestnivîs de, guherandînek bi ferq bi ya Şerefnama çapa Qahîrê û bi ya Şerefnama ji alîyê Hejarê Mukriyanî de hatî wergerandin bi zimanê Kurdi, ku eva han ji çapa Qahîrê hatîye wergerandin, heye.

Qel'eyî Xîzan nîs eslan müşahibet bî qela'i bilad Ekrad nedaret we bî terz 'Îmarat bîladi 'Ecem.

Di ya bidestnivîs de ev guherîna han heye, di yên din de nîne.

Ev yeka han di rûpela 274'ê çapa Qahîrê de wiha ye: "We biyutat derûn Qel'era nîv bi terz resit terih kirdedanet". Yanî di ciyê "biyutat" de "Îmarat" hatîye. Berêz Hejar di rûpela 402'an de wilha wergerandîye: "jorî qela wek rîwange estîrenasan helxirawe". (yanî; "xanîyên kelê wek rasatxanên sitêrnasiyê hatine avakirin"-Elişer). Yanî, di vir de, di şûna "îmarat" de "jor" (xanî) ên kelê bikaranîye, mebesta Şerefxan di vir de ev nîne, ji ber ku xanîyên di nav kela Hîzanê de, ku hemû xanîyên nav surha Kela Hîzanê digre nav xwe, ji bajarê Hîzanê pêk tê, yanî mebest ji vê ne tenê bîmayên di nav kelê de ne. Ev mebesta han, di guherîna nusxa bidestnivîs de bi başî ronî ye. Gelek car dîroknivîsan bajar bi navê "kele" bi nav kîrine. Wek mîsal; Ewlîya Çelebî, di şûna bajarê Mêrdînê, bajarê Sincarê û ya Wanê de, Kela Mêrdînê, Kela Sincarê û Kela Wanê bi kar anîye. Mexset ji bajar û kel wek hev in.

(42) Di rastiya xwe de, Hîzan, ku di serokanîyan de bi awayê Xîzan ji hatîye binavkirin, wek bajar û melbendê navçeyekê, di pêşîya İslâmîyetê de hebûye. Weqdî, di Fituh el-Şam, cilda diduyan, rûpel: 168-169'an de wiha dibêje: "Hîzan, Maden, Sîrt û çend melbendên din, di sala 18'ê koçî (639'ê zayînî) de di alîyê 'Iyad Bin Xenîm de hatîn rizgar kirin."

Basil Nikitin, di kitêba xwe ya el-Ekrad (Kurd) di rûpela 129'an de, wiha dibêje: "Hîzan, di dema Romanîyan de mel-bendeke herêma Miksê bûye, niha jî keleka Romanîyan di dola Hîzanê de tê dîtin". Hîzan, li pêş dewra Hulago û dewra Nesreddîn el-Tusî û di zemanê İslamîyetê de, navê wê di van kitêban de; Asaru'l- Bilad we Exbaru'l-'Îbad, di rûpela 36'an a Zekerîya Qezwîn, Mu'cemu'l-Buldan a Yaqt el-Hemewî di behsa "Hîzan" de û di kitêba el-Lubab Fî Tehrîr'l-Ensab a Ibn el-Esîr a di warê "Hîzan" de, bi navê "Hîzan" hatîye bi-nav kirin.

Rê lê diçe mirov bêje, ku fêkîyên Hîzanê di wextê Hulaku de hatine danîn. Lê, fêkîyên wek bindeq(findeq) û şahbelut berî wî jî hebûne. Kesên wek Qezwînî û Yaqt el-Hemewî jî behsa vê yeka han kirine. Ji derveyê vê, ev fêkîyên han li gundê Bêdarê, Ewzîm û Xinukê yên navça Berwarê a ser qeza Xesxêrê a bakûrê navça Hîzanê jî hene. Îhtîmal e van ji Hîzan wergirtibin, dûr nîne, di wextê İslamîyetê de bi awakî berfirehî dest ser Hîzan de hatibe anîn û ji nû de hatibe avakirin. Eva han jî ne dûr e, ku evê han di bîra xelkê de manc. Ez wisa dizanim, ku paşvemayîyên niha yên surhêن Hîzanê gelek kevn nînin, yên zemanê İslamîyetê ne. Ji derveyî vê, ne gelek kevn e, kevirêñ wê jî ne neqarkirî ne, ne jî mezin in.

Hêjayê gotinê ye, ku wextê ez bi Muhemed Wasiqê Zivingî re çûm Hîzanê, xelkê wir jî min re gotin; ev besa rojavayê Kela Hîzanê, ku niha girîngitirîn besa wê ye û ji kevirêñ spî yên ne-qarkirî bingeha wê hatîye danîn, ev Burca Cîhan Şah e û mala Cîhan Şah bûye. Wextê emi çûn ser gora Sînem jî, ku sti-ran û çîrokêñ gelek zêde li ser hene û heta wê derecê, ku belav bûne û gehîştine navçen Mukrîyan, Hewlêr û Koyê jî, ji min re gotin; eva han xanîyê Cîhan Şahê babê Sînem e, ku gora wê di nav beşeka goristana li milê rojavayê kelê ye.

Vêca êdî ez nizanim, ev Cîhan Şahê han mîrekî Hîzanê yê piştî zemanê Şerefjan bûye, yan yekî din e û Kela Hîzanê û bi surhêن wê ve jî ewî avakiriye? Di dîrokê de sê kesên navêñ wan Cîhan Şah in di bîra min de hene, ku ez bikarim bêjim; ne dûr e dest bi ser Hîzanê de anîbin, yanî restûre kiribin û ev surha han jî her bi navê wan be. Yekemîn; Cîhan Şahê kurê

Mexî-şeddîn Tuxrul Şahê kurê Qiliç Arslan e, ku ji Selçukîyê Romê ye û paytextê desthilatdarîya wî bajarê Kurdistanê; Erzirum bûye, di navbera salên 622-627'ê koçî (1225-1229/1230'ê zayı-nî) de hikum kirîye. Yê diduyan; Cîhan Şahê kurê Qere Yusîf Qerekoyunlu ye, ku wextekî gelek zêde li Iran, Iraq û Kurdistanê fermanrewatî kirîye, di sala 872'ê koçî (1467/1468'ê zayı-nî) de li navça Muşê ya bakurê Bedlîsê hafîye kuştin. Yê sisîyan jî; Cîhan Şahê kurê Qere Osmanê mamê Hesenê Dirêj ê Akkoyunlu ye. Di navekê re mîrên Akkoyunluyan serkarîya navça Hîzanê jî kirine. Jiyana vî Cîhan Şahê han ne ronî ye, evî wekî şahêki desthilatdarî nekirîye. Ez dûr nabînim Cîhan Şahê Qere Yusif, ku xwediyyê Merax û Tebrîzê jî bûye, kel û surhêن Hîzanê ava, yan resture kiribe. Lî, min sehnekirîye, ku Hîzan kiribe cîyê rûniştandina xwe. Eva han jî ne ihtiemalek dûr e, ku surhêن Hîzanê jî sedsala 15'an ber bi jêrtir bin.

Her çendin Cîhan Şahê Qerekoyunlu, mizgefta mezin a bajarê Wanê a kevin bi minara wê ve avakirîye, ku evê han li ba Kela Wanê ne. Ewlîya Çelebî di rûpela 212'ê Seyahetnama (çapa Kurdî) xwe de bi nexş û nîgar behs kirîye. Lî, şûna ku bêje Cîhan Şahê Qerekoyunlu, bi şasî gotîye; Cîhan Şahê Akkoyunlu.

(43) Georg Zeydan; Tarîxu'l-Temeddûn el-İslamî, cilda pêncan, rûpel: 180.

(44) Ehmedê Xanî, Mem û Zîn, Hewlîr 1968, rûpel: 101.

Rêzênen şîira Mem û Zînê eva ye;

Westan û nêrgizî û seqlan

Derwaze û ew merî û meydan.

(45) Ewlîya Çelebî, Seyahetname, cilda çaran, rûpel: 144, çapa Kurdî.

(46) Mem û Zîn, rûpel: 139.

(47) 'Eze Çawuş, di hêla aborî de rewşa wî baş û hespekî wî yê baş jî hebûye. Ferec Çawuş li Koyê zurne lêdixist, pişt re hat Ranîyê û dorberê du sal berî niha koça dawîyê kir. Wî çaxî nêçîr bi tajîyan dihat kirin, ne bi teyrêن nêçîrê. Ev zan-yarîyê min ên niha yên di derbarê lîstika qaşwanê de, min ji kak Tewfiqê Mele Sidîq wergirtin. Ez wisa dizanim; "qaş-

qaşwan" ji gotina "kaşo" hatîye girtin. Ji ber ku li gelek cîyên Kurdistanê jê re kaşo tê gotin, wek li Behdînan û bi Farîsi jî jê re kaşo tê gotin.

(48) Bi navê Ertuqê kurê Ekseb(Eksebo-Eksek) jî di hinek serokanîyan de hatîye. Di sala 477'ê koçî (1084/1085'ê zayînî) de Sultan Melik Şahê Selçukî, hêzek di bin serokatîya Mîr Ertuq de ji bo alîkarîya wan hêzên din şand, ku ewan alîkarîya dagirkirina Dewleta Dostkî ya Kurd jî kiribûn. Ewan, sala din ev dagîrkirin pêk anîn. Ertuq, di sala 484'ê koçî (1091/1092'ê zayînî) de koça dawîyê kirîye, Sekmanê kurê wî di sala 495'ê koçî de bûye Mîrê Hesenkêfê û pişt re kur û neviyên wî dest danîn ser hemû navçên Mêrdîn û Dîyarbekrê.

Vêca ji ber vê yekê, Ertuq, fermanrewatî di nav van navçan de nekirîye, mimkun e, ew mîrê Ertuqî yê babê keçikê, yek ji wan kur, yan neviyên Ertuq be, ne Ertuq bi xwe be. Binêre: Dr. Ehmed Seîd, Tarîxu'l-Dewleu'l-Îslamîyye we Mu'cemu'l-Esratu'l-Hakime, cilda diduyan, rûpel: 350-353. Her wiha, kitêba min, el-Dewle'l-Dostkîye Fî Kurdistanî'l-Wusta, cil-da yekem, rûpel: 291.

(49) Di rûpela 90'ê destnîvîsa Şerefnamê de navê wî "Seyîd Hiseyn" hâfiye nivîsandin, yanî Seyîd Hiseynê kurê Şêx Hesen. Lê, di Şerefnama çapa Qahîrê di rûpela 324 an de, di cîyê "Seyîd Hiseyn" de "Seyîd Hesen" hâfiye nivîsandin. Eşkera ye, ku nusxa bidestnîvîs rastir e. Şerefhan, di pêş de wiha ni-vîsandîye: "Şêx Hesenê Zerqî, keça Mîrê Ertuqî li xwe mahî kir". Binêre: Rûpela 86'an a bidestnîvîsê û rûpela 309'an a çapa Qahîrê. Heta li gor temenê Şêx jî eva han her rast be, ku ew keçik li kurê xwe mahî kiribe.

(50) Seyahetname, rûpel: 244.

(51) Seyahetname, rûpel: 114.

(52) Seyahetname, rûpel: 114.

(53) El-Mu'cem el-Turkî el-Erebî, cilda çaran, rûpel: 218, cil-da yekem, rûpel: 250.

(54) Di rûpela 101'ê Seyahetnamê ya Tirkî de navê "baleban" derbaz dibe. Mamoste Seîd Nakam, li gel navên din ên teyran her navê wî bi xwe nivîsandîye û Kurdiya wî nenivîsandîye. "Baleban", di el-Mu'cem el-Turkî el-Erebî de, bi

Erebî "waq" e, ku ji sinifa "malik el-hezîn" e. Berêz Hamî Begê Caf wiha dibêje: "Bi Kurdi navê 'baleban' helo(eylo) ye, ku bi mezinî têt girtin û li mal têt terbiyekirin. Ji ber ku mezinên wan bi davikan têñ girtin. Ger helo bi biçûkî di hêlinâ xwe de bê girtin û xwedî kirin û gava mezin bibe her ji vî re ji helo têt gotin".

(55) Bazên Şêx Salihê kurê Seyîd Mihemedê Muftî kurê Şêx Elî kurê Babe Resulê Berzencî, Ehmed paşayê Ebdurrehman Axa û yên Heme Axayê Ewrehman Axa li Silêmaniyê hebûne. Ebenewte û Heme Ferecê birayê wî, bazevanî ji wan re kirine. Wî wextî xercê bazewan û yên mala wî li ser xwedîyê baz bûye. Ji ber ku nedikarîn ji derveyî wî karî karekî din bikin. Divê baz xwedî û hînî nêçîrê bike. Ewan destikek dikirin destê xwe û li ser destê xwe li bazarê digerandin, heta dibirin çayxanan jî û didanîn ser hesinekî ku bi xwe re dibirin. Ji ber ku rutubet tesireke gelek mezin li ser bazan dike, ji ber nazîkiyê gelek zû dimrin. Bazên mezin rojê mirîsk û nîv dixwin û xwarina wan her goştê mirîskê ye. Şêx Mehmudê nemir, li gundê Darîkelî, baz, helo û teyrê din ên nêçîrê didan girtin û ji bo şêxên Ereban ên Xelîcê dîyarî dikirin. Lê, bi xwe nêçîr pê nedikir, ji ber ku wî çaxî bi tajîyan nêçîr dikirin. Kerîmê Ardebarâyî yê bazevan, li dorûberê sala 1920'an, Ebenewete dorê 1934'an û Heme Ferecê birayê wî ji dorê sala 1952'an de, koça dawîyê kirine. Min ev zanyarîyê han ji berêz Şêx Raufê Şêx Nurîyê Neqîb -Xwedê jê razî be- ji Elî Dede (Elî Salihê Sore) wergirtine. Kak Elî, di roja 30.12.1986'an de, li Silêmaniyê koça dawîyê kir. Bîranînê wî yên gelek zêde hebûn, min û kak Ekremê Salihê Reşe, golek feyde jê dîtin. Ji derveyî van, zanyarîyê wî yên gelek zêde li ser keleporêñ Kurdî hebûn. Hezar rehmet li gora wî be.

(56) Dr.Salih Hiseyn el-'Ebîdî, el-Melabîs el-Erebiyye el-İslamîyye Fil'-Esrîl-'Ebbasî, rûpel: 253. Her wiha binêre; Zinhart Dozi, Tekmîlet el-Mu'cem el-Erebiyye, cilda çaran, rûpel: 147-149.

(57) Şerefname (ya bidestnivîs), rûpel: 157 û 159. Her wiha Dr.Ehmed Seîd, Tarîx el-Duwel el-İslamîyye we Mu'cem el-User el-Hakime, cilda diduyan, rûpel: 441-442. Şerefhan

wiha dibêje: "Sultan Osman, di sala 688'ê koçî de, serxwebûna xwe ya bi temamî wergirt". Lê, di eynî wextî de wiha ji gotîye: Sala 689'ê koçî, destpêka hatina wî ya ser textê sel-tenetê bûye.

(58) Dr. Salih Hiseyn el-'Ebîdî, el-Melabîs el-Erebîyye, rûpel: 278.

(59) Min wisa dizanî, ku Çaldiran, Çaldiranê navça Wanê ye, ku niha melbendek nahiya Çaldiranê û girêdayî qeza Mûradîyê (Bêgirî) yê ser bajarê Wanê û hevsînorê navça Bazîdê (Bayezîd) ye. Lê belê, Mamoste Mele Cemîl, ku zanayê vê mi-jarê ye, di vî warî de wiha dibêje; di eslê xwe de Çaldiran, Çarderan e, yanî çar şîw (çar dol) e, li der-dorê Maku ye, yanî li Kurdistanâ İranê ye. Ev çar dolên han ev in: Qizilçay, Çaldiran, Qenat û Çesmesar e û navçeye çiyayî ye û ji 84 gundan pêk hatîye.

(60) Xwedê jê razî be, M. Eli Ewnî, di perawêza rûpela 172-175'ê "Mêjû" ya M. Emîn Zekî Beg de, deqa ferмана Sultan Selîm bi Tirkî belav kirîye û wergerandîye ji. Ji ber ku dîrok-nivîsê mezin M. Emîn Zekî, di rûpela 164-171'an de, bi dirêjahî li ser Şerê Çaldiranê û rêkevtina Kûrdan û Sultan Selîm se-kinîye.

(61) Seyahetnameya Rîch, rûpel: 144.



Tablo 1: Manzarayek Nêçîrê li Hekariyê






Table 2: Dagirkirina Kela Dizë




Tablo 3: Amediyê




Tablo 4: Dibistaneke Nexweşxanê û Bizişkîyê li Amediyê,
Dêmenâ Duduyan: Listika Qaşwanê



Tablo 5: Cizira Bolan u Mem u Zin




Tablo 6: Meclîsa Mîrê Botan




Tablo 7. Kela Hesenkêfê




Tablo 8: Bajarê Hesenkêfê



Tablo 9: Kela Egilè (Gel)



Tablo 10: Cardin Egil



Tablo 11: Bajarê Hîzanê Problemeke Avasazîyê





Table 12: Hizan



Tablo 13: Nêxweşîya Demargiriyê
(Esabî-Sinîr) Çareserkirina Wê ya bi Dua

Tablo 14: Abloqa Kela Bedlisi ji Aliye Akkoyunluyan ve






Tablo 15: Medîsa Şerefxanâ Bedlisi




Tablo 16: Şah Tahmasb İi Bajarê Xelatê

Table 17: Bega Yekem; Sultan Osman




Tablo 18: Şere Edimneye





Tablo 19: Sultan Mehmed Fatih 1 Stenbol

Table 20: Şerè Qaldırané



Jîna Nû Yayınları

1-Images du Kurdistan de Turquie, **Suayip Adığ**

2-Dêngê Xêzikan, **Mamoste**

3-1925 Kürt Ayaklanması (Şeyh Sait Hareketi), **Prof. M. A. Hasretyan, Dr. K. Ahmad, M. Ciwan**

4-Ronahi (1942-1945 yılları arasında çıkan) olan Ronahi dergisinin tüm sayılarının bir arada tipkibasımı

5-Jiyana Rewşenbirî û Siyasi ya Kurdan (Di Dawiya Sedsala 19'a û Destpêka Sedsala 20'a de), **Dr. Celîlê Celîl**

6-Büyük Anayurt Savaşında Kürtler (1941-1945), **H. M. Çetoev**

7-Komara Demokratik a Kurdistan (Mehabad), **Kerîmî Husamî**

8-Roja Nû (1943-1946 yılları arasında çıkan) olan Roja Nû gazetesinin tüm sayılarının bir arada tipkibasımı

9-Le Bîrewerîyekanîm-I, **Kerîmî Husamî**

10-Yüzyılımızın Başlarında Kürt Milliyetçiliği ve Dr. Abdullah Cevdet, **Malmisanij**

11-Hêşir û Baran (kurteçirok), **Bavê Nazê**

12-Zazaca-Türkçe Sözlük (Ferhengê Dîmlîkî-Tîrkî), **Malmisanij**

13-Agîrê Sinema Amûdê, **M. Ahmedê Namî**

14-Na Xumxum a..., Arêkerdox: **Koyo Berz**

15-Bir Kürtle Konuşma (şîr), **Adonis Buduris**

16-Herakleitos (şîr), **Malmisanij**

17-Dîwana Rûhî, Şêx **Abdurrehmanê Axtepî**

18-Şâîrên Klasik ên Kurd, **Abdulreqîb Yûsuf**

19-Lî Kurdistanâ Bakur û lî Tirkîyê Rojnamegeriya Kurdi (1908-1981), **Malmisanij & Mahmûd Lewendi**

20-Zargotina Kurdêن Sûriyê, Amadekar: **Dr. Celîlê Celîl**

21-İki Dünya Savaşı Arasında Irak'ta Kürt Sorunu, **Prof. Şakîrê Xidoyê Mihoyan**

22-Zîmanê Min-I, **Haydar Diljen**

23- Said-i Nursî ve Kürt Sorunu, **Malmisanij**

